

JESUCRISTO ORETAGANODI NAIMIĒ RAFUE LLOCANA UILLA RAFUE

Jesús Jusiñamui Joreño billena llua rafue

¹ Teofilo, o dine, ¿nigacino? ¿Nie isoidio? Omo jiaie rabe birui dane oretaiacadie. Lucadie. Navui jiaie cartana oretaticue. Ailluena Jesús finoca rafuena nainomo cueticue. Ailluena Jesús llofuiacinona jiai cueticue. ² Monamo naimiena Jusiñamui nia uiñenia, Jesús ie llofueoicaiganona llofueuide. Ie llofueoicaiganona jaie naimie fetuamona, Jusiñamui Joreño uaido naimacina llofueuide. Naie llofuiacinona navui cueticue. Jesús monamo jailla mei, ie llofueoicaigano naimie oretaganona mameciredimaci. ³ Naimie fiodaillamona ie jillua mei, naimacimo bairede. Naimie ua jilluana naimaci raise uiñollena, diga icaiño cuarenta digarui naimacimo baireuide. Naimacina Jusiñamui dibeimo ie comini jai illa rafuena llofueuide. Naimiemo jai suide rafuena llofueuide. Naimiemo nia suiñede rafuena llofueuide.

⁴ Naimaci diga Jesús guilla facaise, naimie Jerusalémona naimaci oni jaillana rairuide. Raite:

—Cue Moo ie Joreño omoimo fecallena, omoimo jai lloticue. Naiena omoi feiñollena, Jerusalémo nia fiebi. ⁵ Naimie rafuena comini inuamona, Juan Bautista micori jinui diga bautizade; iadedi cue rafuena omoi inuamona, nano nigarui illanona, cue Moo ie Joreño feiñoitomo —raite.

Monamo Jesús jailla rafue

⁶ Ie llofueoicaigano diga Jesús dane ofillanona, naimiemo jicanotimaci:

—Nama, ¿birui cai judíuai cominina jai sedaitio, David micori cai usumatiai micoriai jaie sedaja isoi?

⁷ Naimie uai ote:

—Naie rafue suille facaiseconi jaca uifioñeitomoi. Naimie siñona illamona, dama cue Moo naie rafue suilliruina uifioñote; ⁸ iadedi cue Moo ie Joreñona omoi feiñua mei, siño uai omoimo iite. Ie jira Jerusalémo cuena lloitomoi. Judeamo, Samariamo, ua nana eniruemo ite nairaimo lloitomoi —raite.

⁹ Naimie iena llua mei, Olivos railla anedumo jai jaidimaci. Nainomo itimacimo, naimaci eruaisitemo, monamo Jesús Jusiñamui uiga. Uillie illa jira, naimiena cioisiñede. ¹⁰ Monamo nia eruidemo, ieconi naimaci dine Jusiñamui jaienici, mena ima bairia isoi, bairediaimaiai. Naie iaimaiai iniroi userede. ¹¹ Raitiaimaiai:

—Galileo imaci, ¿bue ñellena monamo eruidomoi? Omoi motomona Jesús monamo jaillana jai ciodomoi. Naimie jai jailla isoi, dane abido ico biite —raitiaimaiai.

Matiana fetua rafue

¹² Naimacimo Jusiñamui jaienici llua mei, Olivos railla anedumona Jerusalémo naisodo abido jaidimaci. Olivos railla anedumona Jerusalémo ochocientos metros dinori illanona, sábadoruimo Moisés micori lloga dinori macaritimaci. ¹³ Rillano imaci cuartomo jaidimaci. A dibebamo ite. Nainomo itimaci: Pedro, Jacobo, Juan, Andrés,

Felipe, Tomás, Bartolomé, Mateo, jiaie Jacobo. Naimiedi Alfeo jito. Simón ite. Naimiedi cananista comini facaisemo duide. Judas ite. Naimie jiaie Jacobo jito. Dese nainomo itimaci. ¹⁴ Naimaci jitaillamona, Jusiñamuimo jillena, nagarui danomo ofidimaci. Jillena, jaino naimaci diga jiai ofisoidimaci. Diga riñoniai jiai ofisoidimaci. Jesús ei, María, jiai ofisoide. Jesús amatiai jiai ofisoidimaci.

¹⁵ Comini ofilla motomo Pedro naidaita, rafuena llote. Nibai ciento veinte comini nainomo itimaci. Pedro llote:

¹⁶ —Amatiai, David micori jaie lloga rafue birui jai suide. Jusiñamui Joreño jaie David micorina Judas micorina ñaitatate. Salmos rabenicomo naie ñaiacinodi cueba. Iena uiñoticaí. Judas micorina uiñoticaí. Naimie Jesúna gaitadinona ifode. ¹⁷ Naimiedi da cai llofueoicaigano imie. Cai diga maijuide. ¹⁸ Ie maraiñeno finoca rafuemonona ucubena feiñua mei, ie comeci iuaina meiduanona, naie ucubena oni judaide. Judíuaí illaicomini naie ucube diga eniruena ibadimaci. Nainomo Judas micori ie cimaio cuinajanona, ie abina dama meinete. Rifaillamona, ana uaillamona, ie jebegi boficaillamona, nana ie jebegi jino uaide. ¹⁹ Nana Jerusalémo itino iena fididimaci. Ie jira cai uaido naie enirue mameciredede Acéldama. Oni dobaiñuamona dirue toillanie. ²⁰ Ero, Salmos rabenicomo Judas micorina iese David micori jaie cueba:

Naimie illano taino iite.

Buna jaca iemo iñeite.

Naimie maijille jiaimie mo iite.

Iese cuega. ²¹⁻²² Ie jira cai diga itinomona damiena fetoiticaí. Cai Nama Jesús cai diga illa facaiseconi, nagarui diga iñiaí cai diga jaisoidimaci. Juan Bautista micori Jesúsna bautizaja facaise mona, Jesús monamo caimona jaillarui facaiseconi, naimaci cai diga jiaí itimaci. Naimacimona damiena fetoiticaí, Jesús jilluana cai diga llollena. —Iese Pedro raite.

²³ Ie mei mena imana fetodimaci. Damiedi José Barsabas. Jiaici mameci Justo. Jiaimiedi Matías.

²⁴ Ie mei Jusiñamuimo jiidimaci:

—Nama, nana comini imaci comeciaina uiñotio. ¿Nie imana jitaidio? Caina uiñota. ²⁵ Naimiedi Judas ifo meidoite. Jesús ie oretagamiena naimie jaillamona, cai diga maijijite. Ie fiodaillamona Judas micori ie maijana jai fañonocaide —jiidimaci. ²⁶ Ie jira conima jabomaside, uiñollena bu ille. Matíamo baite. Iemei jiaie once diga oretagano isoi naimie ite.

2

Cristo oretagano Jusiñamui Joreñona feiñua rafue

¹ Pentecostés railla rafue irui ria, nana creyentiaí diese danomo itimaci. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. ² Danomia, ebena illacinomona monamona riire aifi billa isoi buena cacadimaci. Nana jofomo itino naiena jiaí cacadimaci. ³ Iena naimacimo bairede. Iena ciidimaci. Irai boua isoi eruaide. Nana naimacimo baite. ⁴ Iese Jusiñamui Joreñona feiñotimaci. Nana naimaci comeciaina namatade. Iemei diga nairai uailaído ñaitimaci, Jusiñamui

Joreño naimacina ñaitatajamona. Naimaci ñaia uaillaina uiñoñedimaci.

⁵ Naie facaiseconi Jerusalémo Jusiñamui rafuedo eo jaide judíuaidi itimaci. Diga nairaiaimona bitimaci. ⁶ Creyentiaí ñaiana naimaci fidiano, ail-luena comini jino tainomo ofidimaci. Nagamiiaidi ie nairaí uaina cacade. Ie jira jacinaitimaci. ⁷ Eo rajicaidimaci. Coninimo jicanotimaci:

—¿Buta ñaite? Nana Galileos imaci. ⁸ ¿Niese naimacina cacadicaí? Cai uaido dajerie ñaiana cacadicaí —raitimaci. ⁹ Diga comini imiaí itimaci: Partos, Medos, Elamitas, Mesopotamia imaci, Judea imaci, Capadocia imaci, Ponto imaci, Asia imaci, ¹⁰ Frigia imaci, Panfilia imaci, Egipto imaci, Libia imaci. Libia imaci enirue Cirenemo ruica eruaide. Romamona jamai macaritano jiaí itimaci. ¹¹ Judíuaí itimaci. Judíuaíñedino jiaí itimaci. Judíuaí isoi Jusiñamuina jai sedadimaci. Cretenses itimaci. Arabes itimaci.

—Cai uaido Jusiñamui ie ebirede finoca rafuena cacadicaí —raitimaci. ¹² Nana eo rajicaidimaci. Danirie jicanododimaci:

—¿Bue ite?

¹³ Jiaie comini jifanoduano, raitimaci:

—Jifaidimaci. Ie jira iese ebena ñaitimaci.

¹⁴ Ie facaise ie once nabaiñaí naimie ecimo illanona, Pedro nainomo como ofidinomo ado llote:

—Caimaci, ua nana Jerusalén imaci, cue llu-amo cacarei. Naie rafuena lloiticue. ¹⁵ Omoi comeciaina omoi facaja isoi, jifaiñedicaí. Jitoma nia fuiri daidemo, bu jaca jifairainina. ¹⁶ Joel micori bie rafuena jaie llote. Joel micori Jusiñamui

rafuena lloiraíma. Naimie jaie lloga rafue birui caímo jai suide. ¹⁷ Llote:

Jusiñamui caímo llote: “Jiairuido bie rafue suite. Cue Joreñona diga cominimo fecajitícue.

Iedo omoí uruiai cue lluana lloitimaci.

Iemona omoí coniruiaina nicairitaitícue.

Iemona omoí einamacina jiai nicairitaitícue.

¹⁸ Ua nana cuena sedadinomo cue Joreñona fecajitícue.

Naimaci cue lluana lloitimaci.

¹⁹ Monamo eo jacirede rafuena ico suiñotaitícue.

Eniruemo eo jacirede rafuena ico jiai suiñotaitícue.

Comini jobairillemona, eniruemo comini diruedi eo iite.

Naie facaise daje diese enirue boojite. Bouamona uillie eo iite.

²⁰ Jitoma lligaiñoñeite. Fivui diruena eruaite.

Nana bie suite, Cristo billa facaise nia iñenia.

Naie facaise diga jacirede rafue suite;

²¹ iadedi birui cuemo bu jicaia, ie jeacinomona naimiena jillotaitícue” Jusiñamui llote.

Ie Joreño caímo birui illamona, Joel micori llogacino jai suide.

²² Caímaci, bie uaina omoí cacarei. Nazaret ie Jesúna ñaitícue. Jusiñamuidi omoí motomo naimiena siño rafuena jai finotate. Iena jai uiñotomoi. ²³ Jusiñamui comeci jaie facaja isoi, Jusiñamui jitaila isoi, Jusiñamui naimiena omoímo fecade. Jesúna coraitatomoí. Jusiñamuina ñnoñedinona naimiena meinetadomoi; ²⁴ iadedi fiodaillamona naimiena Jusiñamui jillotajano,

llegi ie cacajamona naimie jillobide. Naimie fiodaite; iadedi fiodaillamona nainomo iñoñede. ²⁵ David micori naimiena jaie llote:

Jusiñamui cue diga jaca illana uiñoticue.

Cue ecimo naimie ite, cue comecina ocuiñotallena.

²⁶ Ie jira cue comeci caimare ite. Eo iobidicue.

Cue marena illemo jai jiai ocuiridicue,

²⁷ raiafomo cue joreña naimie fañonocaiña jira,

ie mare Jito abi rifaillana naimie jitaiña jira.

²⁸ Naimie cuena jilloitallena uiñoticue.

Cue diga naimie illa jira, cue comeci caimare iite.

²⁹ Caimaci, cai usuma David micorina marefodo ñaiticue. David micori ñaia, dama naimie facaina ñaiñede. Jesúna ñaite. David micori jaie fiodaite. Raiafomo jonega. Naifo bene nia illamona, naimiedi Jesúna ñaiana uiñoticaí. ³⁰ Ie ia David

micori Jusiñamui rafuena llote. Naimie micoridi Jusiñamui naimiemo uanaicinona llua uiñote.

Jaie Jusiñamui naimiemo llote: “O uruiaimona damie illaimana illanona, ie cominina sedajite” llote.

³¹ Cristona ñaite. David micori nia suiñede rafuena llote. Naimie micori Cristo jilloillena llote:

“Raiafo Jusiñamui fiodaillanomo Cristo Joreño fañonocaiñeite. Cristo abi rifañeite” llote.

³² Jesúna ñaite. Jusiñamui Jesúna jai jillotate. Nana cai iena cidicaí. Ie jira iena lloticaí. ³³ Ie ecimo

Jesúna jai dane itatajanona, Jusiñamui naimiena iobitade. Ie Moo llua isoi, Jesús jai ie Moo Joreño

caimo jai fecade, omoi birui ciua isoi, omoi birui cacaja isoi. ³⁴ Naimie abi monamo jaiña jira,

David micori dama naimie facaina ñaiñede; ia Cristona ñaite. Ero, jaie David micori raite:

Jusiñamui Cristomo llote: “Cue ecimo ana raí.

³⁵ Ona ñinoñedinona o anamo itataiticue”

raite. David micori llua isoi, birui jai suide.

³⁶ Pedro nia ñaite:

—Jesúna coraidomoi; iadedi Jusiñamui naimiena cai Namana itatate. Naimiena cai Jilloitaraimana jai itatate. Nana judíuai comini naiena uiñuana jitaídícue.

³⁷ Pedro lluana cacajano, naimaci comeciáimo riire baite. Pedromo iena jicanotimaci. Ie nabaiñiaimo jiai jicanotimaci:

—Caimaci, o lluana jai cacadícai. ¿Bue finoitícai?

³⁸ Pedro uai ote:

—Omoi comeciái iuaina meido. Iemei Jusiñamui omoimo ite jeacinuaina dotajite. Jesucristo facaina omoi bautizallomoi. Jusiñamui Joreñoña jiai feiñoitomoi. ³⁹ Omoimo ie Joreño fecallena navui llote. Omoi uruiaimo jiai fecaite. Jiaie nairaiai itinomo jiai fecaite. Ua nana Jusiñamui fetocanomo jiai fecaite.

⁴⁰ Díga uai naimacimo Pedro llote. Raite:

—Ailluena comini marañede rafuena birui finocana jaidimaci. Faifitimaci. Naimaci isoi jaiñeno; iadedi cue lluana omoi cacajamona, iena ñino.

⁴¹ Díga comini ie lloga uaina feiñuano, bautizadimaci. Nairuido ñibai tres mil comini creyentiaña jaidimaci. ⁴² Cristo oretagano llofuiana fueuidimaci. Cristo oretaganona eo nabaidimaci. Nagarui ofillanona, Jesús fiodailana comeciuidimaci. Jusiñamuimo juiuidimaci.

Cristona ñnotino illa rafue

⁴³ Cristo oretaganodi díga siño rafuena finuamona, nana comini jacinaitimaci. ⁴⁴ Nana creyentiaí damacina itimaci. Naimaci raruiaí coninimo fecauídímaci. ⁴⁵ Dueredino ia,

naimacina canollena, raruiaredino naimaci raruiaina vendedimaci. Iemei naie ucube dueredinomo fecadimaci. ⁴⁶ Jusiñamuina sedallena, nagarui Jusiñamui jofomo ofisoidimaci. Danirie imaci jofuemo Jusiñamuina jiai sedauuidimaci. Nainomo danomo guillanona, Jesús fiodaillana comeuidimaci. Caimare imaci comeciai illamona, caidiñeno guisoidimaci. ⁴⁷ Jusiñamuimo iobillacinona fecacana jaidimaci. Nana cominidi naimacina: “Mare” raitimaci. Naimacina Jusiñamui itataja isoi, nagarui comini creyentiaina jaidimaci.

3

Jusiñamui jofomo Pedro lluacino

¹ Jusiñamui jofomo jia facaise Pedro iaimaiai Juan diga jaide. Jitoma ana ia, comini juidimaci.

² Iaimaiai jaillanomo jiaie comini tisitaitimiena atiana ciodiaimaiai. Tisitaitimiena naimie jaca jeiciga. Naimiena nagarui atiano, Jusiñamui jofo ie ebiredena railla nase fuemo rainauuidimaci. Nainomo naimiena rainauuidimaci, fo jaidinomona ucube jica-jicallena. ³ Iaimaiai fo jaiacania, ucube jicallena, ie onolli ñuitade. ⁴ Iaimaiai naimiemo eruaillano, Pedro raite:

—Cocomo eruai.

⁵ Ie jira iaimaiaimo eruaide. Ra feiñoitena, ocianona sedade. ⁶ Pedro raite:

—Ucube cuemo iñede; iadedi cuemo ite rana omo fecaiticue. Nazaret ie Jesucristo uai cuemo illa jira, ona macaritaiticue.

⁷ Pedro naimie onollido llinuano, a naidanete. Ieconí naimie eillidi jillode. Ie taisicoñuai jiai

jillode. ⁸ Daiacaillanona naidacaide. Macarillanona, iaímaiaí diga fo jaide. Jusiñamuimo iobillacinona fecajano, daiacaillanona macarite.

⁹ Nana comini naimie macarillana ciódimaci. Naimie iobillacinona fecajana jiaí cacadimaci.

¹⁰ Naimie nase fuemo ana raisoilla jira, naimiena uiñotimaci. Naimiemo jai suide rafuena eo raijicaidimaci.

¹¹ Naimiedi Pedro iaímaiaí Juan diga nia llinuano, naimaci dine Salomón micori finotaga jofó abí ibirimo comini aisidimaci. Raijicaidimaci. ¹² Iena ciuano, Pedro naimacina raite:

—Caimaci, ¿bue ñellena biemo raijicaidomoi? ¿Bue ñellena caimo iese eruaidomoi? “Daiímaiaí uaido naimiena jilloitate” raillanona cocomo eruaidomoi.

¹³ Iena finoñedicoco; iadedi Jusiñamui iena finuano, ie Jito Jesúna iobitade. Cai usumatiaí micoriaí, Abraham, Isaac, Jacob, ua nana cai usumatiaí micoriaí bie Jusiñamuina sedadimaci; iadedi Jesúna birui fecadomoi, coraillena. Pilato naimiena jino marena oretaiacana jira, Pilato ecimo naimiena llogidotomoi.

¹⁴ Mareuidimiena jitaiñedomoi; iadedi come fatimiena cárcelmona jino billana jitaidomoi. Barrabás raillamiena jitaidomoi.

¹⁵ Jusiñamui dibeimo caina itatatimiena meinetomoi. Naimie fodaite; ia Jusiñamui naimiena jillotate. Iena ciódicoco. Ie jira iena lloticoco.

¹⁶ Tisitaitimie jilluana jai ciódomoi. Naimiena uiñotomoi. Jesúna naimie ñnua jira, Jesús naimiena maíritate. Naimiena raise jillotate. Iena jai ciódomoi.

¹⁷ 'Caimaci, ero, omoi finoca rafuena abina uiñoñoeno finodomoi. Omoi illaicomini jiaí daje isoi

finodimaci. ¹⁸ Jaie Jusiñamuidi ie facaina llorainina jiairuido suille rafuena llotatate. Naimacina Cristo leggi cacajana llotatate. Birui naie llogacino suide. ¹⁹ Omoï comeciái iuaillai meido. Jusiñamui dibeimo omoï comeciaina meido. Iemei Jusiñamui omoï jeacinona dotaite. Iena jaca feitaite. ²⁰ Omoï uri illa facaise illena, Jusiñamui omoï diga illena, iena fino. Jusiñamui Jesucristona omoï dine dane oretallena, iena fino. Naimiedi omoï Jilloitaraima. ²¹ Jusiñamui facaina lloraini micoriai jaie lloga rafue suille dinori monamo naimie fiebiite. Jaie Jusiñamuidi ie mare lloraini micoriai uaido buena llote. ²² Moisés micori raite: “Omoï cominimona naimie rafue lloraimana jaillena, cai Nama Jusiñamui cue isoi damiena fe-toite. Nana naimie omoïmo lluaña cacarei. ²³ Bie lloraimana bu cacarefiñenia, Jusiñamui naimiena duere finoite. Iemona faifite”. ²⁴ Nana Jusiñamui ie lloraini micoriaidi birui suille rafuena llotimaci. Samuel micori illa facaisemona naimaci buena llotimaci. ²⁵ Jusiñamuidi cai usumatiai micoriaimo rafuena llote; ia bie rafue birui omoïmo jiai duide. Jusiñamui Abraham micorimo jaie llote: “Nana cominidi o uruiái muidona caimare iitimaci”. ²⁶ Ie rafue suiñollena, Jusiñamui ie Jitona omoï dine navui orede. Omoï caimare illena, nano omoï marañedicinona fainonocaitallena, omoï dine naimiena nano jai oretate.

4

Cristo oretagamaiai llaicomini motomo illa rafue

¹ Comini diga Pedro iaimaia Juan diga ñaia facaise, Jusiñamui diga ñairainidi naie iaimaia dine bitimaci. Jusiñamui jofona sedaraini illaima diga, saduceuai railla comini diga jiai bitimaci.

² Fiodaillamona Jesús jai jilluana llofuetiaimaia. Cominina iaimaia llofua jira, naie iaimaia diga iciritimaci. ³ Iaimaia gaitajanona, jai navuilla jira, cárcelmo jonetimaci, ie jitiramo naie rafuena siadollena. ⁴ Iese suide; ia Pedro llogacinona cacadinomona ailluena comini naiena inotimaci. Cinco mil digamie creyentia jai itimaci.

⁵ Icoiti Jerusalémo nana judíuai illaicomini siadollena ofidimaci. ⁶ Anás jiai bite. Naimiedi Jusiñamui diga nanoca ñairaima. Caifás bite. Juan bite. Alejandro jiai bite. Nana Jusiñamui diga nanoca ñairaima cominidi ofidimaci. ⁷ Naimaci motomo Pedro iaimaia Juan diga atianona, iaimaiaimo jicanotimaci:

—¿Bu uai diga biena finodomico?

⁸ Jusiñamui Joreño nana Pedro comecimo namatajano, Pedro naimacimo llote:

—Illaicomini, bie rafuena omoimo lloiticue.

⁹ Tisitaitimie jilluana birui cocomo jicanotomoi. “¿Buemona naimie jillode?” raillanona cocomo jicanotomoi. ¹⁰ Jesucristo uai diga jillode. Omoi biena uiñuana, ua nana judíuai comini biena uiñuana jitaidicue. Jesucristodi Nazaret imie. Naimiena jai coraidomoi; ia Jusiñamui naimiena jai jillotate. Ie jira omoi uicomo Jesús muidona tsitaitimie jai benoconi naidaillana ciodomoi. ¹¹ Omoi jofo finoraini isoidomoi. Omoi jitaiñede noficidi jiaie nofici baifemo jai jaide. Jesúsdi naie nofici isoide. Naimie rafuena omoi jitaiñena jira, naimiena

meinetomoi. ¹² Cai jeacinomona jiaimie caina jillotanide. Nana eniruemo ite cominomona jiaimie buna jaca jillotanide. Dama Jesús caina jillotarede —llote.

¹³ Jaciruiño marefodo llofuetiaimaiai. Nainomo itino iena cacajano, comecina facadimaci: “Abina uiñoñediaimaiai. Jamai bue isoidiaimaiai”. Ie jira rajicaidimaci; iadedi Jesús llofueoicaigaiaimaiaina illana uiñotimaci. ¹⁴ Jilloitagamie iaimaiai diga naidaillana cidimaci. Ie jira naimaci uai iñede. ¹⁵ Naie rafuena siadollena, naie illaicomini iaimaiaina bai oredimaci. ¹⁶ Coninimo jicanotimaci:

—¿Niese naie iaimaiaina nibaiticai? Nana Jerusalémo itino iaimaiai siño rafuena finuana jai fididimaci. Iena janonidicai. ¹⁷ Jiaie comini iena fidii raillano, Jesús rafuena iaimaiai llofuiana rairuiticai.

¹⁸ Ie mei iaimaiaina naimaci dine dane uaidotimaci. Iaimaiaimo Jesús rafuena llofueñellena riire llotimaci. ¹⁹ Pedro iaimaiai Juan diga naimaci uai ote:

—Ie rafuena coco lollena Jusiñamui jitaide. Omoi uaina coco ñnoia, Jusiñamui jitailla rafuena finoñeticoco. Cocomo llono. ¿Bu uaina ñnoiticoco? ¿Jusiñamui? ¿Omoi? Cocomo iese llono. ²⁰ Daimaiai coco ciua rafuena lloticoco. Daimaiai coco cacaja rafuena lloticoco —raite.

²¹ Iaimaiaina jacinaitajamona, iaimaiaina jino oretatimaci. Iaimaiaina duere finoñedimaci, nainomo ite comini icirinaiñellena. Jusiñamuimo nana nainomo itinodi iobillacinona fecadimaci, tisitaitimie jai jillua jira. ²² Jai jillodimie mo

cuarenta años baifemo ite. Siño uaido naimie jillua jira, comini iobidimaci.

Naimacina Jusiñamui canollena, naimiemo j#acino

²³ Iaimaia jino jailla mei, iaimaia nabaiñiai dne jaidiaimaia. Illacomini iaimaiaimo llua llotiaimaia. ²⁴ Naimaci iena cacajano, Jusiñamuimo damie llua isoi jidimaci:

—Ore Moo, mona finodio. Eniruena finodio. Monailaina finodio. Nana naiemo ite rana jai finodio. ²⁵ Cai usuma David micorina raise uiñotica. Naimiedi ona sedadime. Naimiena bie rafuena o Joreño jaie llotatajamon, naimie llote:

¿Bue ñellena Jusiñamui diga judúaiñedino iciritimaci?

¿Bue ñellena Jusiñamuimo comini tainomo comeciaina facadimaci?

²⁶ Illacomini ofidimaci, Jusiñamui diga fuirillena. Jusiñamui facaisena iñedimaci.

Cristo facaisena jai iñedimaci

llote. ²⁷ Naie rafue birui bene suide. Bie nairaimo Herodedi, Poncio Pilato diga, judúaiñedino diga, judúai comini diga, ofide. O mare Jito Jesús facaisena iñedimaci. Naimacimo o oretagamie facaisena iñedimaci. ²⁸ Naimaci ofillamona, nana o jitaille rafuedi, o jaie lloga rafue diga, jai suide.

²⁹ Nama naimaci jaciruitajacinona jai uiñotio. Cai comeciaina ocuiñota, o rafuena jacitaiñeno cai lollesa. ³⁰ Duidinona jilloita. O mare Jito Jesús uaido caina siño rafuena finota —jidimaci.

³¹ Jusiñamuimo j#acino fuilla meinoconi, naimaci ofiracodi jaidisite. Jusiñamui Joreño

nagamíiaí comecimo namatade. Iemona Jusiñamui uai jaitaiñeno llocana jaidimaci.

Creyentíai damacina illa rafue

³² Nana creyentíai damacina itimaci. Naimacimo raruíai ia, dajena naimacimo duide. ³³ Naie facaise siño uaido naimíe oretagano cai Nama Jesús jilluana llofueuidimaci. Iemona cominidi naimacina: “Mare” raitimaci. Nagarui Jusiñamui naimacina eo canode. ³⁴ Naimaci dine buna buena jaca jitañedimaci. Ucube ollena, enirueredino imaci eniruena fecadimaci. Ucube ollena, joforedino imaci jofona fecadimaci. Ucubene atianona, ³⁵ Cristo oretaganomo fecadimaci. Ie mei dueredinomo imaci jitailla isoi fecauidimaci. ³⁶ Naimaci motomo José mameciredimíe ite. Cristo oretagano jítaca mamecidi Bernabé. Ie mameci oni dobaiñuamona firadotimíe. Naimíe nairaidi levita. Naimiedi Chipre railla uiasi imíe. ³⁷ Jerusalémo naimíe fecalle eniruedi ite. Iena fecajamona, ucube atiano, Cristo oretaganomo fecade.

5

Ananías micori ie ai micori diga Jusiñamuina jifuia rafue

¹ Naie facaise Ananías ie ai diga iaímaiaí eniruena jiaí fecade. Ie ai mamecidi Safira. ² Naie iba naimíemo dabeí fiebide. Ie ai iena uiñote. Atuedo atianona, Cristo oretaganomo fecade, “Nana ucube atidícue” raillanona. ³ Jusiñamui Joreño Pedrona naie rafuena uiñotajamona, Ananíamo Pedro jicanote:

—¿Niese Taife o comecimo namatade? Jusiñamui Joreño mo taino llotio, dabeí ucube omo fiebilla jira. ⁴ Enirue nia fecañenia, nia oie. Fecaja mei, naie ucubedi nia oie. ¿Bue ñellena o comecina maraiño facadio? Cominimo taino llotio. Jusiñamuimo tainona jiaí llotio.

⁵ Ananías bie uaina cacajano ieconi fiodaillamona oni caide. Nana iena ciodio eo jacinaitimaci. ⁶ Iemei nainomo ite conirueniaí naimiena feridimaci. Jino uillano, raiafomo jonetimaci.

⁷ Naie rafue daje amani horas illanona, naimie ai ie inimo suide rafuena uiñoño bite. ⁸ Pedro naiñaiño mo jicanote:

—¿Nie diese o fecaca o enirue? Cuesto llono.

Naiñaiño uai ote:

—Jii, ie diese coco fecaca.

⁹ Pedro jicanote:

—¿Bue ñellena Jusiñamui Joreño na jifuetomico? Ero, o ini raiafomo jonetino saisia jai nasemo cacade. Naimaci ona jiaí jino ja uitimaci.

¹⁰ Naimie ecimo ieconi naiñaiño fiodaillamona, oni caide. Conirueniaí fo billano, naiñaiño fiodaillana cioidimaci. Jino uillano, ie ini abimo dafomo jonetimaci. ¹¹ Iena fidiamona, nana creyetiaí eo jacinaitimaci. Nana bie rafuena fididinodi jiaí eo jacinaitimaci.

Cristo oretagano ailluena siño rafuena finodimaci

¹² Comini motomo Cristo oretaganodi ailluena siño rafuena finoidimaci. Naie facaise nana naimacidi Jusiñamui jofomo Salomón micori finotaga jofa abi ibirimo ofisoidimaci.

13 Jiaie cominidi jaciruillanona, naimacina nabaiñedimaci; iadedi naimacina raite:

—Cristo oretagano fue eo mare.

14 Jaciruitimaci; iadedi creyentiaina ailluena comini jaidimaci. Ailluena iñiaí, ailluena riñoniaí, diese creyentiaina jaidimaci. 15 Imaci biramo duidinona jonecaida, naisomo atidimaci. Pedro nainomo macarillano, o llotia naimie joreño naimacimo ibailamona, “Jillobiticaí” raillano, atidimaci. 16 Jerusalémo ie fuemo ite nairaiaimona comini biadedi, duidinona jiaí atidimaci. Janaba anamo ite cominina jiaí atidimaci. Nana jilodimaci. Ie isoi Cristo oretagano siño rafuena finoidimaci.

Cristo oretagano duere sefuilla rafue

17 Cristo oretagano finoca rafueri Jusiñamui diga nanoca ñairaíma eo uradoide. Nana naimie dibesimo itino jiaí eo uradoidimaci. Saduceuai railla cominimo duidimaci. 18 Eo uradoillamona, Cristo oretaganona gaitajano, cárcelmo jonetimaci. 19 Naiona Jusiñamui jaienicidi cárcel nasena econote. Cristo oretagano jino atiano, naimacina raite:

20 —Jusiñamui jofomo mai abido jai. Cominimo Jusiñamui dine naimaci ille rafuena llono.

21 Iena cacajano, monaidemo, Jusiñamui jofomo jaillano, llofuetimaci. Ie facaiseconi Jusiñamui diga nanoca ñairaíma, ie comini diga billano, danomo ofillena illaicominina uaidote. Cárcelmo policiaíaina oretate, Cristo oretaganona atillena.

22 Cárcelmo jaidemo, naimacina cioiñedimaci. Abido billanona, llotimaci:

23 —Cárcel ie nase jaca ibaicana ciodicai. Raise llaveca. Nase fuemo jaca soldaduai itimaci; iadedi econoticaimo, jaca buna cioñedicaí.

24 Jusiñamui jofo nanoca sedaraíma, Jusiñamui diga ñairaini diga, bie llwana cacajano, uainicaidimaci. Comecina facadimaci: “¿Ñie isoide rafue naimacimo jai suide?”

25 Iemo damie billanona, naimacina raite:

—Cárcelmo jonega cominidi Jusiñamui jofomo jai itimaci. Cominina jai llofuetimaci.

26 Iena cacajano, Jusiñamui jofo nanoca sedaraíma ie policías diga jibuisaide. Cristo oretaganona atide. Fecuisse atide, comini dinena policiaína noficiado fairinoi raillano.

27 Naimacina atiano, illaicomini motomo jonetimaci. Iemei Jusiñamui diga nanoca ñairaima naimacimo llote:

28 —Omoimo Jesús rafuena llofuiana rairuidicaí; iadedi nana Jerusalén cominina jai llofuetomoi. Iese omoi llofuecabia, “Cai illaicomini Jesúna meinetimaci” llotomoi.

29 Pedrodi jiaie oretagano diga uai ote:

—Jesús rafuena cai llofuiana jai rairuidomoi; iadedi omoi llua baífemo Jusiñamuina ñnoiacadicaí.

30 Cai usumatiaí micoriaí Jusiñamuina sedaudimaci. Naie Jusiñamuidi Jesúna jai jillotate. Jesúna meinellena, cruzmo coraidomoi; ia Jesúna omoi meinia mei,

31 Jusiñamuidi ie ecimo naimiena jai itatate. Cai illaimana naimiena jai itatate. Cai jilloitaraimana naimiena jiaí jai itatate. Cai judíuai comini comeciaí iuai meidollena, naimaci jeacinuai dotallena, iese naimiena itatate. 32 Bie rafuena

llofuecabiticai. Jusiñamui Joreño uaido iena jiai llofueticai. Jusiñamuina ñnotinomo Jusiñamuidi ie Joreñoa jai fecade —raite.

³³ Iena cacajano, illaicomini eo iciritimaci. Cristo oretaganona meineiacadimaci; ³⁴ ia ieconi illaicomini motomo damie naidaide. Naimie mameci Gamaliel. Moisés micori llogacinona uiuicaide. Nana cominidi naimie uaina ñnotimaci. Cristo oretaganona dallu bai oni oretajanona, naimie llote:

³⁵ —Caimaci, omoi bie cominimo omoi finolle rafuemo comeciaina raise faca. ³⁶ Jaie Teudas micori illaimana jaiacade. “Jai uaina baitimedicue” raillano, naimie dibeimo cuatrocientos iññiai jaidimaci. Iemei naimie fiodaite. Naimie micori dibeimo itinodi oni tuusite. Jai naie rafuedi jaca ieconi duide.

³⁷ Naimie micori illa mei, comini mameciaina cuiana gobernador llua facaise, Galileo ie Judas micoridi jobairiacade. Jiaie comini naimie dibeimo illena fuemo faite. Naimie jiai fiodaite. Naimie micori dibeimo itino oni tuusite. ³⁸ Ie jira ja omoimo lloiticue: Bie cominina fañonocai. Jamai cominimona naimaci llogacino iade, jamai cominimona naimaci finuacino iade, ieconi duite. ³⁹ Jusiñamuimona bie rafue ia, jaca ñiese ñibañeitomoi. Jusiñamuimona bie rafue ia, Jusiñamui diga omoi rafuedi iite.

Naimaci naimie llwana feiñuano, ⁴⁰ Cristo oretagano fo atiano, naimacina fatimaci. Naimaci Jesús rafuena llofuiana eo rairuide. Ie mei jino imacina oredimaci; ⁴¹ iadedi illaicomini illanomona Cristo oretagano caimare

jaidimaci. “Jesús dibeimo cai illa jira, caina duere finodimaci” raillano, caimare jaidimaci. Jusiñamui naie facaise naimacina riidoñena jira, jiai caimare itimaci. ⁴² Jusiñamui jofomo nagarui Jesucristo rafuena llofuetimaci. Comini jofuemo nagarui jiai llofuetimaci. “Jesúdi cai Jilloitaraíma” llofueuidimaci.

6

Creyentiaina canollena, siete digamie diáconuaina illena, fetua rafue

¹ Naie facaise ailluena comini creyentiaina jaidimaci. Uradoillamona griego uaido ñaite comini dinena, judíuai uaido ñaite cominina jeare ñaitimaci. Grieguai feciñuai judíuai feciñuai isoi nagarui rana feiñoñena jira, jeare ñaitimaci. ² Ie jira naie doce oretaganodi creyentiai danomo ofillena, nana naimacina uaidotimaci. Naimacimo llotimaci:

—Jusiñamui uaina lollena, ra fecalle diga, abi juanide. Jusiñamui uaina llofuiana cai fainonocaiadedi, maraiñede. Ra jamai cai fecaiadedi, jiai maraiñede. ³ Ie jira, amatiai, omoimona siete digamiena fetu. Inoganona fetu. Jusiñamui Joreño nana comecimo namatadinona fetu. Eo abi uiñotinona fetu. Ie isoide iñiaina fetu. Bie ra fecarainina maijuitimaci. ⁴ Ie mei cai abi juarenite, Jusiñamuimo cai jillena, Jusiñamui uaina cai llofuellena.

⁵ Nana cominidi:

—Jee —raitimaci. Esteban micorina fetodimaci. Naimie Jusiñamuina eo inote. Jusiñamui Joreño nana naimie comecimo namatade. Jiai fetodimaci:

Felipe, Prócoro, Nicanor, Timón, Parmenas, Nicolás. Nicoládi Antioquía nairai imie. Judíuai comini isoi naimiedi Jusiñamuina inote. ⁶ Fetua mei, oretagano dine atidimaci. Jusiñamuimo oretagano jia mei, fetocanomo imaci onolli jonetimaci, Jusiñamui naimacina marena itatallena.

⁷ Naie facaise Jusiñamui uaidi cominido uinotacana jaide. Jerusalémo ailluena comini creyentiaina jaidimaci. Jusiñamui diga ñairainimona creyentiaina ailluena jiai jaisite.

Esteban micori ie rafue

⁸ Esteban micori fue eo mare. Jusiñamui Joreño naimiena namatajamona, naimie uai eo siño. Comini motomo ailluena siño rafuena finouide. ⁹ Naie facaise daje judíuai comini ofiracomona damierie Esteban micori dine bitimaci. Patrón anamona jillobidinomo naie ofiraco jainaiaide. Naimaci diga damierie Cirene nairai imaci bitimaci. Damierie Alejandría nairai imaci danomo jiai bitimaci. Cilicia nairai imaci jiai bitimaci. Asia nairai imaci jiai bitimaci. Esteban conini uaina uaitatimaci; ¹⁰ iadedi naimaci uaitalle uaidi inede. Naimacimo Esteban uai isoiduaidi inede. Jusiñamuimona ie uaina ua jira, Esteban abina uinuano ñaite. ¹¹ Ie jira jiaie cominimo bainino ibajano, naimiena llogidotadimaci. Raitimaci:

—Esteban Moisés micori jinafomo jeare ñaiana cacadicaí. Naimiedi Jusiñamui jinafomo jeare ñaiana jiai cacadicaí.

¹² Iese llumona, comini comeciaina feidocana jaidimaci. Illaicomini comeciaina feidocana jiai

jaidimaci. Esteban dine billanona, naimiena gaitadimaci. Naie rafuena siadollena, naimaci ofiracomo naimie micorina uitimaci. ¹³ Tainona llogidotinona jiai atidimaci. Llotimaci:

—Bimiedi Jusiñamui jofona jeare ñaicabite. Bimiedi Moisés micori llogacino jinafomo jiai jeare ñaicabite. ¹⁴ Naimiedi Jesús bie jofona judaillena lote. Moisés micori caimo llogafuiai faionocaillena jiai lote. Iena cacadicaí.

¹⁵ Iemo nana illaicomini naimiemo eruaidimacimo, naimie uieco Jusiñamui jaienici isoi eruaide.

7

Esteban micori abi riidua rafue

¹ Jusiñamui diga nanoca ñairaima Esteban micorimo jicanote:

—¿Ua ie isoi naimaci lluacino ite?

² Naimie uai ote:

—Caimaci, cacarei. Cai jaiagaimona cai fueollena, naimaci micoriaina lloiticue. Jusiñamui maremiena jira, naimiedi cai eirue jitomo jaie bairede. Cai eirue jitodi Abraham micori. Mesopotamiamo naimie micori nia ia, Harámo naimie micori nia jaiñenia, Jusiñamuidi naimie micorimo bairiano ³ lote: “O eniruemona mai jai. O cominimona mai jai. Omo cue acatalle eniruemo jaitio”. ⁴ Ie jira Caldea railla eniruemona naimie micori jaide. Harámo rillanona, diga iruillai nainomo ite. Naimie moo micori fiodailla mei, omoi birui illa eniruemo Jusiñamui naimie micorina oretate. ⁵ Nainomo rillanona, Jusiñamuidi naie enirue naimie

mīcorimo fecañede. Ua janore jisa fecañede; iadedi: “Omo iena ico fecajiticue” raite. “O uruiaimo fecajiticue” jiai llote; iadedi naie facaise Abraham mīcori uruenide. ⁶ Jusiñamui jiai llote: “O uruiái jiaie comini eniruemo jaianiitimaci. Egiptomo jaianiitimaci. Naimacina duere finoitimaci. Cuatrocientos años llegi cacajitimaci. ⁷ Naimacina maijitaite nairaina duere finoiticue. Ie mei o uruiái naie eniruemonā biitimaci. Bie illanomo cuemo iobillacinona fecajitimaci” llote. ⁸ Ie cominina naimaci jaillena, Jusiñamui Abraham mīcorimo isaiaí diese abina diana llote. Ie facaise Abraham mīcori Isaac mīcorina comuitate. Ie jeiciamona ocho digarui illamona, Abraham mīcori naimie mīcorina dete. Isaac mīcori Jacob mīcorina comuitate. Jacob mīcori doce uruiaina comuitate. Naimaci mīcoriaimona cai doce diga nairai comuidimaci.

⁹ Caimaci, José mīcorina Jacob mīcori uruiái mīcoriaí uradoillamona, Egipto cominimo naimiena fecadimaci; ¹⁰ iadedi Jusiñamui naimiena eo sedade. Ie llegi ie cacajamona naimiena jillotate. Naimiemo uiñoracinona fecade. Ie jira Faraón mīcori naimiena jiai gaide. Faraón mīcoridi Egipto illaíma. Ie muidona Faraón Joséna fetode, nana Egiptomo itinona sedallena. Ie jofona jiai sedatate. ¹¹ Naie facaiseconi nana Egipto comini aime guitimaci. Canaámo Jacob mīcori illanona, nana nainomo itino diga aime jiai guite. Eo duere sefuidimaci. Cai usumatiaí mīcoriaí naimaci illanomo guillena baiñedimaci. ¹² Egiptomo guille illana Jacob mīcori fidiano, guille ollena, nano facaise ie uruiái mīcorina

nainomo oretate. ¹³ Ie mei José ie amatiaina naimiena uiñotade. Faraóndi José comini illana fidide. ¹⁴ Ie jira Josédi ie moona uaidote. Nana ie comina uaidote. Setenta y cinco digamie ite. ¹⁵ Ie jira Egiptomo Jacob micori jaide. Nainomo fodaite. Ie uruiái micoriái nainomo jiaí fiodaitimaci. ¹⁶ Siquem raila nairaí illanomo naimaci comini naimaci micoriaina uillano, nofici ie raiafomo jonetimaci. Siquemmo Abraham micori naifona Emmor uruiái micoriaimona jaie ibade.

¹⁷ Caimaci, Jusiñamui Abraham micorimo lloga rafue suille iaírei illa facaiseconi, Egiptomo cai cominidi eo jebuidimaci. Abraham micorimo: “Egiptomona o uruiái biitimaci” Jusiñamui jaie llote. ¹⁸ Naie facaise jiaie illaíma Egiptona sedade. José micorina uiñoñede. ¹⁹ Ie jira cai comina jifuiano maijitaude. Uruiái fiodaillena, naimacina imaci uruiaina fainonocaitate. ²⁰ Ie facaiseconi Moisés micori jeiciga. Jusiñamui mona naimie micori eo ebire eruaide. Ie moo jofomo daje amani fivui ite. ²¹ Ie mei naimiedi fainonocaiga. Faraón jisa micoridi naimie micorina uanona, naiñaiño jito isoi naimie micorina uiuicaide. ²² Naimie micori nana Egipto comini uiñuacinona fueote. Illaíma uai isoi naimie uaidi ite. Eo abina uiñotimie.

²³ Caimaci, naimie micori cuarenta años illa facai, ie comini dine ie jaille mo ie comecina facade. Naimie cominidi cai judíuai comini. ²⁴ Egipto imiemona damie legi cacajana ciuano, naimiena riidote. Riiduanona, Moisés micoridi Egipto imiena meinete. ²⁵ Moisés micori comecina facade: “Cue muidona Egiptomona Jusiñamuidi

cue cominina oretaitē”. “Cue comini biena uiñotimaci” raillanona comecina facade; ie iadedi iena uiñoñedimaci. ²⁶ Ie arediruido Moisés micoridi mena come iaiaiaia fuirillana ciode. Iaiaiaina marena itataiacade. Raite: “¿Bue ñellena conimana duere finoacadomico? ¿Bue ñellena o come diga fuiridomico?” ²⁷ Duere finoacadimie naimiena oni ñuitade. Jicanote: “¿Bu odi cai illaimana jonegao? ¿Bu caimo ona llotatate juez isoi? ²⁸ ¿Na are Egipto imie o meinia isoi cuena jiaimeineiacadio?” ²⁹ Iena cacajano, come fajana naimie llinua jira, jacinailanona, Moisés micori aiside. Madián railla eniruemo jamai ua illafuena ite. Dinomo ie aina ua mei, nainomo mena jitona comuitate.

³⁰ 'Caimaci, cuarenta años illa mei, jofue iñenanomo Moisés micori illanona, Jusiñamui jaienici naimie micorimo bairede. Sinaí railla anedu ianori ite. Amena boua isoi amenamo bairede. Naie boode amenadi fuiñede. ³¹ Iena ciuano, Moisés micori rajicaide. Naie iaireise naimie micori jibuisaidemo, naimiemo Jusiñamui llote: ³² “O usumatiaia imaci Jusiñamuidicue. Abraham, Isaac, Jacob, imaci Jusiñamuidicue” llote. Jacinaillamona Moisés micori abi docaide. Jaciruillanona, erodañede. ³³ Jusiñamui naimiena raite: “Jamai bue o isoilla jira, o zapatona duiño. Benomo cue illa jira, o naidaillanodi eo mareno. ³⁴ Egiptomo cue comini legi cacajana raise ciodicue. Naimaci duere sefuillana uiñoticue. Ie jira omo bairedicue, naimacina Egiptomona jilloitallena. Mai jai. Egiptomo ona oretaiticue” llote; ³⁵ iadedi comini dinena Moisés micorina jaie jitaiñenamona, naimiena raitimaci: “¿Bu

illaimana odi jonegao? ¿Bu o juezna jonegao?” Comini dinena naimiena jitaiñedimaci; iadedi Jusiñamui naimiena illaimana itatate. Naimiena Egiptomona cominina jilloitaramana jiaí itatate. ³⁶ Egiptomona Moisés naimacina atide. Egiptomonia ia, diga siño rafuena finode. Jiairede monaillai fuemo naimaci rillanona, siño rafuena jiaí finode. Jofue iñenanomo cuarenta años siño rafuena finocana jaide.

³⁷ Caímaci, Moisés micoridi cai judíuai cominimo llotete: “Omoimona Jusiñamuidi damiena ie rafue lloraimana ico oretate, naimie cuena oretaja isoi”. ³⁸ Jofue iñenanomo naimaci ia, Moisés Jusiñamui jaienici diga anedumo ñaite. Anedu mamecidi Sinaí. Iemei cai usumatiaí micoriaí diga naie jaienici facaina Moisés ñaite. Caimo fecallena, naimiedi cominina itatate uaina feiñote; ³⁹ iadedi cai usumatiaí micoriaí naimiena ñnoiacaíñedimaci. Naimiena jitaiñedimaci. Egiptomo abido jaillemo naimaci comeciaí facadimaci. ⁴⁰ Ie jira comini dinena Aarón micorimo llotimaci: “Egipto eniruemona Moisés caina atide; iadedi naimie cai diga illana ja uiñoñedicaí. Cai facaina Jusiñamuina eruaide jiraraina fino, Egiptomo abido caina ifollena”. ⁴¹ Iemo jurareta urue joreña finodimaci. Iena sedallena, faga toica ocainaiaina fecadimaci. Naimaci finoca rafueri eo caimataidimaci. ⁴² Ie jira Jusiñamui naimacimona oni jaillanona, naimacina fañonocaide. Iemona jitomana sedauidimaci. Fivuína jiaí sedauidimaci. Ucuaina jiaí sedauidimaci. Jusiñamui rafue lloraima ie rabenicomo biena jaie iese ciega:

Jusiñamui llote: “Judíuai imaci, cuarenta años jofue iñenanomo omoi ia, cuemo omoi faga toica ocainaiaí fecañedomoi;

⁴³ iadedi cuemo omoi comeciaina facañeno Moloc railla jiraraina sedadomoi.

Refán railla ucuduna jiaí sedadomoi.

Naimacina sedallena, jiraraina finodomoi.

Ie jira Babilonia nairai baifemo omoína ore-taiticue”

cuega. Naie facaise cai usumatiaí micoriaí Jusiñamuina jitaiñedimaci.

⁴⁴ 'Caimaci, bie rafuena cai fueollena, cai usumatiaí micoriaí motomo Jusiñamui illana lloiticue. Jofue iñenanomo cai usumatiaí micoriaí motomo daje jofu aillocona nitimaci. Nainomo Jusiñamuina sedallena, Jusiñamui Moisés micorimo acataja isoi, iena nitimaci. Jusiñamui jaie cuega noficidi naicomo eenoga. ⁴⁵ Josué diga bie eniruemo naimaci billa facaise, cai usumatiaí micoriaí naicono atidimaci. Bie enirue jiaie nairaiaimo jainaiaide; iadedi Jusiñamui naie nairaiaina dotajano, cai usumatiaí naie eniruena bairodimaci. Naico nainomo ite David micori facaiseconi. ⁴⁶ Jusiñamui David micorina eo canode. Ie jira David micoridi cai usuma Jacob micori ie Jusiñamui jofona finollena jicanote: ⁴⁷ ia Salomón micoridi jofona Jusiñamui iena finode;

⁴⁸ iadedi Jusiñamuidi ima finoca jofomo i-iñede. Jusiñamui facaina lloraima micoridi Jusiñamuina iese cuete:

⁴⁹⁻⁵⁰ Cai Nama raite: “Monamo cue illamona, nana comini cue anamo itimaci.

Jafaici oticuedena, naga rana cue finua jira, nain-omo cuena omoi sedallena, nie isoide jofona omoi finuana jitaiñedicue” raite.

⁵¹ 'Ero, omoi comeciai jaiarede. Omoi comeci ñnoñede. Jefonidomoi isoidomoi. Ie jira Jusiñamui Joreño anamo iacaiñedomoi. Omoi usumatiai micoriai isoi itomoi. ⁵² Omoi usumatiai micoriaidi nana Jusiñamui rafue lloraima micoriaina duere finodimaci. Mareuidimie billena llotinona meinetimaci. Mareuidimiena gaitatatomoi. Naimiena jai meinetomoi. Jesuna ñaiticue. ⁵³ Jusiñamui jaieniciaimona Moisés micori llogacinona feiñotomoi; iadedi iena ñnoñedomoi.

Judúuai Esteban micorina meinia rafue

⁵⁴ Esteban llofuiana naimaci cacajano, eo iciritimaci. Icirillamona, isiduai muru-muru raite. ⁵⁵ Jusiñamui Joreño nana Esteban micori comecimo namatajamona, monamo eruaillano, naimiedi Jusiñamui ebirenana cide. Naimiedi Jusiñamui nabeimo Jesús naidaillana cide. ⁵⁶ Raite:

—Mona ecuaillana ciodicue. Jusiñamui Jito Jusiñamui nabeimo naidaillana ciodicue.

⁵⁷ Esteban lluaana cacajano, jefo oroisite. Eo cuirillano, naimie dine aisicaidimaci.

⁵⁸ Jerusalémona naimiena jino dotadimaci. Naimacimo ite emodomo itiroina duiñuanona, Saulo railla conirue ecimo iniroina joneside. Iemei Estebana noficido fairinoside. ⁵⁹ Estebana nofici diga fairinuano, Estebadi Jusiñamuimo ado jide:

—Cue Nama Jesús, cue joreño feiño.

⁶⁰ Ieconicaiñici ifodo rainadacaida ado jide:

—Naimaci bie jeacino finua muidona, ibana oñeno.

Iese naimie jia mei, fiodaite.

8

Saulo creyentiaina duere finua rafue

¹⁻² Saulo dinena Esteban meiniana jia jitaide. Cristo rafuena eo inotonomona damerie Esteban micori raiafomo jonetimaci. Eiamona naimacimo uillinoci eo ite. Nairui Jerusalémo ite creyentia duere sefuilla facaiseconi tainede. Nana comini tuficaida jaidimaci. Judea railla eniruemo jaidimaci. Jia nodi Samaria railla eniruemo jaidimaci; iadedi Cristo oretagano nine jaiñedimaci. ³ Ie facaiseconi Saulodi creyentiaina eo duere finode. Diga jofomo jamai jaillano, iñiaina gaitade, cárcelmo jonellena. Riñoniaina jia gaitade.

Felipe Samariumo illa rafue

⁴ Tuficaida jaidino naga illanomo Jesús rafuena llocana uitimaci. ⁵ Samariumo Felipedi daje nairaimo jaide. Nainomo Cristo rafuena llofueuide. ⁶ Ailluena cominidi Felipe llofuiana eo raise feiñotimaci, naimie siño rafuena finua jira. ⁷ Felipedi diga jananiai anamo ite cominimona jananiaina oretate. Riire cuirioillano, jaidimaci. Ailluena tsitaitinona jillotate. Ailluena ñujanujacaidinona jia jillotate. ⁸ Ie jira naie nairaimo ite comini eo iobidimaci.

⁹ Naie nairaimo Simóna mameciredimie ite. Naimie siño rafuena finouide. Iemona Samaria cominina rajicaitade. Naimie raite:

—Siñomiedicue.

¹⁰ Nana comini naimiena innotimaci. Abina uinoñedino innotimaci. Abina uinotino jiai innotimaci. Raitimaci:

—Naimie uaidi Jusiñamui ie. Naimiedi siño jito —raitimaci. ¹¹ Iese naimacina are jifuate. Naimaci rajicailla jira, naimaci naimiena cacadimaci. ¹² Ie mei Felipe Cristo ie mare rafuena llote. Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meiduana llote. Naimaci Felipe llofuiana innotimaci. Inuamona, Felipe naimacina bautizade. Iñiaina bautizade. Riñoniaina jiai bautizade.

¹³ —Jiai innoticue —Simón di raite. Naimie bautizaja mei, Felipe diga jaoicaide. Felipedi diga siño rafuena finua jira, Simón naiena ciuano, rajicaide.

¹⁴ Jerusalémo ite Cristo oretaganodi, Samaria comini Jusiñamui uaina feiñuana cacajano, Pedro, iaimaiai Juan diga, batine oredimaci. ¹⁵ Iaimaiai rillano, naimaci Jusiñamui Joreña feiñollena Jusiñamuimo jidiamaiai, ¹⁶ naimacimo Jusiñamui Joreño nia iñena jira. Cai Nama Jesús facaina jai bautizadimaci; ia Jusiñamui Joreña nia feiñoñedimaci. ¹⁷ Ieconi iaimaiai onolli naimacimo joniano, Jusiñamui Joreña feiñotimaci.

¹⁸ Naimaci Jusiñamui Joreño feiñuana Simón di ciuano, ucubena iaimaiaimo fecacade. ¹⁹ Raite:

—Cuemo omico uaina ine, bumo cue onollina cue joniamona, naimie Jusiñamui Joreña feiñollena.

²⁰ Pedro dinena uai ote:

—O ucube diga o faifisa. Ucube diga Jusiñamui fecaca uaina ibaacadio; iadedi Jusiñamui naiena

jamai fecade. ²¹ Bie rafuedi omo duiñede. Jusiñamuimona o comeci nia maraiñede. ²² O comeci iuai meido. Naimie o comecimo ite maraiñede facajacinuaina oni dotallena, cai Namamo jica. ²³ Omo ailluena maraiñedicino illana uiñoticue. O comeci eo uradoide. Maraiñedicinona o comecimo namaredio.

²⁴ Simón uai ote:

—O llua cuemo suiñellena, o Nama diga cue facaina ñaino.

²⁵ Cristo rafuena iaímaiaí llua mei, Jerusalémo abido bitíiaímaiaí. Abido billano, Samariamo diga comini illanuaímo Jesús ie mare rafuena llocana bitíiaímaiaí.

Etiopía imie creyentena jailla rafue

²⁶ Naie facaise Jusiñamui jaíenisaímona damie Felipemo llote:

—Beicido joide naído mai jai. Jerusalémona Gazamo joide naísona jai —llote. Naie naíso jofue iñenanodo joide. ²⁷ Ie jira jaide. Jusiñamuina sedajamona, naie facaise Etiopía enirue imie Jerusalémona bite. Etiopía illaiño diga maijuide. Naiñaiño mamecidi Candace. Naimiedi nana naiñaiño gobierno ucubena sedade. ²⁸ Naimie jai abido jaillano, ie carretamo raíta, Isaías micori cuela rabenicono ado facade. ²⁹ Jusiñamui Joreño Felipemo llote:

—Naimie dine iaírei jai. Carreta dine jai.

³⁰ Naimie dine Felipei aisicana jaillanona, rabe ado facajana cacade. Felipe dinena naimiemo jicanote:

—¿O facaca rabenicono uiñotio?

³¹ Naimie uai ote:

—¿Ni ese uññoitícue, bu cuena canoñenia?

Felipemo jìcanote, naimie diga a jaillano danomo raillena.

³² Naimie facaca cuegafue iese raite:

Toica llauda fallena uilla isoi, naimiena uitimaci.
Toica llauda itirai garedino dine eeñena isoi,
naimie ñaiñede.

Ie abina riidollena, uaina oñede.

³³ Maraiñede rafuena naimie finoñede; ia naimiena duere finodimaci.

Naimie uruiái iñededí, ¿bu naimie rafuena lloite?

Meinia meinocóni, naimie jai iñede.

³⁴ Etiopía imie Felipemo jìcanote:

—¿Bie lloraima bu iena llote? ¿Dama naimie iena llote? ¿Jiaimiena iena llote? Cuemo llono.

³⁵ Iemei Felipedí bie cuegafuimona naimiemo Jesús ie mare rafuena llote. ³⁶ Naisona jaidiaimaiaimo, jinui illanomo ridiaimaiaí.
Etiopía imie dinena raite:

—Ero, bie jinui itemo, ¿bue ñe cuedi bautizañellicue?

³⁷ Felipe uai ote:

—O comecimona o ññoia, cuemona mare.

Naimie uai ote:

—Jesucristodí Jusiñamui Jitonana ñnoticue.

³⁸ Naimie ie carreta jorodate. Iemei jinui dine jaidiaimaiaí. Felipedí naimiena bautizade.

³⁹ Jinuimona iaiaiaí bia, Jusiñamui Joreño Felipeña oni uite. Etiopía imie Felipeña dane cioñede; iadedí Etiopía imie iobicana jaide.

⁴⁰ Jusiñamui Joreño Azotomo Felipeña uite. Cesarea dine naimie jaillanona, naga nairaiaimo Jesús ie mare rafuena llocana uite. Ie mei Cesareamo ride.

9

*Saulo creyentena jailla rafue
(Hch 22.6-16; 26.12-18)*

¹ Naie facaise Saulo cai Nama Cristona ñnotinona eo duere finoacade. Icirillamona, naimacina meineiacade. Ie jira Jusiñamui diga nanoca ñairaima dine jaide. ² Judíuai comini naie ñairaima anamo illamona, creyentiaina duere finollena, Saulo cartana naimiemo jicajaide. Damascomo ite judíuai ofiracuaimo dajerie cartana uiacade. Naie ofiracuai sedaraini naimie canollena jitaide. Jesucristona ñnotinona naimie baia, naimacina gaitajano, Jerusalémo atillena, naimiena canollena, cartana jitaide. fiñiai baia, riñoniai baia, naimacina Jerusalémo atiacade. ³ Cartana ua mei, naimie jaillano, Damascomo iaie ia, ieconi monamona damie naimie abina quetiñote. ⁴ Eniruemo naimie ana uaillano, monamona damie naimiemo llwana cacade:

—Saulo, Saulo, ¿bue ñellena cuena duere finodio?

⁵ Naimie uai ote:

—¿Budío?

Monamona damie raite:

—Jesúdicue. Cuena duere finodio. Iemona o abina duere finodio, riicaillamona raise maiga jurareta suiñoacana isoi. Ie isoidio. Riicaillamona, cuena duere finoacadio. ⁶ Naidacai. Damascomo mai jai. Nainomo o finolle rafue omo lloiticue.

⁷ Saulo diga jaidinodi ñaiñeno naidaidimaci. Naie uaina cacadimaci; iadedi buna cioiñedimaci. ⁸ Ieconi Saulo naidacaide. Ie uisi ecoricaillamona, erodatemo, jai buena cioiñede. Ie onollina llinocaida, naimiena Damascomo uitimaci.

⁹ Darui amani cioiñede. Jusiñamuimo comecina facajamona, guiñede. Jiai jiroñede.

¹⁰ Damascómo Ananiana mameciredimie ite. Naimiedi creyente. Inñenamona, Ananías nicairilla isoi cacaillena, Cristodi naimiemo rafuena llote:

—Ananías.

Naimie uai ote:

—Jii, bene iticue.

¹¹ Cai Nama Cristo naimiemo llote:

—Naidacai. Atona joide railla naisona jai. Judas ie jofomo jai. Naicómo Tarso ie Saulona jicano. Naimie cuemo jai jüide. ¹² Naimie damiena jai nicairite isoide. Ananiana mameciredimiena nicairite isoide. Ona nicairite isoide. Naimie dine o jaillena ona nicairite isoide. Naimiemo o onolli joniamona, naimie dane ciuana nicairite isoide.

¹³ Ananías uai ote:

—Nama, diga cominimona naimiena fididicai. Jerusalémo naimiedi marañede rafuena ona ñnotinomo finode. ¹⁴ Jusiñamui diga nanoca ñairaima uai naimiemo ite, nana bene ite creyentiaina gaitallena.

¹⁵ Cai Nama naimiemo llote:

—Mai. Naimie jai cue fetoca, judíuaiñedinomo cue rafuena llollena, illaicominimo cuena llollena, judíuai cominimo cue rafuena jiai llollena.

¹⁶ Cuen naimie jai ñnua muidona, naimie nie isoi legi cacajite. Naimiemo iena lloiticue.

¹⁷ Ie jira Ananías naie jofomo jaide. Ie onolli Saulomo joniano, raite:

—Saulo, jai cue amana jai itio. Naisómo cai Nama Jesús omo jai bairede. Naimie cuena o dine orede, dane o cioillena, Jusiñamui Joreño nana o comecimo namatallena.

18 Ieconi Saulo uisimona lliciai ico isoide ra uaide. Dane ciuana, naidaide. Ie mei jai bautizaga. 19 Ie mei jai guite. Dane mañride. Diga irui Damasco mo ite creyentiai diga naimie ite.

Damasco Saulo illa rafue

20 Judíuai ofiracomo naimie jaillanona, Jesús ie rafuena llofujete. “Jesúdi Jusiñamui Jito” raillanona llofujete.

21 Nana naimiena cacadinodi rajjicaide. Raitimaci:

—Bimie Jerusalémo Jesúsna ñnotinona duere finouide. Naimacina gaitallena, Jusiñamui diga nanoca ñairainimo uillena, naimie bene bite; ia Jesús díbeimo jai ite.

22 Saulo nagarui jaitaiñeno llofuiamo fibioicaide. Llofueuide:

—Jesúdi cai Jilloitaraima. —Naimie raise llofua jira, judíuai ñnena iena uaitanidimaci.

23 Digarui illa mei, judíuai comeciaina facadimaci, naimiena meinellena. 24 Naimie aisi raillano, aremona nairai nasiaina sedadimaci. Naiona nasiaina jiai sedadimaci, naimiena meinellena; iadedi Saulo iena fidiano, 25 naiona creyentiai naimiena oni uitimaci. Naimie jillobillena, llaigafu jinofebeimo cirigaimo rainajanona, naimiena ana ñuitadimaci.

Jerusalémo Saulo illa rafue

26 Jerusalémo naimie jaide. Naimie ria, creyentiaina nabaiacade; ia naimiena jaciruitimaci. Creyentena naimie jaillana ñnoñedimaci. 27 Ie jira Bernabé naimiena Cristo oretagano ñne uillano, naimacimo naiso motomo Saulo cai Namana ciuana llote. Naiso motomo

cai Nama Saulomo lluana jiaí llote. Damascomo naimie ia, Jesúna jacítaiño llofuiana jiaí llote. ²⁸ Ie jira Saulona nabaidimaci. Jerusalémo jaisoillanona, cai Nama ie rafuena jacítaiño lloouide. ²⁹ Iena cacajanona, griego uaina ñaite judíuaidi naimie llofuiana uaitatimaci. Naimiena meineiacadimaci. ³⁰ Creyentiaí iena fidiano, Cesareamo Saulona uitimaci. Ie mei Tarsomo naimiena oredimaci.

³¹ Judeamo, Galileamo, Samariamo nana creyentiaí uri itimaci. Cai Namana ñinocana jaidimaci. Cai Namana jaciruoicaida jaidimaci. Jusiñamui Joreño naimaci comeciaina eo ocuiñotade. Ailluena comini creyentiaína jaidimaci.

Eneas jillua rafue

³² Naie facaise diga illanuaímo Pedro macarite. Lidamo ite creyentiaí dine ride. ³³ Nainomo damie bíramo bídena cide. Naimiedi Eneas. Ocho años tsitaillamona bíde. ³⁴ Naimiena ciuano, Pedro naimiemo llote:

—Eneas, Jesucristo ona jai jillotate. Mai naidacai. O bíra ferí. —Ieconí naimiedi naidadate. ³⁵ Nana Lidamo ite comini, nana Sarónmo ite comini diga, naimiena jilluana ciuanona, creyentiaína jaidimaci.

Fiodaillamona Dorcas jillua rafue

³⁶ Jopemo Tabitana mamecirediñaíño ite. Griego uaimona oni dobaíñuamona naie mameci Dorcas. Naiñaíño creyente. Ailluena mare rafuena finouide. Ailluena duerede comina canouide. ³⁷ Naie facaise naiñaíño duicotaide. Ie mei fiodaite. Naimaci einamaci finua isoi, ie

nabaiñiaí naiñaiño abina jocodimaci. Iemei aneba ie cuartomo naiñaiño na jonetimaci. ³⁸ Lidamona Jope iaire ite. Pedro Lidamo creyentiaí illana fidiano, menamie naimie dine oredimaci. Iaimaiana llotatimaci:

—Buena sedaño cai dine raire bi.

³⁹ Ie jira Pedro naidacaida, naie iaimaiaí diga jaide. Naimie ria, aneba ie cuartomo naimiena uitimaci. Nana feciñuaí Pedro ecimo eecana naidaidimaci. Dorcas finouiga iniroina naimiemo acatatimaci. ⁴⁰ Dorcas finouiga rafuena Pedro fidiano, Pedro nana naimacina jino orede. Caiñici ifodo naimie raita, Jusiñamuimo jide. Abido dobaicaida, naiñaiño erodate. Raite:

—Tabita, mai rainaicaí.

Ieconí naiñaiño uisi oni erodate. Pedrona ciuano, a rainadate. ⁴¹ Naiñaiño onolli llinuanona, a naidanete. Ie mei Pedroí feciñuaína, jiaie creyentiaí diga, uaidote, naiñaiño jai cajenana naimaci ciollena. ⁴² Nana Jopemo ite comini naie rafuena fididimaci. Ie jira ailluena comini cai Namana inotimaci. ⁴³ Jopemo Pedro diga irui Simón jofomo ite. Simóní ocaina igoína cuidoraíma.

10

Cornelio comeci iuai meidua rafue

¹ Cornelio raillamiedi Cesareamo ite. Naimiedi capitán. Italia mona bite soldaduaí naimie anamo itimaci. ² Naimiedi Jusiñamui llogacínodo jaide. Nana ie comini diga Jusiñamuina inote. Judíuaí cominimo ailluena rana jamai fecauide. Jusiñamuimo jiuide. ³ Jitoma ana ia, naimiemo jai

nicañilla isoi ite. Naimiedi Jusiñamui jaienicina naimie dine billana ciode. Jaienicidi uaidote:

—Cornelio.

⁴ Naimiena Cornelio jaciruoicaida eruaide. Jicanote:

—Nama, ¿buena jitaideo?

Naimie uai ote:

—Jusiñamui o jiaacuina jai cacade. Jusiñamuidi duerede comina o canuana jiai feitañede. ⁵ Mai, Jopemo damerie o mullaiaimona oreta, Simón raillamiena atillena. Naimie jiaie mamecidi Pedro. ⁶ Naimiedi igoi cuidoraïma jofomo ite. Naie cuidoraïma mamecidi Simón. Monailai fuemo naimie jofu ite.

⁷ Jusiñamui jaienic jaiïa mei, Corneliodi ie mullaiaimona mena uaidote. Naimie anamo ite soldaduaimona damie jiai uaidote. Naie soldadodi Jusiñamuina jiai ñnote. ⁸ Nana naimiemo Jusiñamui jaienic lluana naimacimo llua mei, Jopemo oretate. ⁹ Ie are naimaci jaillano, Jopemo ianori riacanano, jitoma naidai ia, jofu emodomo Pedro jaide, Jusiñamuimo jillena. ¹⁰ Naimie aimetaite. Guiacade. Guillena comini finodemo, naimiemo nicañilla isoi ite. ¹¹ Mona oni econuana ciode. Aillue sávana isoi, buena ana billana ciode. Eniruemo naga muiduedo maigado ana bite. ¹² Naiemo jiaïforie eruaide ocainai ite. Diga eniruemo jorode ranaï ite. Diga nuicinai jiai ite. Nana Moisés micori fimaidoga rille radi ite. ¹³ Naimiedi monamona damie lluana cacade:

—Pedro, naidacaida, fajano, buena rino.

¹⁴ Pedro uai ote:

—Nama, dama ite. Moisés micori fimaidoga rille rana jaca riñedicue.

15 Monamona damie lluaana dane cacade:
—Jusiñamui jai fimaidoñede. Ie jira iese lloñoeno.

16 Dacaiño amani iese suide. Ie mei naie radi monamo abido jaide.

17 Pedro ie comecina facade: “¿Ñiese illana cidicue?” Ie daacaiño Cornelio oretagano bite. Simon illa jofo jicanuano, naie nasemo ride.

18 Simón Pedrona naie jofomo illana jicanotimaci.

19 Pedro ie nicairillana isoidemo comecina facajano, Jusiñamui Joreño naimiemo llote:

—Ero, daje amani ñima ona jenode.

20 Naidacaida, ana jai. Naimaci diga buena sedañoeno mai jai. O dine naimacina oredicue.

21 Pedrodi comini dine ana jaide. Raite:

—Omoi jenocamedicue. ¿Bue ñiaibitomoi billa?

22 Uai otimaci:

—Cornelio raillamie anamo iticai. Cornelio mo Jusiñamui jaienici birui llote: “Pedro dine damieriena oreta, naimiena o jofomo atillena. Jusiñamui rafuena raise cacaillena, naimiena ati” llote. Corneliodi capitán. Naimiedi mareuidimie. Jusiñamuina ñinotimie. Nana judíuai comini dinena naimiedi mareuidimie.

23 Iena Pedro cacajano, naimie jofomo ñillena naimacina fo uaidote. Ie are naimaci diga jaide. Damierie Jopemo ite creyentiai naimie diga jiai jaidimaci. 24 Ie are Cesareamo ridimaci. Cornelio naimaci billemo ocuride. Nana ie cominina jai uaidote. Ie nabaiñiai jiai jai uaidote. 25 Pedro fo jaia, Cornelio dinena naimiena uaidote. Pedro anamo bitadate, Jusiñamuimo fecaja isoi Pedromo iobillacinona fecallena. 26 Pedrodi naimiena a naidanete. Raite:

—Mai a naidada. Cue jiai jamai ñimadicue.

²⁷ Naimie diga ñaiano fo jaidiaimaia. Ailluena comini ofillana ciode. ²⁸ Naimacimo llote:

—Moisés micori judío imie judíuñedimie nabairillana rairuide. Iena uiñotomoi. Judíuñedimie jofomo illana jiai rairuide. Ie areruido Jusiñamui nicailla isoidifuenta cuemo acatate. Iemona jai fueotícue. Jiaie nairai diga cue nabairillena, Jusiñamui mona marenana jai uiñotícue. Jusiñamui omoina cue jearuillana jai jitañede. ²⁹ Ie jira buena sedaño bitícue, cuena o uaidua jira. ¿Bue ñellena cuena uaidotomoi? Cuemo llono.

³⁰ Cornelio uai ote:

—Nairui nagaamagarui illa meinomo, bie hora cue jofomo Jusiñamui jidícue. Ieconi Jusiñamui jaienici cuemo bairede. Naimie iniroi quenirede. ³¹ Cuena raite: “Jusiñamui o jiana cacade. Naimiedi duerede cominina o canuana feitañede. ³² Ie jira Jopemo damieriena oreta, Simón Pedrona uaidollena. Jiaie Simón jofomo ite. Simóndi igoi cuidoraíma. Ie jofo monaillai fuemo ite”. ³³ Iemona ona uaidotícue. O comeci marena jira, bene bitío. Jai nana bene itícaí. Jusiñamui caí diga jiai ite. Caí Nama nana omo lluana cacareillena, bene itícaí.

Corneliomo Pedro llua rafue

³⁴ Pedro uai ote:

—Jusiñamui nana comini naimie inuana jitaillana jai uiñotícue. ³⁵ Naga nairaimona Jusiñamuidi cominina jai jitaide. Bu naimiena inoia, bu mare rafuedo jaia, Jusiñamui naimiena jai jitaide. ³⁶ Caí judíuai cominimo Jesucristo llumona, Jusiñamui dibeimo caí illena jai uiñotícaí. Iemona Jusiñamui diga caí uri illana jai

jiaí uifnoticai. Jesúsdi nana cai Nama. Bie rafuena navui janore fididomoi. ³⁷ Nana Judeamo bie rafue llocana jai jaide. Juan micorí bautizajana llua mei, Galileamo Jesús naimie llofuiana tainede. ³⁸ Jusiñamuidi ie Joreñona Jesúsno fecade. Jesúsdi Nazaret imie. Naimiemo ie uaina jiaí fecade. Ie jira Jesús mare rafuena finocana uite. Jusiñamui naimie diga illa jira, diga Taife anamo itinona jillotate. ³⁹ Judíuai eniruemo nana naimie siño finoca rafuena ciodicai. Iena birui llocabiticai. Cruzmo jonianona, cai illaicomini naimiena meinetimaci; ⁴⁰ iadedi darui amani illa mei, Jusiñamui naimiena jillotate. Jusiñamui jitailla jira, Jesús jillua mei, ailluena comini naimiena ciodimaci. Cajedimiena ciodimaci. Jiaí ciodicai. ⁴¹ Nana comini naimiena cioifnedimaci; iadedi Jusiñamui fetocano diese naimiena ciodimaci. Fiodaillamona naimie jillua mei, naimie diga guiticai. Naimie diga jamai jirodicai. Naimiena cai raise uifua jira, Jusiñamui caina fetode, naie rafuena llolena. ⁴² Cominimo bie rafuena llua caimo llote. Jusiñamui Jesúsna jai fetode, naimiena ifnoifnedinona duere finollena. Nia fiodaifnedinona duere finoite. Jai fiodaitinona jiaí duere finoite. Ie jira Jesús rafuena llocana jaidicai. ⁴³ Jesús muidona naga naimiena ifnotimie ie maraifnedicinodi Jusiñamui dotalle. Iena nana Jusiñamui facaina lloraini micoríai jai llotimaci.

Judíuaiñedino Jusiñamui Joreñona feifua rafue

⁴⁴ Pedro biena nia llofueia, Jusiñamui Joreño nana bie rafuena cacadinomo bite.

⁴⁵ Iena cianona, Pedro diga bite creyentíai

raijicaidimaci. Naimacidi judíuai comini. Judíuaiñede cominimo Jusiñamui ie Joreño jai fecaja jira, raijicaidimaci. ⁴⁶ Jusiñamui Joreño naimacimo illamona, judíuaiñedinodi jiaie nairai uailaido ñaitimaci. Naie ñaia uailaina uiñoñedimaci. Jusiñamuimo iobillacinona jai fecadimaci. Pedro diga bitino iena cacajano, raijicaidimaci. Iemei Pedro raite:

⁴⁷ —Cai feiñua isoi, Jusiñamui Joreño jai feiñotomoi. Omoi bautizallena jaca budi rairuiñeite.

⁴⁸ Ie jira naimiedi naimaci Jesucristo facaina bautizallena llore. Bautizaja mei, naimaci diga fiebillana naimaci jitailla jira, diga irui nainomo fiebide.

11

Jerusalémo Pedrodi naimiemo jai suide rafuena llore

¹ Judeamo ite Cristo oretagano, jiaie creyentiaie diga, judíuaiñede comini Jusiñamui uaina feiñuana fididimaci. ² Pedro Jerusalémo abido ria, judíuai comini naimiena icidimaci. ³ Jicanotimaci:

—¿Bue ñellena judíuaiñedino jofomo jaidio? ¿Bue ñellena naimaci diga guitio?

⁴ Pedro uai uanona, naimacimo naie rafuena nagacinuaina llore:

⁵ —Jopemo navui cue ia, Jusiñamuimo cue jiaia, nicairilla isoi iticue. Aillue sábana isoi ana billana ciodicue. Monamona ana lloride, ie muiduai maiga diga. Cuemo ana ride. ⁶ Nainomo eruaidicue, diga rana ciodicue: ocainaiaina, eniruemo jorocana jaidinona, nuicinaiaina. Iena

ciodicue. ⁷ Monamona damie cuemo llwana cacadicue. Raite: “Pedro, naidacaillanona, fajanona, rino”. ⁸ Naie uai oticue: “Nama, dama ite. Moisés micori fimaidoga rille rana jaca riñedicue”. ⁹ Monamona dane cuemo llote: “Jusiñamui iena jai fimaidoñede. Ie jira iese lloñeno”. ¹⁰ Dacaiño amani iese suide. Ie mei monamo nana abido dane jaide. ¹¹ Ieconí daje amani ñima cai illa jofomo ridimaci. Cesareamona cue dine damie naimacina orede. ¹² Jusiñamui Joreñodí naimací diga buena sedaño cue jaillena cuemo llote. Cue diga seis creyentiaí jiaí jaidimaci. Cuená uaidotimie jofomo jaidicai. ¹³ Nainomo cai rilla mei, naimie ie jofomo Jusiñamui jaienicina navui ciuana caimo llote. Naie jaienicí naimiemo llote: “Jopemo cominina oreta, Simón Pedrona atillena. ¹⁴ O jitaille rafuena omo lloite. Naie rafuena o cacajamona, jeacinomona jilloitio, nana o jofomo ite comini diga” llote. Ie jira naimie cuena uaidote. ¹⁵ Nainomo cue llofuaí facaiseconi, nano dofoconi caimo billa isoi, Jusiñamui Joreño naimacimo bite. ¹⁶ Iena cue ciuamona, cai Nama Jesús lloga uaina comeciticue. Naimie navui llote: “Juan micori rafuena comini feiñuamona, Juan naimacina bautizade; iadedí cue rafuena omoi feiñuamona, cue Moo ie Joreñona birui feiñoitomoí”. ¹⁷ Cai Nama Jesucristona cai ñnuamona, Jusiñamuidí ie Joreñona caimo navui fecade. Naimacimo daje isoi birui fecademo, ¿ñiese Jusiñamui díbeimo ñeiticue?

¹⁸ Iena Cristo oretagano cacajano, jai naimací uaina uaitallicino ñede. Jusiñamuimo iobillacinona fecadimaci. Raitimaci:

—Naimací jaca illena, Jusiñamuidí judúuaiñede

comini comeciai iuai meiduana jai jitaide. Naimie dibeimo naimaci illana jai jitaide. Ie jira naimieri iobidicai.

Antioquíamo ite creyentiai illa rafue

¹⁹ Esteban micorina duere finua facaise, creyentiai tuficaida jaidimaci. Feniciamo damierie jaidimaci. Chipremo damierie jiai jaidimaci. Antioquíamo damierie jiai jaidimaci. Dani judíuai cominimo naimaci rafuena llotimaci; ²⁰ iadedi tuficaidinomona jiaino Chripremona billanona, Cirenemona billanona, Antioquíamo rillano, judíuaiñedinomo cai Nama Jesús rafuena llotimaci. ²¹ Cristo uai naimacimo illamona, ailluena comini innotimaci. Cai Nama dibeimo jaidimaci. ²² Jerusalémo ite creyentiai iena fidiano, Antioquíamo Bernabéna oretatimaci. ²³ Naimie ria, naimaci marena illamona, naimiedi Jusiñamui naimacina dueruillana uiñote. Ie jira iobide. Imaci comeciai ocuiñocana inocana jaillana naimacimo llote. ²⁴ Naimiedi maremie Jusiñamui Joreño nana naimie comecimo namatadimie. Jusiñamuina eo innotimie. Naie facaise ailluena comini creyentiaina jaidimaci.

²⁵ Ie mei Tarsomo Bernabé Saulona jenuaide. Naimiena baillanona, Antioquíamo naimiena uite. ²⁶ Daje año creyentiai diga nabairillanona, naimacina llofuetiaimaiai. Antioquíamo creyentiaidi cristianona nano mameciredimaci.

²⁷ Iemei Jerusalémona Antioquíamo damierie Jusiñamui rafuena lloraini bitimaci. ²⁸ Naimacimona Agabo raillamie ite. Jusiñamui Joreñodi naimiena llotatate:

—Nana comini ico aime guitimaci. —Claudio illaimana illa facaiseconi iese jai suide. ²⁹ Ie jira Antioquíamo ite creyentiaidi, Judeamo ite creyentiamo, ucubena oretaiacadimaci. ³⁰ Nagamiiaimacimo illa dierise ucubena oredimaci. Creyentiaina llofueraimimo Bernabé diga, iaimaiai Saulo diga, naie ucubena oredimaci.

12

Herodes Agripadi creyentiaina duere finua rafue

¹ Naie facaise Herodes railla illaimadi creyentiaimona damieriena gaitatate, naimacina duere finollena. ² Lloebi diga Jacobo cimaiona jaitatate. Jacobodi Juan ama. ³ Ieri judíuai illaicomini iobidimaci. Iena uñuamona, Herodes Pedrona jiai gaitatate. ⁴ Naie facaiseconi judíuai comini llomenico guilla rafue ite. Naimiena gaitatajanona, cárcelmo jonete. Soldaduaina orede, naimiena sedallena. Daje soldado Pedro nabeimo lloeo diga cuinaca. Daje soldado Pedro jarifebeimo lloeo diga cuinaca. Mena soldado naie cuarto ie nasena sedade. Ie isoi sedauidimaci. Naie llomenico guilla rafue fuilla mei, comini illa uicomo naimiena meineiacade. ⁵ Ie jira Pedro cárcelmo fiebide; iadedi creyentiai naimie facaina eo jiidimaci. ⁶ Herodes naimiena meineiacanarui naio Pedro soldaduai motomo inide. Mena lloeo diga maiga. Soldaduai cárcel nasena jiai sedadimaci. ⁷ Ieconicai Nama ie jaienicidi cárcelmo bairede. Cárcelmo lligaiñote. Naimiena casitallena, jaienici Pedro ciraigina jetade. Raite:

—Raire naidacai.

Ie mei naimie onollimo ite lloeodi oni uaide.
 8 Jaienici naimiena raite:

—O iniroina jita. O zapatona jiai jita— Iena jitaja mei, naie jaienici dane raite—. O iniroi o abimo ferino. Cue diga mai bi.

9 Naie jaienici jinafona Pedro jino jaide. Pedrodi naie jaienici naimiemo finoca rafuena uiñoñede.

—Nicañilla isoi comecina facadicue —raite.
 10 Naga nasena sedade soldadomona jaide. Jino jaillena, nanoca nasemo ride. Nai nasedi lloema ie; iadedi nase dama ecoride. Jino jaidiaimaiai. Daje calle jaillanona, jaienici naimiena fañonocaide. 11 Iemona Pedro naimiemo suide rafuena jai uiñoocaide. Raite:

—Cue Nama ie jaienicina uanai oretate. Herodemonona cuena jillobitade. Juduaia illaicomini cue meinellena cue sedajamona cuena jillobitade.

12 Iena jai naimie uiñuano, María jofomo jaide. Maríadi Juan Marcos ei. Jusiñamuimo jillena, naicomo ailluena comini ofidimaci. 13 Rillanona calle fuemo ite nasena tute. Daje mullaño bite. Naiñaiño mamecidi Rode. 14 Naimie uaiduamona, naiñaiño Pedro uaina uiñote. Iobilla jira, nase econoñede; iadedi abido fo aiside. Pedro nasemo illana llote. 15 Raitimaci:

—Odi uairico isoidiosa.

Naiñaiñodi:

—Pedrodi jaca ieseuide —raite.

Uai uamona:

—Naimie joreño ite —raitimaci.

16 Pedro nasena nia tua jira, nasena econuaibitimaci. Econuamona naimiena naimiaci ciuamona, raijicaidimaci. 17 Fo jaillano, Pedro ie

onolli jaidide, naimaci llicaillena. Cárcelmona cai Nama naimiena jino ua rafuena llote. Raite:

—Jacobomo iena llono. Jiaie creyentiamo iena jiaí llono.

Ie mei Pedro jino jaillano, jiaínomo jaide.

¹⁸ Monaidemo, Pedro nainomo iñena jira, soldaduai rajicaillanona, siadotimaci. ¹⁹ Herodes iena fidiano, naimiena jenotate. Naimiena baiñena, soldaduai mo jicanote. Baiñena jira, naimacina meinellena llote. Iemei Judeamona Cesareamo Herodedi jaide.

Herodes micori fodailla rafue

²⁰ Naie facaise Herodedi Tiro raila nairai diga, Sidón raila nairai diga, eo icirite. Naimaci uri ille rafuena siadollena, naimie dine bitimaci. Herodes ecimo maijidimiedi Blasto. Blasto diga naie cominidi nabairite, naimaci dibeimo naimie illena. Herodes eniruemona naimaci guille billa jira, uri illena naimiemo jicanote. ²¹ Naie cominina Herodes feiñollena, ie ebirede iniroina jitade. Naimacina feiñollena, ie rairabicimo raide. Iemona raita, rafuena are llote. ²² Iena cacajano, comini ado cuiriidimaci:

—Jamai imadi ñaiñena. ¡Jusiñamui ñaia!

²³ “Jusiñamuiñedicue” naimie raiñena jira, ieconi cai Nama jaienici naimiena iracotaitate. Jusiñamuimo iobillacino naimie fecañena jira, aiaí naimiena aite. Iemona naimiedi fodaite.

²⁴ Naie facaiseconi Jusiñamui uai llocana jaide. Ailluena comini iena inotimaci.

²⁵ Iaimaiaí uiga ucube illanona, Bernabé, Saulo diga, Jerusalémona Antioquíamo abido bitiaimaiaí. Juan Marcos jiaí atidiaimaiaí.

13

Bernabéna, iaímaiaí Saulo díga, fetua rafue

¹ Antioquíamo creyentiaí motomo Jusiñamui facaina lloraini itimaci. Llofueraini jiaí itimaci: Bernabé, Simón. Simóndi jiaíe mameci Negro. Lucio ite. Naimiedi Cirene imie. Manaén ite. Naimiedi Herodes ie amana mamede. Herodedi Galilea railla enirue gobernador. Saulo jiaí ite.

² Naimaci Jusiñamuina sedajamona, guiñenaruillai ia, Jusiñamui Joreño naimacimo llote:

—Bernabé iaímaiaí Saulo díga feto, cuejena. Cue rafuena iaímaiaí lollena, iaímaiaína jai fetodicue.

³ Jusiñamuimo naimaci jiaí mei, Jusiñamui iaímaiaína fetuana naimaci uiñuamona, naimaci onolli iaímaiaímo jonia mei, iaímaiaína naimacimona oni oretatimaci.

Pablo, iaímaiaí Bernabé díga, Chipremo illa rafue

⁴ Iaímaiaína Jusiñamui Joreño oretaja jira, Seleuciamo jaidíiaímaiaí. Nainomona botedo Chipremo jaidíiaímaiaí. Chipredi uiasi.

⁵ Chipremo ria, Salaminamo judíuaí ofiracuaimo Jusiñamui uaina llofuetíiaímaiaí. Juan Marcos iaímaiaí díga jiaí jaide. ⁶ Nana naie uiasimo jaillanona, Pafos railla nairaímo ridimaci.

Nainomo Barjesúna mameciredimiena baitimaci. Naimie judío imie. Naimiedi aima. Naimiedi díga siño rafuena finoraíma. “Jusiñamui rafuena lloticue” raite; iadedi taino lloráíma. ⁷ Gobernador díga maijuidi. Gobernadori Sergio Paulo. Gobernadori abina uiñotimie. Jusiñamui uaina cacaacana jira, naimie Bernabé iaímaiaí Saulo

diga uaidote. ⁸ Barjesús ie jiaie mamecidi Elimas. Naie iaiaiaia llofuiana uaitate. Gobernador inuana jitaiñede. ⁹ Saulodi jiaie mameci Pablo. Pablo dinena naimiena eo eruaillano, Jusiñamui Joreño nana Pablo comecimo namatajamona, ¹⁰ naimiemo llote:

—¡Eo jifueraimadio! ¡Eo maraiñedio! ¡Taife dibeimo itio! Nana mare rafue dibeimo iñedio. Cai Nama ie mare uanaicinona dobairaidodio. ¹¹ Cai Nama ie uaido ona ja iracotaitaitie. Nano nigarui useredinona cioiñeitio.

Ieconí naimie cioiñede. Cominina jenuaide, ie onollido llinocaida ie uillena. ¹² Iena ciuamona, gobernador creyentena jaide. Cai Nama Jesús rafue siñonana ciuanona, naimie jacinaita.

Jesús rafuena llocana jaidiaiaiaia

¹³ Pafomona botedo Pablo ie nabaiñiaia diga jaide. Perge railla nairaimo ride. Perge Panfilia railla eniruemo ite. Juan Marcos iaiaiaina fainonocaida, Jerusalémo abido jaide.

¹⁴ Pergemona Antioquíamo jaidiaiaiaia. Pisidia railla eniruemo Antioquía ite. Sábadoruimo judíuai ofiracomo jaillano, ana raidiaiaiaia. ¹⁵ Moisés micori ciegafuena facaja mei, Jusiñamui facaina lloraini micoriaia ciegafuena facaja mei, judíuai ofiraco sedadino iaiaiaimo llotimaci:

—Caimaci, cominimo bue omico lloiacania, mai llono.

¹⁶ Pablo naidadajano, ie onollina jaidide, comini lliscaillena. Raite:

—Jusiñamuina sedallena bene itomoi. Omoimona damierie judíuaidomoi. Jiaino judíuaiñedomoi; iadedi judíuai isoi Jusiñamuina

sedadomoi. Cue lluomo mai cacarei. ¹⁷ Iemona omoi fueollena, cai jaiagai rafuena lloiticue. Cai judíuai comini Jusiñamuina birui sedadicaí. Naimiedi cai jaiagaina jaie fetode. Egiptomo naimaci ia, naimacina eo jebuitate. Nainomona ie siño uai diga naimacina atide. ¹⁸ Jofue iñenanomo cuarenta años naimacina canode. ¹⁹ Canaán eniruemo siete nairaina cuenode. Cai jaiagaimo, naimaci uruiái diga, naie eniruena fecade, naimaci iena. ²⁰ Cuatrocientos cincuenta años cai jaiagaina fetuamona, naie eniruena naimacimo fecade. Naie facaise Jusiñamuidi jueces fetode, cai jaiagaina naimaci canollena. Naimie dibeimo naimacina itatallena, Jusiñamui naie jueces fetode; iadedi Samuel micori illa facaise juecesna jai jitaiñedimaci. Samuel micoridi Jusiñamui facaina lloraíma. ²¹ Illaímana naimaci jitailla jira, Jusiñamui Saúl micorina fetode. Naimiedi Cis micori jito. Naimie micori nairaidi Benjamín. Cuarenta años Saúl micori cai usumatiai micoriaina sedade. ²² Naimie ifo meidollena, naimaci illaímana illena, Jusiñamui David micorina fetode. Naimiedi Isaí micori jito. Jusiñamui naimie micorina llote: “Bimie eo cue comecido jaidimie. Nana cue jitailla rafuena finoite”. ²³ Jusiñamui llua isoi, David micori uruiáimona Jesúsdi cai judíuai comini Jilloitaráimana jaide. ²⁴ Jesús nia llofueñenia, Juan Bautista micori llofueuide. Juan micori cai cominimo llouide: “Omoi jeacinona fañonocaida, Jusiñamui dibeimo omoi comeciai iuailai meido. Iena omoi meidoia, comini iena uiñotallena, mai omoi bautizallomoi”. ²⁵ Juan micori

ie llofuaia fuillamona, raite: “Omoi comeci facajamieñedicue. Cue ifomo jiaimiena meidoite. Naimie isoieñedicue. Jamai bue isoidicue. Jamai bue cue isoilla jira, naimiena cue canuana uiñoñedicue”.

²⁶ Caïmaci, cai eirue jito Abraham micorimona comuidicai. Jusiñamuina birui sedadicai. Ie jira cai jeacinomona naimie jilloitalle rafue caïmo duide. Jesúna ñaiticue. ²⁷ Jerusalémo itinodi, cai illaicomini diga, Jesúna jaie meinetimaci. Naga sábado Jusiñamui facaina lloraini micoriai ciegafuiaiina facadimaci; iadedi iena raise cacaiñedimaci. Jesúna naimaci meiniamona, Jusiñamui lloraini micoriai ciegafuiaiina jai suitatimaci. ²⁸ Jesús maraiñede rafuena finoñede; iadedi naimiena meinetimaci. Pilatomo jicanotimaci, naimiena meinellena. ²⁹ Nana Jusiñamui facaina lloraini micoriai ciegafuiaiina suilla mei, cruzmona naimie ana uano, nofici ie raiafomo naimiena jonetimaci; ³⁰ iadedi fiodaillamona Jusiñamui naimiena jillotate. ³¹ Galileamona Jerusalémo naimie diga jaidino naimiena diga icaiño cioidimaci. Iemei cominimo naimie rafuena jai llocabitimaci. ³² Jusiñamui cai jaiagaimo jaie lloga rafue jai suide. Iena omoïmo ja lloiticoco. ³³ Jusiñamuidi cai jaiagaimo llogafue birui jai suide. Jesúna cai dine jai orede. Naiena salmos dosmo cueba: “Jusiñamui llote: ‘Cue jitodio. Birui ona jilloitaramana itataticue’”. ³⁴ Fiodaillamona Jusiñamui naimiena jai jillotate. Ie abi jaca rifaiñede. Iena Jusiñamui jiaï raite: “Davidmo cue llogacina omoi facaina jaca finojiticue”. ³⁵ David micori jiaie salmomo iena

cuete: “O mareuidimie jaca rifaillana jitañedio” raite. ³⁶ Jusiñamui David micorina ñaiñede. Ie illa dinori David micoridi Jusiñamui jitailla rafuena finode. Ie mei naimie fiodaite. Ie raiafomo naimie comini naimiena jonetimaci. Ie mei David micori abi rifaide; ³⁷ iadedi Jusiñamui Jito abidi ie isoi rifañede.

³⁸ 'Caimaci, daje rafue omoimo lloiacadicue. Jesús fiodailla jira, Jusiñamui omoi jeacino oni dotaacade. Moisés micori llogacínodi omoi marañedicinomona omoína jillotañede; ³⁹ iadedi Jesúsna birui omoi ñnoia, omoi jeacino anamona jilloitomoi. ⁴⁰ Abina omoi rairui, Jusiñamui facaina lloraini micoriai jaie cuegafuiai omoimo sui raillano. Jaie cuetimaci:

⁴¹ Ero, Jusiñamui uaina jamaidomoi. Ieri raiji-caidomoi; iadedi faifidomoi.

Omoi motomo siño mare rafuena birui finodicue. Bu omoimo iena iese lloia, bie rafuena ñnoñeitomoi.

Ie isoi omoimo suiñellena, Jesúsna birui omoi mai ñno.

⁴² Ie mei Pablo lliicaide. Iaimaiaia jino jaidemo, comini iaimaiaimo jicanotimaci, jiaie sábadoruimo bie rafuena naimacimo dane lloiena. ⁴³ Comini jino jailla mei, ailluena comini Pablo, iaimaiaia Bernabé diga, ñaicana jaidimaci. Judúuai iese jaidimaci. Judúuaiñedino iese jiaia jaidimaci. Naie judúuaiñedinodi judúuai isoi Jusiñamuina ñnotimaci. Pablo, iaimaiaia Bernabé diga, ñaicana jaillanona, naimacimo llotiaiaiaiaia:

—Jusiñamui omoína duenailana omoi jai uiñua jira, Jesús rafuena mai omoi ñno.

⁴⁴ Jiaie sábadoruimo ailluena comini ofidimaci, Jusiñamui uaina cacareillena. ⁴⁵ Ailluena cominina ciuano, judíuai comini dinena eo uradoidimaci. Pablo joreña ñaitimaci. Naimie llofuiacinuaina uaitatimaci; ⁴⁶ iadedi Pablo, iaímaiai Bernabé diga, jaitaiño llofuetiaímaiai:

—Omoimo Jusiñamui uaina nano lloiacadicoco. Iena jitañedomoi. Jusiñamui diga omoi jaca illena jitañedomoi. Ie jira judíuaiñedino dine jaiticoco. ⁴⁷ Iese Jusiñamui jaie llote:

Judíuaiñedinomo ona oretaiticue, naimacimo cue rafue lollena,

naga eniruemo ite cominimo jeacinomona jilluana lollena.

⁴⁸ Iena cacajano, judíuaiñedino iobidimaci.

—Jusiñamui rafue mare —raitimaci. Jusiñamui jaca illena fetocano diese Jesúsna inotimaci. ⁴⁹ Nana bie eniruemo cai Nama Jesús uaina llocana jaide; ⁵⁰ iadedi judíuai dinena diga cominina fuemo faicana uitimaci. Jusiñamuina sedade riñoniaina fuemo faicana uitimaci. Naie riñoniai mameciai are soride. Illaicomini fuemo faicana uitimaci. Ie jira Pablo, iaímaiai Bernabé diga, duere finodimaci. Naimaci illanomona iaímaiaina jino dotadimaci; ⁵¹ iadedi jioracuai iaímaiai eillimona jaidinotiaímaiai, naimacimo ite jeacinuaina naimaci uinollena. Ie mei Iconio railla nairaímo jaidiaímaiai; ⁵² iadedi Antioquíamo ite creyentiaí eo iocire itimaci. Jusiñamui Joreño nana naimaci comecimo namatade.

14

Iconiomo Pablo, iaímaiaí Bernabé díga, illa rafue

¹ Iconiomo judíuai ofiracomo, iaímaiaí Antioquíamo jailla isoi, jaidíiaímaiaí, Cristo rafuena duere llotíiaímaiaí. Ie jira ailluena comini creyentíana jaidímací. Judíuai cominimona ailluena ñnotímací. Judíuaiñede cominimona ailluena jiaí ñnotímací; ² iadedí ñnoñede judíuaidí judíuaiñedinona fuemo faitímací. Naimacimo creyentíana tainona llotímací; ³ iadedí nainomo are fiebidíiaímaiaí. Cai Nama facaisena jacitaiñeno llotíiaímaiaí. Cai Nama Jesús iaímaiaína siño rafuena finotate. Ie jira cominí cai Nama Jesús naimacina dueruillana fidímací; ⁴ iadedí nana comini naiena ñnoñedímací. Comeciána daje isoi lloisiñede. Damíerie judíuai facaisena itímací. Damíerie naie iaímaiaí facaisena itímací. ⁵ Judíuaiñedinodí, judíuai díga, naimací illaícominí díga, naie iaímaiaína duere finoacadímací. Noficina iaímaiaína fairígiacadímací. ⁶ Iena fidiano, Licaoniamo ite nairaimo aisicano jaidíiaímaiaí. Listra railla nairaimo jaidíiaímaiaí. Derbe railla nairaimo jiaí jaidíiaímaiaí. Naie nairai ecimo ite eníruemo jiaí jaidíiaímaiaí. ⁷ Nainomo Jesús ie mare rafuena llofuetíiaímaiaí.

Listramo iaímaiaímo suilla rafue

⁸ Listramo damíe tísitaite. Nanomona naimíe íese jeicia jira, jaca macariñede. ⁹ Pablo llofuiana naimíe raise cacajamona, “Jusiñamui cuena jillotarede” raillanona, tísitaitímíe ñnote. Pablo

dinena naimiemo eruaillano, naimie inuana uinote. ¹⁰ Naimiemo ado llote:

—A naidada.

Iemei daiacaida naimie macarite. ¹¹ Ailluena comini Pablo finoca rafuena cioidimaci. Naimaci uaido ado cuiriidimaci:

—Iñiaí isoi Jusiñamui cai dine bite.

Naie cominidi Júpiter railla jusiñamuina sedauidimaci. Mercurio railla jusiñamuina jiaí sedauidimaci. ¹² Ie jira Bernabé mamecidi

jiaícina jonega Júpiter. Pablo mamecidi jiaícina jonega Mercurio, naimie ñairaimana illa jira.

¹³ Naie nairai nanoca nase ruica facai Júpiterna sedauilla jofo ite. Iaimaiaina sedallena, safia diga juraretaiaina abina finoduanona, Júpiter facaina ñairaima naimacina atide. Ailluena comini diga bite. Juraretaiaina fallena, “Naie iaimaiaidi cai Jusiñamui” raillano, iaimaiaimo feaacadimaci.

¹⁴ Iaimaiái iena ciuanona, “Comini marañede rafuena finoacade” raillano, iaimaiái iniroina cuaranotiaimaiái. Comini motomo aisicana jaidiaimaiái. Ado llotiaimaiái:

¹⁵ —Nabaiñiaí, ¿bue ñellena cocomo iese finodomoí? Jamai imadicoco. Omoí isoidicoco. Jusiñamuina omoí sedallena, jamai rana omoí sedañellena, mare rafuena omoímo jai lloticoco. Cajede Jusiñamuina sedadicoco. Naimiedi mona finode. Eniruenta finode. Monailaina jiaí finode. Nana nainomo ite rana jiaí finode. ¹⁶ Jaie

Jusiñamuidi nana omoí judíuaiñedino omoí jitailla rafuena finuana rairuiñede; ¹⁷ iadedi naimie finoca rafuemona naimiena uinoredomoí. Omoí facaina mare rafue naimie finocabide. Noci deitate. Omoí riará sicotate. Omoímo guille

itatate. Iemona omoï começiaina caimare itatate. Iemona Jusiñamuina uiñoredomoï.

¹⁸ Iese Pablo llote; iadedi iaïmaiaïmo juraretaïna fecajana jaca faïnonocaiacaiñedimaci.

¹⁹ Nano niğarui illamona, Pisidiamo ite Antioquíamona judíuai comini bitimaci. Iconiomona jiaï bitimaci. Judíuai dinena fuemo faïamona, naimaci dibeïmo comini jaidimaci. Iemona noficido Pablona fairigite.

Naie nairaïmona naimïena sonocana uitimaci, fioidaitimïena naimïe eruaïlla jira. ²⁰ Naimïena iese faïnonocaiïa mei, creyentiaï naimïe ecïmo billamona, naimïe a naidadate. Nai nairaïmo abïdo jaide. Ie are Derbemo, Bernabé diga, jaide. ²¹ Naie nairaïmo Jesús ie mare rafuena llotiaïmaiaï. Diga comini creyentiaïna jaidimaci. Ie mei Listramo abïdo jaidiaïmaiaï. Iconiomo abïdo jiaï jaidiaïmaiaï. Pisidiamo ite Antioquíamo jiaï abïdo jaidiaïmaiaï. ²² Creyentiaï começiaina ocuiñotadiaïmaiaï. Cristona nia ñnuana llotiaïmaiaï. Raitiaïmaiaï:

—Jusiñamui ñne cai nia riñenia, eo duere sefuiticai.

²³ Naga creyentiaï illanomo creyentiaïna sedarainina fetodiaïmaiaï. Guiñeno Jusiñamuïmo jiaï mei, guiñena facaise mei, naimïena naimaci jai ñnua jira, cai Nama illa anamo naimacina faïnonocaidiaïmaiaï.

Siriamo ite Antioquíamo abïdo jaidiaïmaiaï

²⁴ Pisidiamo jaïllanona, Panfiliamo ridiaïmaiaï.

²⁵ Pergemo Cristo uaina llua mei, Ataliamo jaidiaïmaiaï. ²⁶ Nainomona botedo Siriamo ite Antioquíamo abïdo ridiaïmaiaï. Nano naie

iaimaiaia illanomo abido ridiaimaiaia. Nainomona iaimaiaia navui nia jaiñenia, creyentiaia dinena Jusiñamui iaimaiaia duenaillana uiñuamona, iaimaiaia oredimaci. Jusiñamui rafuena iaimaiaia lollena, iaimaiaia oredimaci. Naie maijia fuilla jira, jai abido bitiaimaiaia. ²⁷ Iaimaiaia rilla mei, creyentiaia ofitatiaimaiaia. Nana Jusiñamui iaimaiaimo finoca rafuena llotiaimaiaia.

—Jusiñamuidi judiaiañedino naimiena inuana jai jitaide —llotiaimaiaia. ²⁸ Dinomo creyentiaia diga are itiaimaiaia.

15

Jerusalémo Moisés micori llogacinona siadua rafue

¹ Antioquíamo Jerusalémona janore comini bilano, creyentiaia iese llofuetimaci:

—Moisés micori caimo lua isoi, omoi abina omoi detatañenia, jeacinomona jillobiñeitomoi.

² Ie jira creyentiaia uri iñedimaci. Pablo, iaimaiaia Bernabé diga, Jerusalémona bitino llofuiana eo uaitatiaimaiaia. Ie muidona creyentiaia dinena iaimaiaia, jiaie creyentiaia diga, Jerusalémo jaillena fetodimaci. Cristo oretagano diga, Jerusalémo ite creyentiaia sedaraini diga, bie rafuena siadoiacasite. ³ Creyentiaia naimacina oretaja mei, Fenicia railla enirue dibeido jaidimaci. Ie mei Samaria railla enirue dibeido jiaia jaidimaci. Creyentiaia illanuaimo llofuecana jaidimaci. Judiaiañedino creyentiaia jai jaillana naimacimo jiaia llotimaci. Ie jira naie creyentiaia caimare itimaci.

4 Jerusalémo ria, creyentiaidi naimacina feiñotimaci. Cristo oretagano itimaci. Creyentiaina sedaraini jiai itimaci. Naimacimo nana Jusiñamui iaiaimaimo finoca rafuena llotiaimaia. Cristo rafuena iaiaimai llofuiamona, judíuaiñedino Cristona inuana llotiaimaia. 5 Iena cacajano, fariseuai dibeimo ite creyentiaimona jiaino naidaita raitimaci:

—Moisés micori llogacinuaina inuamona, judíuaiñede creyentiai abina diana jitaídicaí.

6 Bie rafuena siadollena, Cristo oretaganodi, creyentiai sedaraini diga, danomo ofidimaci.

7 Iena are siadua mei, Pedro naidacaillano, raite:

—Amatiai, judíuaiñedinodi cuemona Jesús ie mare rafuena cacaillena, jaie omoimona Jusiñamui cuena fetode. Iena uiñotomoi. Cue llofuiamona inotimaci. 8 Nana comini comeciaina naimie uiñuamona, judíuaiñedino naimiena inuana Jusiñamuidi uiñote. Caimo fecaja isoi, ie Joreño naimacimo fecaja jira, Jusiñamuidi judíuaiñedinona jitaillana jai uiñoticaí.

9 Jusiñamuidi naimacina cai isoi jai feiñote. Naimiena naimaci inua jira, naimie naimaci comeciimona jeacinona jai dotade. 10 ¿Bue ñellena Jusiñamuina inoiacaiñedomoi? Jusiñamui jitaillacino omoi finoacaiñena jira, naimie omoina duere finuana jitaídomoi. Cai jaiagai Moisés micori llogacinodo jaidimaci; iadedi iena raise inoñedimaci. Nana ie llogacinona jaca finonidimaci. Iedo jaie jiai jaidicaí; iadedi iena jiai finonidicaí. ¿Bue ñellena iedo birui cai jaillana jitaídomoi? 11 Jesucristo caina duenaila jira,

cai jeacinomona jilloiticaí. Judíuaiñedino cai isoi jilloitimaci.

¹² Iena cacajano, nana ofidino uai llicaidimaci. Iemei Bernabé llwana cacadimaci. Pablo llwana jiaí cacadimaci.

—Jusiñamui judíuaiñedino motomo cocona siño rafuena finotate —lloitiimaiaí.

¹³ Iaimaiaí ñaia mei, Jacobo raite:

¹⁴ —Amatiaí, cuemo cacarei. Judíuaiñedinomo Jesús rafue Simón Pedro nano llua rafuena jai cacadicaí. Creyentiaína naimaci jaillena, Jusiñamui naimacina jai fetode. ¹⁵ Jusiñamui facaina lloraini micoriaí iena jaie cuetimaci:

¹⁶⁻¹⁸ Jusiñamui jaie llote: “David micori illaima isoi illaimana illena, cue Jitona ico oretaiticue.

David jicori jito illaimana birui iñede;

iadedi David micori ifomo illaimana cue Jito iite.

Iemona judíuaiñedino cuena ñnoitimaci.

Naimaci cue cominina jaillena jiaí jitaidicue.

Iena cue llua jira, iena finoiticue” llote.

¹⁹ Ie muidona cue comeci raite: Judíuaiñedinomona creyentiaína jaidinona duere finoñeiticaí.

²⁰ Naimacimo rabena oreta, dama buena llollena: “Jiraraimo fecaca llicisina riñeno. O aiñede riño diga iñeno. O iniñede iima diga iñeno. Llerinoga rana riñeno. Diruena jiaí riñeno”.

²¹ Jaiemona naga sábado naga judíuai ofiracomo judíuidi Moisés micori cufafuiaimona naie isoide lletarafuena cacadimaci. Ie jira naie isoide rafuedo nia jaiticaí: iadedi jiaie Moisés micori lletarafuedo jaiñeiticaí.

²² Ie mei Cristo oretaganodi, creyentiaína sedaraini diga, comeciaina facadimaci,

naimacimona cominina fetollena, Antioquíamo oretallena. Nana creyentiaí comeciaina facajano: “Jee” raitimaci. Pablo, iaímaiaí Bernabé diga, naimacina oretaiacadimaci. Judana fetodimaci. Naimie mameci jiaícidí Barsabás. Silana jiaí fetodimaci. Jiaie comini baífemo rafuena baitadiaímaiaí. ²³ Rabena cuetimaci, iaímaiaí diga oretallena. Iese raillano, cuetimaci:

“Antioquíamo itino, Siriamo itino, Ciliciamo itino, omoímo cuetícaí. Jerusalémo itícaí. Cristo oretaganodícaí. Creyentiaína sedarainídícaí. Omoídi caí amatiaí. Omoímo jai cuetícaí. Judíuaíñediomoi; iadedí caí amatiaídomoi. ²⁴ Caí motomona jiaie comini naimaci llofuiado omoína uri itatañenana fidídícaí. Omoí jeacinomona omoí jilloillena, Moisés micorí llogacínodo omoí jaillana jítaidimaci. Ie jirari omoí comeciáí rucaícuerite. Naimacina oretañedícaí. ²⁵ Danomo caí ofilla mei, menamiena fetodícaí, omoímo oretallena, Bernabé, iaímaiaí Pablo diga. Bernabéna isiruitícaí. Pablona jiaí isiruitícaí. ²⁶ Iaímaiaí caí Nama Jesucristo muidona navui niadedí fiodaitíiaímaiaí. ²⁷ Ie jira Judas, iaímaiaí Silas diga, oretaitícaí. Omoímo bie rabe cuia isoi lloítíiaímaiaí. ²⁸ Jusiñamui Joreño caímo illamona, bie rafuena omoímo lloítícaí. Ailluena rafue omoí finuana lloñeítícaí. Dani bie rafuena finojitomoi. ²⁹ Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede íima diga iñeno. Iese omoí iñenia, marena iítomoi. Macaibaite” cuetimaci.

³⁰ Ie mei Antioquíamo jaidimaci. Ailluena cominina ofitaja mei, naimacimo cartana

fecadimaci. ³¹ Iena facajano, naie llucacnori iobidimaci. ³² Judas Jusiñamui facaina lloraima. Silas daje isoide. Diga rafuena creyentiaimo llofuetiaimaia. Naimaci comeciaina jia ocuiñotadiaimaia. ³³ Diga irui nainomo illa mei, iaimaiaina oretatinomo creyentia iaimaiaina marena abido oretatimaci.

³⁴ Nainomo Silas comeciaina facajano, fiebide. Ie jira Judas dama abido jaide. ³⁵ Antioquíamo Pablo, iaimaia Bernabé diga, cai Nama Jesús rafuena llofuellena fiebidiaimaia. Diga comini jia iese llofuetimaci.

Pablo jiaie eniruemo ite creyentia dine dane jailla rafue

³⁶ Diga irui illa mei, Pablo Bernabémo llote: p —Naga navui coco llua nairaimo creyentia dine abido mai coco jai. Cai Nama ie mare rafuena dane lloiticoco. Nie isoi naimaci illana jibuiticoco.

³⁷ Bernabédi, naie iaimaia diga, Juan Marcos uiacade. ³⁸ Panfliamo iaimaiaina navui Juan faionocaide. Iaimaia diga llofuellena jaiñena jira, Pablo naimiena dane uiacañede. ³⁹ Riire ñaitiaimaia. Comeciaina daje isoi lloiñediaimaia. Ie jira dajena jaiñediaimaia. Bernabé Juan Marcona uillanona, Chipremo aillue botedo jaidiaimaia. ⁴⁰ Ie mei Pablo Silana uite. “Jusiñamui omicono canoite” creyentia dinena raillanona, iaimaiaina oredimaci. ⁴¹ Siria railla eniruemo Jesús rafuena llocana jaidiaimaia. Cilicia railla eniruemo jia llocana jaidiaimaia. Creyentia comeciaina ocuiñotacana jaidiaimaia.

16

Timoteo iaímaiaí díga jailla rafue

¹ Nano Derbemo Pablo, iaímaiaí Silas díga, ridíiaímaiaí. Iemona Listramo ridíiaímaiaí. Nainomo Timoteo railla creyente ite. Naimíe eidi judía iñaiño. Jiaí creyente. Ie moo micorí griego imíe. ² Listramo ite creyentiaí, Iconiomo ite creyentiaí díga, naimíena: “Mare” raitimaci. ³ Pablodí Timoteona uiacade, naimíe díga jaillena. Timoteo moo micorí griego imíena jira, naimíe abína nia detatañede; iadedí nainomo ite judíuaí illa jira, Moisés micorí llua isoi, Pablo Timoteo ie abína dete. Judíuñedimíe naimaci motomo ia, naimaci motomo inide. ⁴ Naga nairaimo naimaci jaillanona, Jerusalémo siadogacínona creyentiaímo llote. Jerusalémo Cristo oretagano, creyentiaína sedaraini díga, navui naicínona siadotimaci. Creyentiaí naie lluaña ñnollena, iena llocana jaidimaci. ⁵ Ie jira creyentiaí ñnocana jaidimaci. Nagarui ailluena comíni creyentiaína jaidimaci.

Pablo nicaírilla ra isoidena ciua rafue

⁶ Jusiñamui Joreño Asia railla eníruemo ie uaina naimaci llofuiana rairuilla jira, Frigia railla eníruemo macaricana jaidimaci. Iemona Galaciamo jaidimaci. ⁷ Misiamo naimaci rillano, Bitiniamo jaiacade; iadedí Jesús Joreño dane imaci jaillana rairuide. ⁸ Ie jira Misiamona ecido jaillano, Troas railla nairaimo jaidimaci. ⁹ Nainomo naie naíona Pablo nicaírilla ra isoidena cide. Daje Macedonia imíedí uicomo naidaita naimíemo jica-jicanode. Raite: “Macedoniamo

ruica o bi. Caina canuaibi”. ¹⁰ Naiena Pablo cıua mei, naie facaisemona Pablo diga jaidıcue. Lucadıcue. İe jira bie rafuena raise uıñotıcue, iena omo cuellena. Macedoniamo ruica dıne cai jaille botena jenodıcai. Comecına facadıcai: “Jusiñamuidı caina uaidote, nainomo ie mare rafuena cai lollena”.

Filipomo illa rafue

¹¹ İe jira Troamona Samotraciamo monaillaido atona ie mamedo jaidıcai. İe icoitidıruido Neápolis railla nairaimo ridıcai. ¹² Dinomona Filipomo duide naisodo jaidıcai. Macedoniamo ite. Naie enıruue facaise ie nanoca nairai Filipos. Naie nairaidı Romamona bitino nairai. Dıga irui nainomo itıcai. ¹³ Sábadoruido naie nairaimona nasedo jino jaidıcai. Comecına facajamona: “Dınomo nıbai comını ofıcabıdımacı, Jusiñamuimo jııllena”, ille fuemo jaidıcai. Nainomo dañaiñorie riñoniai billanona, dınomo ana raıdıcai, naiñaiñuaimo Cristo rafuena lollena. ¹⁴ Naimacımona dañaiño cai llofuiana eo cacade. Naiñaiño mamecıdı Lidia. Tiatira railla nairai iñaiño. Naiñaiñodı jıduirede inıruena fecauide. Jusiñamuina jai sedade. Pablo llofuiana naiñaiño cacajano, cai Nama Jesús naiñaiño comeci naie lluana feiñotade. Naie facaise creyentena jaide. ¹⁵ Naiñaiño ie jofomo itıno diga bautizaja mei, caimo llote:

—Cuedı cai Namana cue jai inıuana omoı uıñuamona, cue jofomo mai bi, nainomo omoı fiebillesa. —Duere caina uai-uaidode.

¹⁶ Jusiñamuimo jııranomo jıııruıdo jaidıcaımo, daje jıtaiñomo dafaıfidıcai. Naiñaiñodı jııainomona ibacañaiño. Janaba anamo naiñaiño jııı ite.

Iemona naiñaiño jiairuido suille rafuena llouide. Naie rafuena llwana ibatajano, naiñaiño namaiaidi ailluena ucubena feiñoudimaci. ¹⁷ Naiñaiñodi cai jinafona jaillanona, ado cuiri-cuiricaide:

—Naimaci nanoca Jusiñamui ie lloraini. Omoi jilluana omoimo llocabitimaci.

¹⁸ Diga irui naiñaiñodi iese cuiri-cuirisoide. Icirillamona, Pablo abido dobaidacaida, naiñaiñomo ite Janabamo llote:

—Cue Nama Jesucristo uaido naiñaiñomona oni jai. —Iemona oni jaide.

¹⁹ Naiñaiño llumona ucubena jai oñenana naiñaiño namaiai jai uiñua jira, Pablo, iaimaiai Silas diga, gaitadimaci. Iaimaiaina plazamo illaicomini illanomo sonocana uitimaci. ²⁰ Dinomo iaimaiaina illaicomini dine atidimaci. Iese iaimaiaina llogidotimaci:

—Naie iaimaiaidi cai nairaina uri itatañediamaiai. Iaimaiai judiúi comini.

²¹ Romanuai cominina cai illa jira, iaimaiai llogacinuaina cai iñoia, iedo cai jaia, marañede.

²² Iena cacajano, nana comini naie iaimaiaina fanaisitimaci. Illaicominidi naie iaimaiai iniroina cuaranuanona duiñode. Rasi diga, iaimaiaina diga icaiño fatatatimaci. ²³ Iaimaiaina eo faja mei, cárcelmo jonetimaci. Cárcelna sedaraimamo iaimaiaina raise sedallena llotimaci. ²⁴ Iese llua jira, iaimaiaina llaveracomo fo iaimaiaina uite. Donoramo iaimaiai eilliai ñuitajano, raise donode.

²⁵ Naiona daferui facai Pablo, iaimaiai Silas diga, Jusiñamuimo ifuerillacinona rorodiamaiiai. Jiai jidiamaiiai. Jiaie llavecano naiena cacadimaci. ²⁶ Jamai ebena illacinomona ñuisañodi suide. Cárcel illanodi jaidisite. Naie

facaiseconi nana nasiaidi ecocorinaite. Ie dacaiño nana llavecano imaci donua radi oni ecoride.
²⁷ Cárcelna sedaraíma casidemo, cárcel ie nasiaí ecocorinaillana cide. “Llavecano jai aisidimaci” raillamo naimie comecina facade. Ie jira ie lloesi aiñoicaida, dama abi faitaacade. “Illaicomini bia, ¿bue lloiticue?” raillamona comecina facade;
²⁸ iadedi Pablodi eo riire cuirioide:

—¡O abina dama meineño! Bene nana iticaísa.

²⁹ Lamparina atillena cárcelna sedaraíma jicajanona, jarire fo jaide, Pablo iaímaiaí Silas dine. Jacinaillano, naimie abidi docaillamona, iaímaiaí uicomo caiñici ifodo ana rainadate.
³⁰ Iaímaiaína jino ua mei, nai iaímaiaímo jicanote:

—¿Buena finojiticue, cue jeacinomona cue jilloil-lena?

³¹ Uai otiaímaiaí:

—Coco Nama Jesúsna ino. Iese na o jofomo ite comini diga o jilloillesa.

³² Iemei naimiena Jesús ie rafuena llofuetiaímaiaí, nana ie jofomo itino diga.

³³ Naie facaise iaímaiaí bofellaña jocode. Iemei naimiedi, nana ie comini diga, bautizaga.

³⁴ Guillena, ie jofomo naie iaímaiaína uite. Jusiñamuina jai inua jira, na ie comini diga, naimie caimare ite.

³⁵ Ie oni monaidemo, illaicomini di dajerie policiana cárcelmo oretatimaci, nai iaímaiaína jino orellena. ³⁶ Cárcel sedaraímadí naie rafuena Pablomo llote. Raite:

—Omico jaillena, illaicomini di omicono oredimaci. Mai marena jai.

³⁷ Iadedi policíamo Pablodi llote:

—Cocodi romanuai cominidicoco; iadedi como ite rafuena raise uiñoñoeno cocona marefodo fatimaci. Cárcelmo cocona jonetimaci. Jai bainino cocona jino oretaiacadimaci. Iese jino jaiñeiticoco. Naimacimo llono: “Cocona jino ollena bi”.

³⁸ Illaicominimo policías naiena lluaibitemo, illaicominidi naiena cacajanona, eo jacinaites, romanuai cominina iaimaiaina jira. Cai nanoca illaicominidi romanuai nairai cominina jamai ebena duere finuana rairuidimaci. ³⁹ Ie jira naie iaimaiai dine illaicominidi jaidimaci, iaimaiaina: “Dama dino iesede” raillena. Jino atia mei, nairaimona jino iaimaiai jaillena oredimaci. ⁴⁰ Cárcelmona jino billano, Lidia jofomo fo jaidiaimaiai. Creyentiaina ciuano, naimaci comeciaina ocuiñotallena, naimacina dane llofuetiaimaiai. Ie mei oni jaidiaimaiai.

17

Pablo, iaimaiai Silas diga, Tesalónicamo illa rafue

¹ Anfípolis railla nairaimo macaritiaimaiai. Apolonia railla nairaimo macaritiaimaiai. Ie mei Tesalónica railla nairaimo ridiaimaiai. Dinomo judíuai ofiracodi ite. ² Pablo fibilla isoi, nainomo fo jaide. Daje amani sábadoruimo Jusiñamuina ciegafuiaimona naimacina llofujete. ³ Iese naimacina llofujete:

—Cristo llogi cacaites. Fiodaillamona naimie jilloite. Naimiedi Jesús. ⁴ Naiena cacadinomona ailluena ñnotimaci. Pablo, Silas iaimaiai dibeimo jaidimaci. Jusiñamuina ñnote grieguaimona ailluena comini creyentiaina jaidimaci. Ie emodoconi ailluena nanocañaiñuaidi creyentiaina jiai

jaidimaci; ⁵ iadedi judíuaidi uradoillano, jamai itinomona eo marañede iñiaina uaiduanona, ail-luena cominina ofitatimaci. Ie jira naie nairai uri iñedimaci. Iaimaiaina comini uicomo uillena, Jasón jofomo binaisite. ⁶ Iaimaiaina baiñenano, Jesóna, jiaie creyentiaí diga, illaicomini illanomo aiñoicaida uitimaci. Cuirisite:

—Naga nairaimo cominina uri itañediamaiai. Benomo jai bitiaimaiai. Jai benomo billanona, Jasón ie jofomo iaimaiaina feiñote. ⁷ Cai nanoca illaíma ie llogacínona jai iñoñedimaci. Ie anamo jai iacañedimaci. Raitimaci: “Jiaie illaíma anamo iticaí. Jesús raillamie anamo iticaí”.

⁸ Judíuai iese lluamona, cominidi uri iñedimaci. Illaicominidi jiaí uri iñedimaci. ⁹ “Naie iaimaiai dane biñeitiaimaiai” illaicominimo creyentiaí raillano, illaicominidi Jasón jiaie creyentiaí diga, jino oretatimaci.

Bereamo Pablo, iaimaiai Silas diga, illa rafue

¹⁰ Naie naio creyentiaídi Pablona, iaimaiai Silas diga, Bereamo raire oretatimaci. Dinomo rillano, judíuai ofiracomo jaidiaimaiai. ¹¹ Nainomo ite judíuai eo mare. Tesalónicamo ite judíuai isoñedimaci. Bereamo itinodi Cristo rafuena iocire feiñotimaci. Niedi uanaicínoni raillanona, nagarui Jusiñamuina ciegafuiaina facadimaci. ¹² Ie jira naimacimona ailluena iñotimaci. Judíuaiñedinomona ailluena nanocañaiñuai iñotimaci. Ailluena iñiaí jiaí iñotimaci; ¹³ iadedi Bereamo Pablo Jusiñamui ie uaina jai lluana Tesalónicamo ite judíuaidi fidiano, dinomo jaidimaci. Cominina fuemo faillena,

jaidimaci. ¹⁴ Naie facaise creyentiaidi Pablona oni oretatimaci. Monailai fuemo duide naisona oretatimaci. Silas, iaimaiai Timoteo diga, fiebidiaimaiai. ¹⁵ Pablo uigamací naimie diga Atenamo jaidimaci. Dane abido Bereamo jaidimacimo, naimacimo Pablo llote:

—“Silas, iaimaiai Timoteo diga, raire cue dine billesa” llono.

Atenamo Pablo illa rafue

¹⁶ Atenamo iaimaiai rillena Pablo sedademo, naie nairaimo ailluena jiraraiana cide. Iena cianona, Pablo comecidi jeareficaide. ¹⁷ Naiena cúa mei, judíuai ofiracomo judíuai diga coniniri Jusiñamui rafuena siadote. Jusiñamuina jai ñnote judíuaiñedino diga coniniri iena jiai siadote. Plazamo nagarui jamai itino diga coniniri iena jiai siadote. ¹⁸ Jamai comecina facadinomona damerie naimie diga jiai ñaitimaci. Epicúreo railla rafuedo jaisoidimaci. Estoico railla rafuedo jiai jaisoidimaci. Damerie naimacimona raitimaci:

—¿Buena nai ñaillareuidimie caimo lloiacade?

Jiaino raite:

—Jiaie nairai jusiñamuillaicaimo lloiacade isoide.

Jesús fiodaillamona jilluana Pablodi llouilla jira, iese raitimaci. ¹⁹ Ie jira naimiena naimaci siadouillanomo uitimaci. Naie illano Areópagona mameciredede. Jicanotimaci:

—¿Nie isoide o comocinuai? Caimo llono, cai uiñollena. ²⁰ Eo feiredicinuaina cacadicaí. ¿Buena nai llofuiacínodi llote? Iena uiñoiacadicaí.

²¹ Nana Atenamo ite comini, jiaie illanomona bitino diga, jamai ailli como imaci fidia rafuena

ñai-ñaidimaci. Jamai ailli fidia rafuena cacacaidimaci. Jiaie rafuena finoñedimaci.

²² Jicanua mei, Areópago railla illanomo Pablo naidacaida llote:

—Atenas imaci, omoimo rafuena lloiacadicue. Omoi jusiñamuillaina eo sedacabidomoi. ²³ Cue macarillamona, omoi jusiñamuillaina sedaja jiraraina ciodicue. Daje jirarai abimo iese cuega: “Uiñoñega Jusiñamuina sedadicaí” cuega. Uiñoñoeno naimiena sedadomoi. Ja omoimo naimiena lloiticue. ²⁴ Jusiñamui biniena jaie finode. Ie emodoconi Jusiñamuidi nana binie mo itinona jiai finode. Naimiedi mona ie Nama. Enirue ie Nama. Ie jira ima finoca jofomo naimie iñede. ²⁵ Naga jitaille rana naimie mo illa jira, naimiena canonicai. Naimie nana cominina comuitate. Jiai nagarui jafaici cai uadi caimo iga. Uanai nana rana caimo iga. ²⁶ Damiedemona nana cominina jebuitate, nana eniruemo naimaci illena. Naimaci illa dinori naimie jonega. Naimaci illanomo naimie jiai jonega. ²⁷ Iese jonega, naimaci naimiena jenollena. Jenuano, nibai naimiena baitimaci. Caimona naimie are iñede. ²⁸ Naimie jaca illa jira, cai jiai iticaí. Jiai cajedicaí. Ie isoi omoi rafue lloraini jiai llotimaci: “Naimie ie uruiadicaí”.

²⁹ Naimie caina comuitaja jira, Jusiñamuidi jirarai isoiñedena uiñoticaí. Jusiñamuidi oromona finoca ra isoiñede. Platamona finoca ra isoiñede. Noficimona finoca ra isoiñede. Ima ie onolli diga finoca ra isoiñede. ³⁰ Cominidi abi uiñoñoeno jeacino jaie finouidimaci. Jusiñamui naimacina nia janafeñede; iadedi jai birui Jusiñamuidi nana cominina naga illanomo naimaci comeciai iuai

meidollena jitaide. ³¹ Naimaci comeci*ai* iuai naimaci meidoñenia, naimie jai lloga facaise, naimacina duere finoite. Naimacina duere finollena, ie Jitona jai fetode. Naimaci finoca rafuena naimie raise uiñuamona, naimacina duere finoite. Fiodaillamona Jesúsna naimie jai jilloitaja jira, iena uiñotica*ai*.

³² Fiodaillamona Jesús jilluana cacajano, damierie jaisitimaci. Iecon*i* jia*in*odi raite:

—Jia*ir*uido o lluana dane cacajitica*ai*.

³³ Iemei naimaci motomona Pablo jino jaide.

³⁴ Naie cominimona damierie naimie dibeimo jaidimaci. Inotimaci. Naimacimona damie Areópagomo siadoudimie. Ie mamecidi Dionisio. Jia*ñ*aiño inote. Naiñaiño mamecidi Dámaris. Daje facaiseconi jiaie cominidi inotimaci.

18

Corintomo Pablo illa rafue

¹ Atenamona Corinto railla nairaimo Pablodi jaide. ² Nainomo Aquila raillamiena baisaide. Naimiedi judío imie. Ponto railla eniruedi naimie comuillano. Ie ai mamecidi Priscila. Naiñaiño diga Romamona como bitiaimaia*ai*. Romamona Claudio nana judú*ai* cominina jai oretate. Ie jirari bitiaimaia*ai*. Roma ie nanoca illaimadi Claudio. ³ Pablo iaimaia*ai* daje isoi maijia jira, Pablo iaimaia*ai* jofomo fiebide. Iaimaia*ai* conima diga maijide. Chivos itiraia*ai* ie nilla iniroina tiferisoidimaci, naiemona jofona finollena. ⁴ Naga sábadoruimo judú*ai* ofiracomo llofujete, judú*ai*na inotallena, judú*ai*ñedinona iena jia*i* inotallena. ⁵ Macedoniamona Silas, iaimaia*ai* Timoteo

diga, bitemo, Pablodí nagarui Jusiñamui uaina llofueuide. Judíuaimo: “Jesúdí cai Jilloitaraima” llouide; ⁶ ia naimie uaina ñinosiñedimaci. Jiaí naimie jinafomo jeare ñaitimaci. Naimaci comeciaí jeare ciua jira, Pablo ie ñiroina jaidínote, naimacina raillano:

—Daní omoi muidona Jusiñamui omoína duere finojite. Cue muidonañeite. Jai judíuaiñedino dine jaitícue, naimacina cue llofuellena.

⁷ Iese raillano, oni jaide. Justo jofomo jaide. Naimiedi Jusiñamuina ñnouidímie. Ie jofo judíuai ofiraco ecimo ite. ⁸ Crispodí, nana ie jofomo itino diga, cai Nama Cristona ñnote. Naimiedi judíuai ofiraco ie sedaraima. Ailluena Corintomo ite comini creyentiaína jaidimaci. Ie mei naimacidi bautizaga. ⁹ Daje naína Pablo ñicairilla isoide-mona, Pablomo cai Nama Jesucristodí llote:

—Mai jaciruiñeno. Faicaiñeno cue rafuena llocana jai. ¹⁰ O diga iitícue. Budí ona maraiñeno finoñeite. Bie nairaimo ailluena cominídi cue díbeimo jaitimaci.

¹¹ Ie jira daje año ie emodo seis fivui dinomo Pablodí fiebide, naimacimo Jusiñamui uaina llofuellena.

¹² Corinto railla nairaidí Acaya railla eniruemo jainaiáide. Naie facaise Acaya ie gobernardí Galión. Naie facaiseconi damerie judíuai comini Pablona faiacadimaci. Galión dine naimiena uitimaci. ¹³ Raitimaci:

—Cai illaíma llogacino isoi bimiedi cominina Jusiñamuina sedallena llofueñede.

¹⁴ Pablo uai oiacademo, judíuaimo Galióndí llote:

—Judíuai, cacarei. Naimie maraiñede rafuena finodena, naimie omoina jifuetena, omoi llamo nia cacarefidicue; ¹⁵ iadedi jamai naimie uaillai cuemo llotomoi. Omoi usumatiai micoriai mameciai cuemo jiai llotomoi. Omoi einamací llogacínuaína cuemo jiai llotomoi. Iena omoi coniniri siadotomoi. Bie isoide rafuena siadoiacaiñedicue.

¹⁶ Iemona naimiedi nainomona naimacína oni orede. ¹⁷ Ie mei Sóstenena gaitadimaci. Sóstenes ofiraco ie sedaraima. Naimiena gobernador uicomo fanaisite; ia naifuena Galión niese nibaiñede.

Antioquíamo Pablo abido jailla rafue

¹⁸ Naifue suilla mei, nainomo Pablo are fiebide. Ie mei creyentiaína facaduano, Priscila iaímaiaí Aquila diga, Siria railla eniruemo botedo jaide. Ie uai raise finuana uiñollena, Moisés micorí llua isoi, Cencreamo rillano, ie ifogina rijiruda garetate.

¹⁹ Efesomo rillanona, iaímaiaína fainonocaidé. Judíuai comini Jusiñamui rafuena siadollena, Pablodí judíuai ofiracomo fo jaide. ²⁰ Are naimaci motomo fiebillena naimiemo jicanotimaci; iadedi Pablo dinena uai ote:

—Fiebiñeiticue— ²¹ Naimacína facaduano, llote —. Jerusalémo jaiticue; iadedi Jusiñamui jitaia, dane omoi dine abido riitícue. —Iemei Efesomona jaide. ²² Cesareamo sijiano, Jerusalémo macarite. Creyentiaí dine jaide. Ie mei Antioquíamo jiai macarite.

²³ Nainomo are fiebilla mei, Pablo dane jaide. Galaciamo macarite. Ie mei Frigiamo macarite. Nana creyentiaí imaci comeciaina ocuiñotacana jaide.

Apolos illa rafue

²⁴ Ie facaise Efesomo Apolos raillamie Alejandría railla nairaimona ride. Judío imie. Naimie eo raise llofueuidimie. Naimiedi Jusiñamui facaina lloraini micoriai cuegafuia raise uiñote. ²⁵ Naimiedi Jesús ie rafuena navui jai cacade. Ie comecimona iena eo llote. Jesús rafuena raise llofuate; iadedi naimie dama Juan micori ie bautizajana uiñote. Nana Jesús finoca rafuena nia uiñoñede. Jusiñamui Joreño feiñuana jiai uiñoñede. ²⁶ Judíuai ofiracomo naimie llofua, jaitaiñeno llofuate. Priscila, iaimaiai Aquila diga, naiena cacadiamaiai. Ie jira naimiena oni eneno uitiaimaiai. Ie uiñoñega rafuena eo raise naimiena llofuetiaimaiai. ²⁷ Acayamo Apolodi jaiacana jira, creyentiaidi naimie comecina ocuiñotajano, naimiena oresite. Acayamo ite creyentiamo rabemo cuetimaci. Jusiñamui naimacina dueruilla jira, creyentiaina jai jaidimaci. Naimiena marena feiñollena iese cuetimaci. Nainomo naimie rillanona, creyentiaina eo canode. ²⁸ Judíuai diga marefodo jiai eo ñaite. Iemona naimaci uai ollinodi iñede. Naimiedi Jusiñamui cuegafuiaimona Jesúdi cai Jilloitaraimana llofuate.

19

Efesomo Pablo illa rafue

¹ Corintomo Apolo nia itemo, nairaiai onifedo joide naído jailla mei, Pablo Efesomo ride. Dinomo rillanona, creyentiaina baite. ² Naimacimo jicanote:

—¿Cristona omoi ñnuaruimo Jusiñamui Joreñona feiñotomoi?

Uai otimaci:

—Jusiñamui Joreñona nia jaca cacaiñedicaí.

³ Dane jıcanote:

—¿Nie isoi omoi bautizagaomoi?

Uai otimaci:

—Juan micori lloga rafue facaina bautizagacai.

⁴ Pablo uai ote:

—Mare. Juan llote: “Omoi comeciaí iuaina meido. Iemei bautizallomoi”. Ie ifo meidoitımiena comini ñnollena llote. Jesúna ñnollena llote. Jesús rafuena omoımo raise lloiticue.

⁵ Iena cacajano, cai Nama Jesús dibeido bautizadımaci. ⁶ Naimacımo Pablo ie onollina joniamaona, Jusiñamui Joreñona feiñotımaci. Ie mei naimaci uiñoñega nairai uaido ñaitımaci. Jusiñamui Joreño naimacımo llua rafuena jıai llotımaci. ⁷ Nıbai nana naimacıdı doce iıñıai.

⁸ Sábadoruimo judıuai ofiracomo fo jaillano, naimıe anamo naimaci illana Jusiñamui jitailla jira, Jusiñamui dibeimo naimaci comeciaí iuaina meiduana Pablodı jacitaiñeno eo llouide. Nainomo daje amani fıvui fiebide.

⁹ Naimacımona jıainodı Pablo uaina uaitatımaci. Jıai ñnoiacaıñedımaci. Naimaci ñnoñena ira, ofiracomo bitınomo: “Cristo rafuedı maraiñede” llouidımaci. Ie jira Pablodı creyentiaí diga naimacımona eneno oni jaide. Tiranno ie lloracomo nagarui Pablodı llofueuide. ¹⁰ Mena fiemona iese llofueuide. Ie jira diga Asia railla enıruemo ite comındı cai Nama ie uaina cacadımaci. Judıuai cacadımaci. Judıuaiñedıno jıai cacadımaci.

11 Jusiñamuidi Pablona siño rafuena finotate.
 12 Duidinomo cominidi naimie jetaca pañueluaina uitimaci. Duidinomo naimie jetaca iniroina jiai uitimaci. Naiena jetajamona, duidinodi jillodimaci. Janaba anamo itinodi jiai jillodimaci.
 13 Naie facaise jamai macarisoidino ridimaci. Judíuai imaci. Naimacidi icoriraini. Jesús mameci llinuano, jananiai anamo itinomona jananiaina oni oretaiacadimaci. Jananiaimo raitimaci:

—Pablo llua isoi, Jesús muidona bimacimona oni jai.

14 Esceva ie siete jitotiaidi iese finoacadimaci. Escevadi Jusiñamui diga ñairaima. 15 Janabana oni oretaiacadimacimo, Janaba dinena uai ote:

—Jesúna uiñoticue. Pablona jiai uiñoticue; iadedi omoina uiñoñedicue.

16 Ieconí Janaba anamo itimie naimaci emodomo daiacaide. Riire nana naimacina emodoficaide. Ie jira naie jofomona taimiaina jino aisidimaci. Naimacidi bofellaiai diga jino aisidimaci.

17 Nana Efesomo itino iena fididimaci. Judíuai, judíuaiñedino diga, naifuena fididimaci. Naifuena fidianona, eo jacinaitimaci. Iemona cai Nama Jesús mamecidi are soride. Comini dinena: “Jesús uai eo siño” raitimaci. 18 Ie jira ailluena creyentiaidi billano, imaci navui marañede finoca rafuena Jusiñamuimo llotimaci. Icorilla rafuena finuidimaci. Iena marefodo llotimaci. 19 Ailluena icorilla rafuiai illabiai atianona, marefodo jobaidimaci. Niga raifi rabiai jobaillana facadimaci. Cincuenta mil ucube diese facai ra-

biaina jobaidimaci. ²⁰ Cai Nama Jesús uaina eo llocana jaide. Cominidi naie uai siñonana uiñotimaci.

²¹ Naie rafue illa mei, Pablodi começina facajano raite: “Macedoniamo cue macarillamona, Acayamo cue jiai macarillamona, Jerusalémo riacadicue”. Ie emodoconi naimiedi raite: “Nainomona Romamo jiai jaiacadicue”.

²² Naimie nia Asiamo nano nigarui illanona, mena canoraimana Macedoniamo oretate. Timoteona, iaiaiaia Erasto diga, oretate.

Efesomo ite comini maraiñede rafue finoacadimaci

²³ Naie facaiseconi Pablo nia oni jaiñenia, Jesucristo rafue muidona Efesomo ite cominidi maraiñede rafuena comuitatimaci. ²⁴ Demetrio raillamie platamona diga rana finouide. Naimiedi Diana ie jofo joreñuaina finouide. Naimie anamo ailluena maijuidimaci. Dianadi naimaci jusiñamui. ²⁵ Naimie isoi maijuidinona Demetrio uaidote, nana naimaci danomo ofillena. Ie mei raite:

—Jai danomo ofidicai. Bie maijiamona cai ucubena uana raise uiñotomoi; ²⁶ iadedi Pablo raillamiedi diga cominina jai llofuate: “Comini finoca ranaiadi jusiñamuillaiñede”. Naie llofuia-mona ailluena comini naimie dibeimo jaidimaci. Dama Efesomo iese suiñede; iadedi ua nana Asiamo iese suide. ²⁷ Ie jira abina rairuiacadicai, cai maijille faifi raillano, comini Diana jofona jiai sofei raillanona. Cominidi naiñaiñona ebiruil-lana feittaitimaci. Naiñaiñori rajicaiñeitimaci. Dianadi eo ebirede jusiñamui. Nana Asiamo ite comini naiñaiñona sedacabidimaci. Uanai

nana bie eniruemo ite nairaidi naiñaiñaona sedacabidimaci. Ie jira abina rairuiacadicaí.

²⁸ Iena cacajano, eo iciritimaci. Riire cuiriidimaci:

—¡Efeso ie Diana eo ebirede!

²⁹ Danirie siadamona, nana comini eo failliñaidimaci. Iemo nana comini dajena naimaci ofiracomo fo raire jaisite. Gayona, iaiaiaiaí Aristarco diga, gaitajano uitimaci. Naie iaiaiaiaí Pablo ie nabai iaiaiaiaí. Iaiaiaiaí comuillanodi Macedonia. ³⁰ Pablo ofiracomo jiaí fo jaiacade; iadedi creyentiaídi naimie fo jaillana rairuidimaci. ³¹ Illaicominimona damierie nabaiñaiaí naimiemo fo jaillana jiaí rairuidimaci.

³² Fo itinomona damierie daje rafuena ebena cuiriidimaci. Jiaíno jiaífuena ebena cuiriidimaci. Eo failliñaidimaci; ie iadedi bue ñellena naimaci ofillana raise uiñoñedimaci. ³³ Comini motomona judíuaí dinena damie uicomo oredimaci. Ie mamecidi Alejandro. Cominina llícaitallena, ie onolli jaidianona, cominimo lloiacade; ³⁴ iadedi naimie judío imiena naimaci uiñuanona, nana daacaiño cuiriidimaci. Mena horas raifi cuiriidimaci:

—¡Efeso ie Diana eo ebirede!

³⁵ Iemei naie nairai rabe cueraimadi cominina llícaitatate. Naimaci llícailla meinoconi, naimie lluacinona cacadimaci. Raite:

—¡Cacarei! Cai nairaidi Dianana sedacabidicaí. Naiñaiño ebirediñaiño. Naiñaiñaona eruaide jiraraidi monamona jaie uaide. Iena jiaí sedacabidicaí. Nana bie eniruemo ite comini iena uiñotimaci. Bu naiena uiñoñedimiena jaca iñede.

³⁶ Bu cue lluana jaca uaitañeite. Ie jira omoi llícaí. Comeciaí facañeno buena finoñoeno. ³⁷ ¿Bue ñellena

Gayo iaímaiaí Aristarco díga, benomo atidomoi? Iaímaiaídi cai jusiñamui joreñona ñaiñediímaiaí. Naiñaiñona jeare finoñediímaiaí. ³⁸ Demetrio, ie maijiraini díga, iaímaiaína llogidoiacania, cominina llogidoraco ite. Díga jueces jiaí ite. Coniniri nainomo iena siado; ³⁹ iadedi jiaí nicino omoimo ia, cai illaicomini ofia, biena siaduanu, caimo lloitimaci. ⁴⁰ Birui bie rafue cai finua jira, illaicomini nibai caina duere finoitimaci. ¿Niese cai nibaille? Illaicomini caimo biena jicanoia, ¿niese raiticaí?

⁴¹ Naie llua mei, ofidinona jino orede. Iemei jai jono tuudimaci.

20

Macedoniamo Pablo dane jailla rafue

¹ Efesomo ite rafue suilla mei, Pablodi creyentiána uaidote. Naimaci comeciána ocuiñotafuena llote. Iemei naimacina naimie facaduanu, Macedonia railla eniruemo jaide.

² Nainomo ite nairaiaimo macarite. Comecina ocuiñotalena, naimacina llofuecana jaide. Iese Macedoniamona Grecia railla eniruemo risaide.

³ Nainomo daje amani fivui illa mei, Siriamo botedo abido jaiacade; iadedi judíuaidi naimiena meineiacanana Pablo fidiano, Macedoniamu abido macarite. ⁴ Jiaíno naimie díga jaidimaci. Sópater jaide. Naimiedi Berea nairaí imie. Pirro jito. Aristarco, iaímaiaí Segundo díga, jaide. Tesalónica nairaí imie iaímaiaí. Gayo naimie díga jiaí jaide. Gayodi Derbe nairaí imie. Timoteo naimie díga jiaí jaide. Tíquico, iaímaiaí Trófimo díga, jiaí jaidiímaiaí. Asia imie iaímaiaí.

⁵ Coco uicodo naimaci jaillano, Troamo cocona sedadimaci. ⁶ Llomenico guillaruillaí railla rafue fuilla mei, Filipomona jaidicoco. Monailaido dabecuirorui coco jailla mei, Troamo naimaci diga dane danomo dafaifidicoco. Nainomo siete digarui fiebidicoco.

Troamo Pablo illa rafue

⁷ Domingoruimo Jesús fiodaillana começillena, danomo ofidicaimo, Pablodí caina llofujete. Icoiti naimie jaiacana jira, Pablo are ñaite. Naiona jitoma daferui illa facai nia ñaite. ⁸ Cai ofillanomo ailluena lamparíniaí ite. ⁹ Pablo are ñaia jira, daje coniruemo iniaicidí suide. Naie conirue mamecidi Eutico. Naimiedi ventanamo raide. Naimie eo inia jira, ventanamona ana uaide. Tercer pisomo a iticai. Nainomona eniruemo naimiedi uaide. Ana jibuisaibidemo, naimiena meniñocaidemo, naimie jai fiodaillana ciodimaci. ¹⁰ Ie jira Pablo ana jaide. Naimie emodomo jitadacaida, naimiena meniñote. Cominimo llote:

—Omoí rucaicueriñeno. Naimie cajede. Jafaicina nia faite.

¹¹ Abido a jaidimaci. Jesús fiodaillana começillena, llomenicono tairuano, cominimo Pablo fecade. Guilla meinomo, naimaci diga naimie are ñaite, monaiacademo. Ie mei oni jaide.

¹² Nainomona conirue jai cajede uitimaci. Ie jira nana naimaci naimieri eo iobidimaci.

Mileto railla nairaimo Pablo jailla rafue

¹³ Pablodí Troamona Asón railla nairaimo arido jaiacana jira, botedo jaidicai. Iese uicomo Asónmo jaidicai. Nainomona Pablona botedo uiacadicai.

¹⁴ Ie jira Asónmo naimiena cai baillanona, cai diga

botemo bite. Ie mei Mitilene railla nairaïmo jaidicai. ¹⁵ Nainomona dane monaillaido cai jaillano, ie areruido Quío railla nairaïmo ruicafabellemo jaidicai. Dane ie areruido Samos railla nairaï mamedo atona jaidicai. Ie areruido dane cai jaillano, Miletomo sijidicai. ¹⁶ Abi juarenia, Pentecostés railla rafue suilliruimo naimie Jerusalémo iacade. Pentecostés trigo ua ie rafue. Pascua rafue illa meinoconi, cincuenta digarui illanona bie rafue ite. Asia railla eniruemo naimie are iacaiñena jira, Pablo comecina facade: “Efeso ecido monaillaido jaiticai”.

Efeso mo ite creyentiaï sedarainimo Pablo llua rafue

¹⁷ Creyentiaïna sedarainina uaidollena, Miletomona Efesomo Pablo cartana orede. ¹⁸ Naimie dine naimaci rillanona, Pablo naimacimo llote:

—Asiamo nano cue rillaruimona, niese omoï diga nagarui cue illana uiñotomoi. ¹⁹ Cai Nama diga abina iedoñeno maijuidicue. Eecana sure maijidicue. Judúuai cuena duere uiñodosia jira, ie facaiseconi dueredicue. ²⁰ Cuemo ite marecinona omoïmo jaca janoñedicue. Nana Jusiñamui rafuena omoïmo jai lloticue. Omoï ofillanomo omoïna llofueuidicue. Omoï jofuemo omoïna jiaï llofueuidicue. ²¹ Judúuaïna llofueticue. Judúuaïñedinona daje isoi llofueticue. Jusiñamui ðibeïmo omoï começiaï iuaina meiduana lloticue. Cai Nama Jesúna omoï ðnuana jiaï lloticue. ²² Jusiñamui Joreñodi cuena jai jaicaitaja jira, Jerusalémo birui jaiticue. Nainomo ramo cue jirille rafuena uiñoñedicue; ²³ iadedi Jusiñamui Joreño naga nairaïmo cuemo llote: “Llaveracomo

ona gaitajano ona jonesiite. Duere sefuitio".
²⁴ Cue ille dinori are illemo comecina facañedicue. Dama cue ille dinori fuidoiacadicue. Cai Nama Jesúmona cue feiñoga maijana fuidoacadícue. Mare rafuena omoimo lloiacadicue. Jusiñamui omoína duenaillana jiaí llotícue. ²⁵ Jusiñamui anamo omoí illa rafuena omoimo jai llotícue. Jai dane cue uiecona cioiñeitomoi. Iena uiñotícue.
²⁶⁻²⁷ Cue uaina jaca janoñedicue; ia nana Jusiñamui uai omoimo llotícue. Ie jira cuemona omoí diga cue comeci mare. Jusiñamui uaido omoí jaiñenia, cue muidonañeite. ²⁸ Mai omoí abi rairui. Jusiñamui Joreñodi omoína creyentiaina sedatate. Naimacina raise seda. Jusiñamui dibeimo itinona llofue. Naimie Jito fodailla muidona, naimacina ote, naimie iena. ²⁹ Naimacidi toica llaudaiaí isoidimaci. Nia abina raise uiñoñedimaci. Cue jailla meinoconi, taino llorainidi, janallari isoi, omoimo biite. Naimaci nana omoí sedaca comina ramo faite, danomo abido naimaci jaillena, jiconiaí llaudaiaí gaitaja isoi. ³⁰ Omoímona uanañedicinona llorainidi iite. Creyentiaina ramo faitimaci, omoí llucina fainonocaillena, naimaci dibeimo illena. ³¹ Ie jira abina rairui. Bie rafuena feitaño. Daje amani fiemona nana omoína jai llofuetícue. Naiona omoína llofuetícue. Aremona omoína jiaí llofuetícue. Omoína cue duenaillamona, eianona omoína llofuetícue. ³² Mai. Cai Nama illa anamo omoína fainonocaitícue. Naimie uaimona naimie omoína duenaillana jai uiñotomoi. Naie uaidi omoína jiaí ocuiñotaite. Iemona Cristona inocana jaitomoi. Nana naimie fetocano diga naimie illanomo ico jaca iitomoi. ³³ Jiaíno ie

ucubena jaca nicidoñedicue. Bu ie iniroillaina jaca jiai oiacañedicue. ³⁴ Cue jitaille rana dama cue maijiano oticue. Cue diga jaidino imaci jitaille rana jiai dama cue maijiano oticue. Iena nana omoidi uiñotomoi. ³⁵ Iese cue illamona omoina llofueticue. Iese maijiano duerede cominina canocana jaiacadicaí. Cai Nama Jesús ie llogacinona uiñoticaí. Naimie raite: “Raruiaina cai feiñoia, iobidicaí; iadedi cai eo iobiacania, jiaínomo raruiaina fecadicaí”. ³⁶ Naie llua meino, naimaci diga cañici ifodo rainadajano, Jusiñamuimo jide. ³⁷ Nana naimacidi eo eedimaci. Pablona caimaduanona, naimiena llibanotimaci. ³⁸ “Cuená dana cioñeitomoi” naimacimo llua jira, eo sunaitimaci. Ieconí naimie diga botemo jaidimaci.

21

Jerusalémo Pablo jailla rafue

¹ Naimacina cai facadua meinoconi, suiñodicaí. Cos railla nairaimo atona jaidicaí. Ie are Rodas railla uiasimo ridicaí. Iemei Pátara railla nairaimo ridicaí. ² Nainomo Fenicia railla eniruemo jaiacade botena baiticaí. Nai botemo cai jailla mei, suiñodicaí. ³ Chipre railla uiasina cai ciojia, cai nabei díbeimo ite. Iemei Siria railla eniruemo jaidicaí. Tiro railla nairaimo sijidicaí. Botedo uiga raruiaina nainomo joneacadimaci. ⁴ Tiromo ite creyentiaí cai baillanona, siete digarui naimaci diga iticaí. Jerusalémo naimiena judíuai meineñellena, nainomo naimie jaiñellena, Jusiñamui Joreño naimacina Pablomo llotatate. ⁵ Digarui illa

meinomo oni jaidicai. Naie nairaimona nana naimaci cai diga jaidimaci. Riñoniai, naimaci uruiyai diga, jaidimaci. Caiñici ifodo monaillai fuemo ana rainadajano Jusiñamuimo jaidicai. ⁶ Naimaci facadua meinoconi, botemo jaidicai. Naimaci imaci jofuemo abido jaidimaci. ⁷ Tiromona Tolemaida railla nairaimo jaidicai. Creyentiaina uaiduano, darui naimaci diga iticai. ⁸ Ie are jaillano, Cesareamo cai ria, Felipe jofomo jaidicai. Felipedi Jesucristo ie rafuena lloraima. Jerusalémo diáconuaina creyentiai jaie fetua facaise, Felipeña fetodimaci. ⁹ Naimie dinomo fiebidicai. Naimiemo cuatro jisa ite. Naiñaiñuainia iima abina uiñoñede. Jusiñamui naiñaiñuaimo llucacina llocabitimaci.

¹⁰ Digarui nainomo cai illamo Judeamona damie bite. Naimie mameci Agabo. Jusiñamui facaina lloraima. ¹¹ Caimo ria, naimiedi Pablo cinturóna aiñode. Naie diga ie eillina maite. Ie onollina jiai maite raillano:

—Jusiñamui Joreño raite: “Jerusalémo judíuai illaicomini bie cinturón jainaoide imana daje isoi maitimaci. Judíuaiñedinomo naimiena fecajitimaci” raite.

¹² Naiena cai cacajano, naie comini diga, Pablona caididicai, naimie Jerusalémo jaiñellena.

¹³ Pablo uai ote:

—¿Bue ñellena eedomoi? ¿Bue ñellena cue começina ocuiñoñaedomoi? Cue maiana jaca jitaidicue. Ua cue fiodaillana jaca jiai jitaidicue. Cue Nama Jesús muidona cue fiodaiadedi, damamai fiodaiticue.

14 Cai lloga uai naimie ñnoñena muidona, raiticai:

—Cai Nama jitaille rafuena finuana jitaídicaí. — Iemei llicaidícaí.

15 Nano nigarui illanona, cai raruiaina finuano, Jerusalémo jaidícaí. 16 Cesareamo ite creyentiaimona jiaíno cai díga jaidímaci. Mnasón jofomo caina uitímaci. Naimiedi Chipre railla uiasi imie. Naimiedi nano bie rafue tainiamona creyente.

Jacobo díga Pablo ñaia rafue

17 Jerusalémo cai ria, creyentiaídi caina caimare uaidotímaci. 18 Ie are Pablo, cai díga, Jacobo díne jaide. Nana creyentiaína sedaraini nainomo jai ofidímaci. 19 Uaidua mei, Pablo nagacínuaído Jusiñamui judíuaíñedinomo finoca rafuena llote:

—Cue llofuiamona ailluena judíuaíñedíno creyentiaína jaidímaci—llote.

20 Naie rafuena cacajano, Jusiñamuimo iobil-lacinona fecadímaci. Iemei naimiemo llotímaci:

—Ama, ero, judíuaímona ailluena comíni jai creyentiaína jaidímaci; ia nana naimaci Moisés micorí llogacínodo eo jaidímaci. 21 O finoca rafuena jai fididímaci. Ona comíni ñaiana jai fididícaí. Jiaie nairai motomo ite judíuaína Moisés micorí llogacínona fainonocaillana llofuetío. Naimaci uruiái abína deñenana llofuetío. Moisés micorí llogacínuaído jaiñellena llofuetío. 22 Ie jira ¿niese nibaitícaí? O rillana jai fididímaci. 23 Ie jira omo cai lluaña fino. Cai ecímo cuatro íma jai ite. Nie isoide rafuena Jusiñamuimo jai llotímaci. 24 Jusiñamui jofomo naimacína uiño. Naimaci díga Moisés micorí llua isoi, o abi fino. Naie rafuena raise fuidollena, Jusiñamuimo fecallena, toíca

ocainaiaina naimaci facaina iba. Naie rafue omoi fuiduanona, omoi ifogina rijiruda gareitomi. Ie mei nana comini mare rafuena o finocana jaillana uiñoitimaci. Moisés micori llogacinodo o nia jaillana uiñoitimaci. Iese omo lloiacadicaí.
²⁵ Judíuaiñedino Moisés micori llogacinodo jaillena lloñeiticaí. Naimacimona creyentiaína jaidinomo navui cueticaí: “Jiraraimo fecaca rana riñeno. Diruena riñeno. Llerinoga rana riñeno. O aiñede riño diga iñeno. O iniñede iima diga iñeno” cueticaí.

²⁶ Pablo “Jee” raillanona, nai cuatro iima diga ie are Moisés micori llogacinona finuano, Jusiñamui jofomo jaide, naimie ie finoca rafue fuillarui llo-lena. Jusiñamui nagamiaí rana fecajaruina jai llote. Siete digarui illanona, Moisés micori llua isoi, naie rafuena fuidoiacadimaci.

Pablona gaitaja rafue

²⁷ Naie siete iruillaí fuiacanuillaímo Asiamona damierie judíuaídi bitimaci. Jusiñamui jofomo Pablona ciuano, comini comeciaina feidocana uitimaci. Pablona gaitajanona,
²⁸ cuiiriidimaci:

—Caimaci, caina cano. Bimie naga illanomo llo-fuiamona, cominina raise itatañede. Moisés micori llogacinuaido jaiñede. Bifona raise sedañede. Judíuaiñedino bifomo atiano, bie mare jofo naimie jai jeare finode.

²⁹ Iese ite: Jerusalémo Trófimo diga Pablona cioidimaci. Trófimodi Efeso nairai imie. Judíuñedimie. Pablo naimiena Jusiñamui jofomo uillamo comecina facadimaci; iadedi uiñede. Judíuai cominimona judíuñedimie Jusiñamui jofomo jaillana maraiñede. ³⁰ Asiamona bitino

cuirillamona, nana Jerusalémo ite comini icirinaidimaci. Aisicana Jusiñamui jofomo jarire ofidimaci. Pablona gaitajanona, naifomona naimiena jino sonodimaci. Ie mei Jusiñamui jofona sedaraini nasena ibaidimaci. ³¹ Pablona meineiacania, soldaduai ie comandantedi nana comini ieillana fidide. ³² Ieconí naimiedi, ie soldaduai diga, nana ie illaicomini diga, comini dine aisicana bitimaci. Ie jira cominidi naimacina ciuano, Pablona fajana fainonocaidimaci. ³³ Comandante naimiemo iaireicaia, Pablona gaitade. Naimiena mena lloeo diga maillena llote. Jicanote:

—¿Bu naimiedi? ¿Bue ñete?

³⁴ Nana ieidinodi jiaiforie llotimaci. Ie jira naie rafuena naimie jaca uiñoñede. Ie muidona cu-atelmo naimiena uillena llote.

³⁵ Cuartel tidabacuimo naimaci ria, comini jarire jailla jira, soldaduai Pablona uitimaci.

³⁶ Ailluena comini racadimaci. Ocuioisite:

—¡Naimiena meine!

Pablo ie abiridua llua rafue

³⁷ Cuartelmo jaiacania, Pablo comandantemo llote:

—O diga ñaiacadicue.

Raijicaillamona, naimie uai ote:

—Griego uaido ñaitio— ³⁸ Jiai llote—. Egipto imieñedio. Navui jobaime finodio. Jofue iñenanomo, cuatro mil cominina meinetinona uitio.

³⁹ Pablo uai ote:

—Naimieñedicue. Judío imiedicue. Ciliciamo ite Tarso railla nairaímona biticue. Naie nairai

mamecidi are soride. Cominimo cue lollena, omo jicanoiacadicue.

⁴⁰ —Jee —raite. Pablo tidabacui muidomo naidaide. Cominina llicaitallena, ie onollina jaidide. Comini llicaila mei, Pablo judíuai uaido naimacimo llote:

22

¹—Caimaci, einamaci, cue abi riiduacinomo mai omoi cacarei.

²Naimie judíuai uaido llwana naimaci cacajano, llicaidimaci. Ie jira Pablo llote:

³—Judío imiedicue. Ciliciamo ite Tarso raila nairaimo jeicigacue. Bene omoi nairaimo escuelamo jaidicue. Gamalielmona fueoticue. Moisés micori llogacinuaina eo raise facadicue. Jusiñamui rafuedo birui omoi isoi jaidicue.

⁴Jesucristo inotinona jaie eo duere finodicue. Diga creyentiaina maianona, cárcelmo joneticue. ñiaina duere finodicue. Riñoniaina jiai duere finodicue. ⁵Jusiñamui diga nanoca ñairaima cuena uiñote. Nana omoi illaicomini cuena uiñotimaci. Creyentiaina duere finollena, naimacimona dajerie cartana jaie feiñoticue. Damascomo ite judíuaimo cuetimaci. Damascomo jaidicue, nainomo ite creyentiaí maiano, Jerusalémo atianona, naimacina duere finollena.

*Pablodí Jesúna inuana llua rafue
(Hch 9.1-19; 26.12-18)*

⁶Omoimo bie rafuena lloiticue. Jerusalémona jaidicue; iadedí Damascomo cue iaireicaia, jitoma naidai iacania, ieconi monamona damie cue abina eo quetiñote. ⁷Eniruemo ana uaidicue.

Monamona damie cuemo llwana cacadicue: “Saulo, Saulo, ¿bue ñellena cuena duere finodio?”
 8 Jicanoticue: “¿Budio?” Monamona damie uai ote: “Nazaret ie Jesúsicue. Cuena duere finodio”.
 9 Cue diga itinodi cue quetiñua rana cioidimaci; iadedi cue diga ñaitimiena cacaiñedimaci.
 10 Raiticue: “Nama, ¿bue ñeiticue?” Cai Nama cuena raite: “Naidadajanona, Damascomo jai. Nainomo o finolle rafuena omo lloiticue”.

11 ‘Cuena eo quetiñua jira, cioiñedicue. Cue diga itino cue onollido llinocaida, Damascomo cuena uitimaci.
 12 Nainomo Ananías raillamiedi ite. Jusiñamuina eo ñinote. Moisés micori llogacinuaido eo jaisoide. Nainomo ite judíuaidi naimiena: “Mare” raitimaci.
 13 Naimie cuemo bite. Cuemo llote: “Saulo, ama, mai oni eroda”. Ieconí dane erodajanona, naimiena ciodicue.
 14 Naimie raite: “Cai usumatiai micoriai ie Jusiñamuidi ona fetode, naimie jitaille rafuena o uñollena, ie mare Jitona o cioillena, naimie uaina o cacareillena.
 15 Nana cominimo naimiena lloitio. Nana o ciua rafuena lloitio. Nana o cacaja rafuena jiai lloitio.
 16 Mai cue llwana ñino. Naidadajanona, o jecino oni dotallena, Jusiñamuimo jica. Ie mei bautiza” raite.

Judíuainedonomo Pablo jailla llua rafue

17 ‘Ie mei Jerusalémo abido cue billa mei, Jusiñamui jofomo Jusiñamuimo cue jia, ñicairiticue isoidicue.
 18 Cai Namana ciodicue. Cuemo llote: “Jerusalémona raire mai jai. Cominidi o cuena llwana feiñoñeitimaci”.
 19 Uai oticue: “Nama, naga judíuai ofiracomo ona ñnotinona fauidicue. Cárcelmo naimacina joneuidicue. Nama, Jerusalémo itino iena uñotimaci.

²⁰ Esteban micori fiodailla facaiseconi nainomo iticue. Naimie o facaina lloraima. Naimie fiodailla jira, iobidicue. Naimiena meinetino iniroina sedadicue”; ²¹ iadedi cue Nama cuemo llote: “Mai jai. Judíuaiñedinomo ona are oretaiacadicue”.

Comandante anamo Pablo illa rafue

²² Bie lloga dinori comini Pablo llua na cacadimaci. Iemei cuiriidimaci:

—Bie isoide ima illana benomo jitaiñedicaí.
¡Naimiena meine!

²³ Cuirillamona naimaci iniroina jaidisite. Icirisiano eniruena jiai fadosite. ²⁴ Judíuai uaido cominimo Pablo llua jira, comandante iena cacaiñede; iadedi comini icirillana cianona, naimie llote:

—Naimiena cuartelmo uiño. Naimiena fano. Naimiemo ite rafuena caimo naimie llollena, naimiena duere fino.

²⁵ Naimiena maiano naimiena fallena, Pablodi nainomo ite capitámo jicanote:

—¿Juez nia lloñenia, romano nairai imiena fajana mare? Romano nairai imiedicue.

²⁶ Capitán iena cacajano, comandante dine jaide. Iena llote. Jicanote:

—¿Niese nibaiiticaí? Bimie romanuai nairai imie.

²⁷ Iena cacajano, comandante bite. Pablomo jicanote:

—¿O Romano nairai imiedio?

Pablo uai ote:

—Jii.

²⁸ Comandante dinena raite:

—Romanuai nairai imiena cue jaillena, eo ibadicue.

Pablo uai ote:

—Romanuai nairai imiēna jeicigacue.

²⁹ Ieconi naimiēna duere finoacadino naimiēmona raire oni jaidimaci. Pablo romanuai nairai imiēna jira, naimiēna jai ebena maia jira, comandante jiai jacinaiite. Comecina nibai facade: “Iese naimiēmo cue finua jira, ie ibana ollena, cue illaimamo cuena jiai llogidoite”.

Illacomini motomo Pablo illa rafue

³⁰ Comandantedi judiui Pablona llogiduana ua raise uiñoiacade. Ie jira ie are Pablona suiñollena llote. Jusiñamui diga nanoca ñairaini, nana judiui illacomini diga, ofillena llote. Pablona atiano, naimaci motomo uillanona, naimiēna naidanete.

23

¹ Ie abina riidollena, Pablo naie judiui illacomini motomo ite. Naimacimo eruaillano, Pablo raite:

—Caimaci, cuemona nana cue illa dinori Jusiñamui jitailla rafuena finocabidicue. Naimiēmona cue começi mare.

² Ananíadi Jusiñamui diga nanoca ñairaima. Pablo llwana naimie gaiñenamona, Pablo ecimo itinona Pablo fuena farotate. ³ Pablo dinena naimiēmo llote:

—Jusiñamui o fuena faroite. Mareuidimienā abina caitadio. Moisés micori llogacinuai muidona benomo itio, cuemo lollena; iadedi cue finoca rafuena raise o uiñoñoeno cue fue ebena farollena llotio.

⁴ Nainomo itino raite:

—Jusiñamui diga nanoca ñairaimamo jeare ñaitio.

⁵ Pablo uai ote:

—Moisés micorí iena jaie cuiana uiñoticue. “Illaicomínina jeare ñañeno” cuete. Caimaci, naimie Jusiñamui diga nanoca ñairaima illana uiñoñedicue. Uiñoticuedena, naimiemo iena lloñedicue.

⁶ Comínimo Pablo eruaillamona, saduceuai railla comín nainomo illana ciode. Fariseuai railla comín nainomo illana jiai ciode. Ie jira naimacimo ado llote:

—Caimaci, fariseo imiedicue. Fariseo imie jitodicue. Fiodaillamona ico jilluacínomo ocuriticue. Ie jira bene cuena llogidoiacadomoi.

⁷ Naimie iena lloia, naimaci comeciái daje isoi lloñedimaci. ⁸ Saduceuai comínidi fariseuai comín isoi ñnoñedimaci. “Fiodaillamona jilloñeiticái” saduceuai comín raillana ñnoside. “Jusiñamui jaienisaí ññede. Comín joreñuái ññede” raillana ñnoside; iadedí fariseuai comín dinena nana naie rafue illana ñnotimaci. ⁹ Ie jira eo failliñaidimaci. Fariseuai motomona jaino naidadajanona, llote:

—Bimiemo jeacino ññede. Jusiñamui jaienici naimiemo ñbaí jaie llua mona, bie rafue naimiemo ite.

¹⁰ Naimaci iese riire failliñaidimaci. Naimaci Pablona llagui raillano, comandantedí soldaduaímo cuartelmo naimiena uillena llote.

¹¹ Ie are naiona cai Nama Pablomo bairede. Raite:

—Comecina ocuiño. Jerusalémo cuena o llua isoi, Romamo cuena jiai lloitió —raite.

Pablona meineiacana rafue

¹² Monaidemo, judíuaimona jiaino comeciaina facadimaci: “Pablona nia cai meineñenia guiñeiticai. Jiroñeiticai”. ¹³ Cuarenta baifemo ite comini iese comeciaina facadimaci. ¹⁴ Naimaci judíuai illaicomini dine jaillano, raitimaci:

—Dani comeciaina facadica: Pablona nia cai meineñenia, jaca buena guiñeiticai. ¹⁵ Omoi dine Pablona atillena, naimiemo eo raise jicanua isoi, comandantemo jicano. Pablo iairei bia, naimiena cai meinellena, ocuidoitica.

¹⁶ Pablo enaise naie rafuena fidiano, cuartelmo jaide, Pablomo lollena. ¹⁷ Iena cacajano, Pablodi capitána uaidote. Raite:

—Bie coniruena comandante dine uiño. Naimie diga ñaiacade.

¹⁸ Ie jira naimiena uite. Raite:

—Cuartelmona Pablo cuena uaidote. Bie conirue omo atillena cuemo jicanote. O diga ñaiacade.

¹⁹ Naimie onollina comandante llinocaida, bai ie atianona, naimiemo jicanote:

—¿Bue cuemo lloiacadio?

²⁰ Naimie uai ote:

—Ico are Pablona illaicomini dine uillena, naimiemo eo raise jicanua isoi, omo jicanollena, judíuai dani comeciaina facadimaci. ²¹ Naimaci jitailla isoi finoño. Cuarenta digamie baifemo naimiena reiduanu sedadimaci. Llotimaci: “Guiñeiticai, jiroñeiticai, Pablona nia cai meineñenia”. Naimacidi omo jicanolle rafuena o finollena sedadimaci.

²² Comandante coniruena facaduanu raite:

—Jaca bumo cuemo o llwana lloño.

Félix dine Pablo oretaja rafue

²³ Comandante mena capitána uaidote. Llote:

—Doscientos soldaduaina uaido, imaci raruiaí finollena, Cesareamo navuida baife imaci jaillena. Setenta caballuaido jaitino uaido. Doscientos ducirainina jiaí uaido. ²⁴ Jiaíe caballona ati, naie emodomo rainadacaida Pablo jaillesa. Félix railla gobernador dine naimiena raise uiño — llote. ²⁵ Cartana jiaí cuete. Iese cuete: ²⁶ “Félix, omo cueticue. Claudio Lisiasdicue. Cai mare gobernardio. ¿Nigacino? Cue uai o dine oredicue. ²⁷ Damie o dine oredicue. Judíuai naimiena meineiacana jira, soldaduai diga naimiena gaitaticue. Naimiena gaitataja mei, naimiedi romanuai nairai imienana fididicue. ²⁸ Judíuai illaicomini dine naimiena uiticue, naimaci llogiduacinona raise cue uiñollena. ²⁹ Naimaci einamaci llogacínuaí muidona naimiena llogidotimaci. Iena fididicue. Naimie jaca buena finoñede. Naimiena meinellena, naimie cárcelmo jonellena lloiacaiñedicue. ³⁰ Jiaíno naimiena dane meineiacanana fididicue. Ie jira o dine naimiena oretaticue. Ie llogidotino o dine jaillena jiaí lloiticue. Naimaci naimiena omo lloitimaci” cuete.

³¹ Comandante llua isoi, soldaduai naíona Pablona Antípatrismo uitimaci. ³² Ico are eillido jaide soldaduai cuartelmo abido bitimaci; ia Pablo caballuaido jaidino diga oni jaide. ³³ Cesareamo railla nairaimo rillanona, gobernardormo cartana fecadimaci. Naimie dine Pablona jiaí uitimaci. ³⁴ Gobernador cartana facade. Ie mei Pablomo ie nairai illanona jicanote. Pablo uai ote:

—Cilicia.

³⁵ Gobernador dinena raite:
—O llogidotino bia, o rafuena cacajiticue.
Soldaduaïmo jiaï llote:
—Omoï anamo Herodes railla illaïma micorï jo-
fomo naimïena seda.

24

Félix ðine Pablo riidua rafue

¹ Dabecuirorui illa mei, Ananías bite. Naimïedi Jusiñamui ðiga nanoca ñairaïma. Jiaïe illaïcomïni ðiga bite. Tértulo raillamïe jiaï bite. Naimïedi llogïdoraïma. Gobernadormo Pablona llogïduaïbitimaci. ² Pablona uaidua mei, gobernadormo Tértulo Pablo finoca rafuena llote:

—Félix, bie rafue omo lloiticue. Eo mareuidimïedio. O muidona eo uri iticai. Cai nairaïna canollena, ðiga mare rafuena finodio.

³ Jobillamona, nana cai iena feiñotïcai. ⁴ Ona iciacaiñedicue; iadedi o fue maria jira, cue lluomo dallu cacarei. ⁵ Bimïedi eo cai abïna aruire finode. Nana enïruemo ite judïuaina uri itatañede. Naimïedi Jesús raillamïe rafuedo jaidïno illaïma.

⁶ Jusiñamui jofona jeare naimïe finoiacana jira, naimïena gaitadïcai. Moisés micorïllogacïnuaido naimïena duere finoacadïcai;

⁷ iadedi comandante Lisias ride. Caïmona naimïena riïre bairode. Naimïena cai llogïdollena, o ðine cai billena caïmo llote.

⁸ Pablomo o jïcanoïacania, naimïemona bie rafuena uiñoitïo. Nana naimïena cai llogïduacïnona uiñoitïo.

⁹ Judïuai illaïcomïni, Tértulo llua isoi, dacïnodo llotimaci.

¹⁰ Iemei gobernador dinena Pablomo llote:

—Mai o facaina o ñaïno.

Ie jira Pablo ñaite:

—Diga años cai nairai o anamo iticai. Ie jira cue abina riiduacinona omo marefodo lloiticue. ¹¹ Doce digarui illanona, Jerusalémo como birui ridicue. Iena uñoiacadiosa jiaie cominimo jicano. Jusiñamuina sedallena, Jerusalémo iticue. ¹² Bu diga conima uaina jaca uaitañedicue. Jusiñamui jofomo uaina uaitañedicue. Judíuai ofiracuaimo uaina jiai uaitañedicue. Naisomo uaina jiai uaitañedicue. Cominina uri itatañenana lloñedicue. ¹³ Nie isoide rafuena cue finuana cioñedimaci. Ie jira cuena raise llogidonidimaci; ¹⁴ iadedi jiaie rafuena lloiticue. Cai usumatiai Jusiñamuina sedadimaci. Naimiena jiai sedadicue. Nana Moisés llogacinuaina ñnoticue. Nana Jusiñamuina lloraini micriai cuegafuiaina ñnoticue. Bimacimona jiaie llogacinuaido jai jaidicue. Bimacimona uanañedicinodo jaidicue. ¹⁵ Fiodaillamona comini ico jilloillena ñnoticue. Jusiñamuina ñnotino jilloitimaci. Jusiñamuina ñnoñedino jiai jilloitimaci. Beno itino iena jiai ñnotimaci. ¹⁶ Ie jira marena iacadicue, “Maraiñede rafuena Pablo finode” comini lloñellena, “Maraiñede rafue Pablo finode” Jusiñamui lloñellena. ¹⁷ Diga años Jerusalémo abido biñedicue. Jerusalémo ite dueredinona canollena, ucubena birui atidicue. Jusiñamuina jiai sedajaibidicue. ¹⁸ Moisés micori llua isoi, cue abi marena finuano, nairui Jusiñamui jofomo cuena baitimaci. Aillena comini cue diga iñede. Cominina iciritañedicue. ¹⁹ Naie facaise Asiamona jiaie judíuai bitimaci. Cuemo nicino ia, ¿bue ñellena naimaci bene biñedimaci, cuena llogidollena?

20 Naimaci biacaiñenia, ¿bue ñellena bene itino bie rafuena raise lloiacaiñedimaci? Naimaci motomo Jerusalémo cue ia, maraiñede rafuena cue finuana lloñedimaci. 21 Navui naimaci motomo cue lloticue: “Fiodaillamona comini ico jilloitimaci”. Iena birui ñaitimaci. Ie jira cuena llogidoiacadimaci.

22 Félixdi Jesús díbeimo itino rafuena raise uñua jira, Pablo rafuena nairuido siadoiacaiñede.

—Comandante Lisias bia, dane omoi rafuena siadoiticue —raite. 23 Félix capitámo Pablo cárcelmo sedajana llore. Naimiena maiñellena jiai llore. Naimiena canollena, naimie nabaiñiai naimie dine jaillena rairuiñede.

24 Diga irui illa mei, Félix, ie ai diga, bite. Naiñaiño mameci Drusila. Naiñaiñodi judía iñaiño. Pablona uaidua mei, Pablo llofuiana cacadiiaimaiai. Jesúna ñnuana cacadiiaimaiai. 25 Jeacino finoñellena, dama ie jitailla rafuena finoñellena, jiairuido Jusiñamui ricaillafue anamo iñellena cacadiiaimaiai. Pablo llofuiamona Félix jacinaite. Ie jira raite:

—Jai macaibaite. Cue abi juarelliruido ona dane uaidoiticue.

26 Pablo jino jaille iballe ucubemo ocuride. Ie jira diga icaiño naimiena uaidote, naimie diga ñaillena. 27 Mena años illa mei, Porcio Festodi Félix ifo meidote. Félixdi judíuaina iobitaacana jira, cárcelmo Pablona fainonocaide.

25

Festomo Pablo llua rafue

¹ Naie provinciamo darui amani rilla mei, Cesareamona Jerusalémo Festo jaide. ² Nainomo Jusiñamui diga nanoca ñairainidi, jiaie judíuai illaicomini diga, Festomo Pablona llogidotimaci. ³ Festomo daje rafuena jıcanotimaci, naimaci iena. Pablona Jerusalémo atillena jıcanotimaci. Naiso motomo naimiena meinellemo comeciaina facadimaci. ⁴ Festo uai ote:

—Pablo Cesareamo fiebiite. Raire nainomo abıdo jaiticue. ⁵ Omoi illaicominimona damerie cue diga jaitimaci, nicino naimiemo ia, naimiena llogıdollena.

⁶ Nıbai ocho, nıbai diez diga irui nainomo illa mei, Cesareamo naimie abıdo jaide. İco are ie cominimo llouillanomo raide. Pablo atillena llote.

⁷ Pablo billa mei, Jerusalémona bite judíuai naimie ecımo ofidimaci. Diga fododıcinona naimiena llogidotimaci; iadedı tainuaido llogidotimaci.

⁸ Pablo uai ote:

—Judíuai llogacınuaina jaca jeare finoñedicue. Jusiñamui jofona jeare finoñedicue. Cai nanoca illaimamo jearede rafuena jiaı finoñedicue.

⁹ İena cacade; iadedı Festo judıuaina iobitaacana jira, Pablomo jıcanote:

—¿Jerusalémo cue diga jaiacadıo? Nainomo nana bie rafuena siadoiticue.

¹⁰ Pablo uai ote:

—Llogıdoracomo jai iticue. Cai nanoca illaima facaina cominimo llotio, naimacına duere finollena. Benomo cue llolle. Judıuaimo jaca buena finoñedicue. İena raise uiñotıo.

¹¹ Romanuai railla nairai illaicomini llogacınona cue ñnoñenia, damamei jearede rafuena cue finoia, cue fiodaillemo jaca ocuiridicue; iadedı

cuemo nicino iñenia, cuena meinellena bu cuena judíuaimo fecañeite. Cue rafue naimie siadollena, Romamo cai nanoca illaíma dine jaiacadicue.

¹² Ie ecimo ite canoraini diga Festo ñaia mei, Festo raite:

—Cai nanoca illaíma dine o jaiacana jira, nainomo jaitio.

Agripamo Pablo llua rafue

¹³ Diga irui illa mei, Agripadi Festo dine, ie miriño Berenice diga, Cesareamo bitiaímaiaí. Agripadi naie enirue illaíma. ¹⁴ Diga irui nainomo itiaímaiaí. Naimiemo Festodi Pablo ie rafuena llote:

—Félix Pablona cárcelmo bene faínonocaide. ¹⁵ Jerusalémo navui cue ia, Jusiñamui diga nanoca ñairaimadi, judíuai einamaci diga, naimiena llogidote. Naimiena duere finollena cuemo jicanotimaci. ¹⁶ Naimaci uai oticue: “Cai Romanos cominidi llogidogamiéna jamai tainomo duere finoñedicaí; iadedi llogidogamiédi ie llogidotino uai nano cacareiticaí. Ie mei ie abi riidollicinomo jiaí cacareiticaí”.

¹⁷ Ie jira naimaci cue dine benomo navui bia, ie are cominimo cue llouillanomo raidicue. Pablona cue dine uaidoticue. ¹⁸ Naimiena llogidotinodi lloia, naimiena marañede finoca rafue cue facaja isoí, llogidoñedimaci. ¹⁹ Dani naimaci inuacinona llotimaci. Jesús raillamie rafuena llotimaci. “Jesús jai fodaite” raitimaci; iadedi Pablodi: “Jesús jai cajede” raite. ²⁰ Bie rafuena raise cue uiñoñenia, naimiemo navui jicanoticue: “¿Jerusalémo jaiacadio, nainomo bie rafuena siadollena?”; ²¹ iadedi Pablo nainomo jiacaiñede. Cai nanoca illaíma

dine jaillena jìcanote. Nainomo ie rafuena siadol-
lena jitaide. Ie jira naimie sedajana llotìcue, cai
nanoca illaìma dine naimiena cue nia oretañenia.

²² Agripadi Festomo llotè:

—Naimie ñaiana cacaacadìcue.

Festo uai ote:

—Ìco are naimie ñaiana cacareitìo.

²³ Ie jira ie are Agripa, iaìmaiaì Berenice diga,
governador ofiracomo bitiaìmaiaì. Finobillano
ebire bitiaìmaiaì. Soldaduai imaci illaìcominì jiaì
bitimaci. Naie nairaìmo ite nanoca cominì jiaì
bitimaci. Ofilla mei, Festo Pablona atillena llotè.

²⁴ Festo llotè:

—Agripa, nana beno itino, bimiena
ciodomoì. Jerusalémo ailluena judíuai naimiena
llogìdotimaci. Bene cue dine jiaì bitimaci. Naimie
meiniana eo jitaìdìmaci; ²⁵ iadedì naimiemo
nicinodì iñenana jai uiñotìcue. Naimiena
meinellena cue llollena, nicinodì naimiemo iñede.
Augusto dine naimie jaillena naimie jìcanua jira,
naimiena oretaitìcue. ²⁶ Nicinodì nia iñede, cai
illaìmamo cue cuellena. Ie muidona omoì dine
naimiena jai atidìcue. Agripa, naimie ñaìamo raise
cacarei. Naimiemo cai jìcanua mei, nìbai nicino
naimiemo illana uiñoitìcaì. Iemona Augustomo
cuetìcaì. ²⁷ Augusto dine llavecamiè cue oretaia,
naimiemo nicino iñenia, cuemona maraiñede.

26

Pablo ie abina dane riidua rafue

¹ Naie facaise Agripa Pablomo llotè:

—Mai llono. O abì riiduacinona cacaacadìcue.

Pablo: “Jii” raillanona, ie onollì a ñuitade. Raite:

2 —Agripa, bene o illa jira, cuemona mare. Cue fue baillafuedo o uicomu cue abina riidoitícue. Judíuai cominí díga rafuena cuena llogídotímaci. 3 Nana cai judíuai rafuena raise uíñotío. Nana cai einamaci rafuena jiaí uíñotío. Cuemo raise cacarei. 4 Jerusalémo naimaci motomo cue illa jira, díga judíuai cue coniruenamona cuena uíñotímaci. 5 Cuena naimaci lloiacania, fariseo imiena cue illana are uíñotímaci. Jiaíe cominí baífemo fariseuaidí cai einamaci llogacínuaína ñnotímaci. 6 Jusiñamuidí cai usumatiaí micoriaímo fiodaillamona cominí íco jilloillena jaie llote. Ie suillemo jai ocuiridícue. Ie jira llogídoracomo birui jai itícue. 7 Nagarui Jusiñamuina naimaci eo sedajamona, cai doce nairaídí naie llogacino suillemo jiaí nia ocuiridímaci. Ore illaíma, bie ocuirillacino muidona judíuai illaícominí cuena llogídotímaci.

8 ¿Bue ñellena Jusiñamuidí cominí fiodaillamona jillotajana ñnoiacaíñedomoí? 9 Jaie ie isoidícue. Nazaret ie Jesúna ñnotinona díga jearede rafuena jaie finoacadícue. 10 Jerusalémo iena finodícue. Cárcelmo ailluena Jesúna ñnotinona jonetícue. Jusiñamui díga nanoca ñairainí uaido iena finodícue. Naimacína meinelle cai illaícominí raia: “Jee” raisoidícue. 11 Díga judíuai ofiracomo, díga icaiño, naimacína duere finodícue. Naimaci Jesúna jeare ñaiana jitaídícue. Naimaci díga cue eo icirilla jira, jiaíe eníruemo ite nairaímo jiaí jaidícue, naimacína duere finollena.

*Pablodí Jesúna ñnuana llua rafue
(Hch 9.1-19; 22.6-16)*

¹² 'Ie jira Damasco como jaidicue. Jusiñamui diga nanoca ñairaini uaido jaidicue. ¹³ Ore illaima, jítoma naidai ia, monamona quetiñotena cidicue. Naidi jítoma baifemo quetiñote. Cue abina quetiñote. Cue diga itino abina jiai quetiñote. ¹⁴ Eniruemo cue ana uaia, damie lluaana cacadicue. Judíuai uaido cuemo llote: "Saulo, Saulo, ¿bue ñellena cuena duere finodio? Cue diga icirillana eo sefuiruitio. Iemona o abina duere finodio, ricaiillamona raise maiga jurareta suiñoacana isoi. Ie isoidio. Ricaiillamona, cuena duere finoacadio". ¹⁵ Uai oticue: "¿Budiota?" Cai Nama cuemo llote: "Jesúdicue. Cuena duere finodio. ¹⁶ Mai a naidacai. Cue rafuena o llofuellena ona fetodicue. O birui cúa rafuena lloitio. Ona cue uiñotalle rafuena jiai lloitio. ¹⁷ Naimaci ona duere finoia, omoi cominimona ona jillotaiticue. Judíuaiñedinomona ona jiai jillotaiticue; iadedi judíuaiñedino dine ona oretaiticue, ¹⁸ naimaci comeciai tainomo iñellena. Taife anamona Jusiñamui anamo naimacina itataitio. Jecino anamo naimaci birui illa jira, jitre dinomo jai itimaci isoidimaci. Jusiñamuina uiñuamona, useredonomo iitimaci isoidimaci. Iemei Jusiñamui naimaci jecinona dotajite. Cuena naimaci ñnuamona, nana cuena ñnotino diga cue illano ico jaca iitimaci".

¹⁹ 'Ore Agripa, monamona cue cacaja rafuena ñnoticue. Jesúdi Jusiñamui Jitona ñnoticue. ²⁰ Damasco itinomo iena nano lloticue. Ie mei Jerusalémo itinomo iena jiai lloticue. Diga Judeamo itinomo iena jiai lloticue. Judíuaiñedinomo iena jiai lloticue. Lloticue:

“Omoi comeciaino iticinona meido, Jusiñamui dibeimo omoi illena. Omoi comeciaino iticinona omoi meidua mei, mare rafuena finocana jai”.
 21 Ie jira judíuai illaicomini Jusiñamui jofomo cuena gaitadimaci. Cuena meineiacadimaci;
 22 iadedi Jusiñamui cuena canode. Ie jira birui bene iticue. Illaicominimo beno nia lloticue. Illaicominiñedinomo jiai nia lloticue. Dama Jusiñamui facaina lloraini micoriai ico suille ciegafuena birui lloticue. Dama Moisés micori ico suite ciegafuena jiai birui lloticue. Jiaie rafuena lloñedicue. 23 Jai e cuetimaci: “Cristo legi cacajite. Fiodaillamona jilloite. Naimiedi nano dofoconi jilloitimie. Iemona cai judíuai comini jeacinomona jilloillena uiñoitimaci. Iemona judíuaiñedino jeacinomona jilloillena uiñoitimaci”. Ie jira bie rafuena llocana jaidicue.

Creyentena Agripa jaillena Pablo jitailla rafue

24 Iese Pablodi abi riduano, Festo riire llote:

—Pablo, odi uairico isoidio, eo comecina o facaja jira.

25 Pablo uai ote:

—Uairicoñedicue. Festo, odi cue illaimadio. Cue llucacnodi uanaicino. Ebena ñai-ñaiacaiñedicue.

26 Agripa cue lloga rafuena raise uiñote. Nana bie rafuena naimie jai uiñua jira, naimie diga marefodo ñaiticue. Bainino suiñede. 27 Ore Agripa ¿Jusiñamui lloraini ciegafuiaina inotio? omo jicanoticue. Iena o inuana jai uiñoticue.

28 Agripa dinena uai ote:

—Dallu o ñaiamona, cuena creyentena nibai itataiacadio.

29 Pablo uai ote:

—Ñibai dallu ñaiticue. Ñibai are ñaiticue; iadedi cue isoi o jaillana jitaidicue. Ua nana cue ñaiana cacadino cue isoi jaillana jitaidicue; iadedi omoi bie lloeo diga maiana jitañedicue.

³⁰ Iemona Agripa naidacaide, Festo diga, Berenice diga. Nana raidino jiai naidacaidimaci.

³¹ Jino jaillano, Pablo joreña siadotimaci:

—Bimie jaca buena finoñede, naimiena cai meiniana llollena. Buena finoñede, cárcelmo illena.

³² Agripa Festomo llote:

—Naimie cai nanoca illaïma dine jaillana jicanoñedena, niadedi naimie jino marena oreca.

27

Romamo Pablo jailla rafue

¹ Italiomo Augusto dine Pablo oretajana Festo llua mei, Pablona jiaie llavecano diga capitámo fecade. Naie capitádi Julio. Augustona mameciredede batallómo jainaiide.

² Adramitiomona bite botemo jaidicai. Naie bote Asia railla enirue igobiaïmo sijicana jaiacade. Aristarco cai diga jaide. Macedonia enirue imie. Naimie nairaidi Tesalónica. Suiñodicai.

³ Ie areruido Sidón railla nairaimo ridicai. Nainomo Juliodi Pablona marena sedade. Ie nabaiñiai dine Pablo ari jaillana rairuiñede. Ie jira naimacimona ie jitaille rana ote. ⁴ Iemei nainomona suiñodicai. Aifidi abido caina ati-atina jira, aifi raise iñenanomo, Chipre railla uiasi cai jarifebeïmo illa ecido jaidicai. ⁵ Cilicia railla enirue ecido monaillaido jaidicai. Panfilia railla enirue ecido jiai jaidicai. Mira railla nairaimo

ridicai. Naie provincia mameci Licia. ⁶ Naie bote Roma dine jaiñena jira, capitadi jiaie botena jenode. Capitadi Alejandriamona bite botena baite. Naie bote Italiamo jaiacade. Ie jira naie botemo cai jonecaida, caina uite. ⁷ Diga irui fecuise sefuire jaillano, Gnido railla nairai iaireise ridicai. Aifidi abido caina ati-atina jira, Creta railla uiasimo jaidicai. Aifi raise iñenanodo Salmón railla nairai dine jaidicai. ⁸ Uiasi iaireise iese sefuicana jaillanona, Maregobe railla illanomo ridicai. Lasea railla nairai jiai ianori ite.

⁹ Digarui cai faifilla jira, noci deisoilla facaise jai illa jira, jaillena eo jacirede. Ie jira botemo maijadinomo Pablo llote:

¹⁰ —Nabaiñiai, cai jaillena eo jacirenana uiñoticue. Eo maraiñeno caimo sefuiticai. Cai raruiaina nibai faifiticai. Botena jiai nibai faifiticai. Cai nibai jiai faifiticai —llote.

¹¹ Iese llote; iadedi naie bote piloto oni jaiacade. Naie bote nama jiai oni jaiacade. Capitán iaimaiai lluana Pablo lluana baifemo ñnote. ¹² Igobe maraiñena jira, rollime facaise illa jira, ailluena comini nainomona jaiacadimaci. “Fenice railla nairaimo niedi riiticaí” raillano jaiacadimaci. Nainomo rollime facaiseconi iacadimaci. Fenice Cretamo ite. Naie igobedi jitoma billa beici dine eruaide. ¹³ Beici dinena aifidi bia, “cai jitailla aifidi bite” raillanona, suiñodicai. Creta iairei monaillai fuemo jaidicai. ¹⁴ Ie mei raire cai dine eo riire aifi bite. Naie aifi noci deisoilla dinena bite. ¹⁵ Botena oni uite. Botena atona eronenidicai. Ie muidona jamai ebena jaidicai. Aifidi caina iese uite. ¹⁶ Janorede uiasi fuemo

aifi raise iñenanomo jaidicai. Nai uiasi mameci Clauda. Faifiñellena bote ie janorede nocae sefuire a aiñodicai. ¹⁷ A aiñua mei, rao diga botena ruica maiticai. Sirte railla conillie illanomo cai joodai raillano, velaiaina duiñodicai. Iemei aifi jamai uigacai. ¹⁸ Ie areruido aifi riire illa jira, cargana oni dotadicai. ¹⁹ Dane ie are bote ie rarui, cai onolli diga, oni dotadicai. ²⁰ Diga irui jitoma bainide. Diga irui ucuai jia bainide. Aifi eo riire nia ite. Cai jillobiñellemo jai ocuirñedicai.

²¹ Diga irui cai guiñena mei, Pablo naimacimo llote:

—Nabaiñia, cue uaina navui ñnotiomoidena, niadedi bie isoi sefuiñedicai. Cretamo cai fiebidicaina, bie isoi sefuiñedicai. ²² Omoi comeciaina ocuiño. Bie botedi faifite; iadedi caimona jaca buna faifiñeite. ²³ Jaive naiona Jusiñamui jaienididi cuemo bairede. Jusiñamuimo jainaiaidicue. Naimiena sedadicue. ²⁴ Naie jaienididi cuemo llote: “Pablo, jaciruiñeno. Romamo o nanoca illaima dine iitio. Jusiñamui ona duenaila jira, nana o diga jaidino jilloitimaci”. ²⁵ Ie jira omoi comeciaina ocuiño. Cuemo llua isoi, naimiedi bie rafuena suitaita. Jusiñamui iena finuana ñnoticue. ²⁶ Nibai uiasimo jutadaiticai.

²⁷ Catorce digarui naio illamona, Adria railla monaillaimo jamai cai jaia, naiona daferui fa-cai marineruaidi: “Enirue iaire ite” raillanona comeciaina facadimaci. ²⁸ Ie jira ie aforedinona facadimaci. Veinte brazas aforede. Iemei nano nie dinori illamona, dane facadimaci. Quince brazas aforede. ²⁹ Nofici illanomo naimaci bai rail-lano, fairillaillena, ie jillacimona cuatro lloelluna

faitimaci. Mona monaille sedadimaci. ³⁰ Naie fa-
caise marineruai botemona aisiacadimaci. Ie jira
botemo ite nocaena ana monaillaimo dotadimaci,
bote jillacimona lloelluna faia isoi.

³¹ Iena ciuano, Pablo capitámo llote. Sol-
daduaimo jiai llote:

—Botemo bimaci fiebiñeniadedi, jilloñeitomoi.

³² Ie jira soldaduidi nocae maia
raona jaitadimaci. Jai dinomo nocaena
fainonocaidimaci. ³³ Nia monaiñenia, Pablo nana
caimo llote:

—Guiño. Catorce digarui illanona, jai
guiñedomoi. ³⁴ Ie jira guiño, omoi mairillesa. Ua
faifiñeitomoi.

³⁵ Iese naimie raillanona, Jusiñamuimo
iobillacinona fecade, nana comini illa uicomo.
Llomenicono taruano, guite. ³⁶ Nana naimaci
comeciai ocuiñocaida, jiai guitimaci. ³⁷ Botemo
doscientos setenta y seis diese iticai. ³⁸ Cai
monillamona, fiebide trigona monaillaimo oni
fadodicai, bote meenaiñellena.

³⁹ Ie oni monaidemo, erodatemo, naie eniruena
uiñoñedicai. I gobemo conillici illana ciodicai.
Nainomo jamai ebena sijiacadicai. ⁴⁰ Ie jira
lloelluna nainomo oni fainonocaidicai. Datarabe
maiana suiñodicai. Vela aifimo sebiñoticai. Mon-
aillai fuemo enirue dine jai jaidicai. ⁴¹ Iemei
jaiciridifomo ridicai. Eniruemo jodate. Bote
muido eniruemo jaiare jodate. Eo baguamona
jillacai taicosite. ⁴² Naimaci iamona jillobi rail-
lano, soldaduai llavecanona meineiacadimaci.
⁴³ Pablona jillotaiacana jira, capitán iena rairuide.
Llote:

—Nano iana uiñotino diese monaillaimo ana daia. Eniruemo jai. ⁴⁴ Jiaino bote ie rabricido juicaida icana jai. Jiaino bote ie raruiaido juicaida icana jai. —Iese eniruemo nana marena ridicai.

28

Maltamo naimaci illa rafue

¹ Jai cai jillua mei, Malta railla uiasimo cai illana uiñoticaí. ² Nainomo ite comini caina marena feiñotimaci. Iraina bonotatimaci. Noci deilla jira, rosirena jira, irai ecimo agaillena caina uaidotimaci. ³ Pablo reiena ua mei, iraimo jonete. Joniamona, jaio usirenamona, reigaimona jino bite. Naimiena ainide. ⁴ Jaio naimie onollido lliillana Malta comini ciuano, coniniri ñaitimaci:

—Ñibai bimie comena meinetimie. Monaillaimona jillobide; iadedi jai bu naimiemo ibadi oga.

⁵ Jaiona ciuanona, Pablo iena iraimo dotade. Iemei naimiemo jaca bue isoide rafue suiñede. ⁶ Comeciaina facadimaci: “Naimie onolli raire sirite. Iemei raire fodaite”. Are sedaja mei, naimiedi jaca niese iñede. Ie jira dane comeciaina facajano raitimaci:

—Naimiedi ñibai Jusiñamui.

⁷ Naie illanomona uiasi illaíma enirue iaíre ite. Naimie mamecidi Publio. Caina marena feiñote. Darui amani ie jofomo caina marena itatate. ⁸ Publio moo duide biide. Abi cuaride. Jeraina feide. Ie jira naimie dine Pablo jaide. Jusiñamuimo jia mei, ie onolli naimiemo joniano, naimiena jillotate. ⁹ Bie rafue suilla jira, naimie dine nana

uiasimo ite duidino bi-bidimaci. Naimacina jil-lotate. ¹⁰ Ie jira caimo iobillacinona eo fecadimaci. Cai oni jaiadedi, cai jitailla ra caimo fecadimaci.

Romamo Pablo rilla rafue

¹¹ Daje amani fivui illa mei, Alejandriamona bite botedo jaidicai. Naie uiasimo nana rol-lime facaiseconi naie bote ite. Mena jusiñamui iaiaimai joreño bote muidomo ite. Damie Cástorna mameciredede. Jiaimie Póluxna mameciredede. ¹² Naie botedo oni cai jaillanona, Siracusamo sijidicai. Darui amani nainomo iticai. ¹³ Nainomona jaillano Regiomo sijidicai. Darui illa mei, aifi beici dinena billa jira, ie areruido Puteolimo ridicai. ¹⁴ Sijia mei, nainomo creyentiaina baiticai. Naimaci diga siete digarui cai illana jitaidimaci. Ie mei Roma dine jaidicai. ¹⁵ Romamo nia cai riñenia, nainomo ite creyentiaí cai billana fididimaci. Cai dine bitimaci. Foro de Apio railla nairaimo damierie bitimaci. Jiaino Tres Tabernas railla nairaimo bitimaci. Naimacina ciuano, Pablodi Jusiñamuimo iobillacino fecade. Ie comecina jiai ocuiñote. Cai diga Romamo jaidimaci. ¹⁶ Romamo cai ria, capitán llavecanona ie illaimamo fecade. Cárcelmo Pablona naie illaíma oreñede; iadedi Pablo ie ibauiga jofomo eneno oni orede. Aisií raillano, daje soldado nainomo naimiena sedade.

Romamo Pablo llofua rafue

¹⁷ Darui amani illa mei, Pablo Romamo ite nanoca judíuaína uaidote. Danomo ofilla mei, naimacimo llote:

—Caimaci, jaca buena cai cominimo finoñedicue. Cai einamací llogacinuaína jaca

ñnoticue; ¹⁸ iadedi Jerusalémo cuena gaitajano, romanuai nairai cominimo cuena fecadimaci. Romanuai nairai comini cuemo jicanua mei, cuena marena oretaiacade, fiodaillafue cuemo iñena jira; ¹⁹ iadedi judíuai: “Dama ite” railla jira, cai nanoca illaíma dine jaillena jicanoticue; iadedi cue nairai diga jaca iciriñedicue. ²⁰ Omoi diga ñaillena, omoína cioacadícue. Fiodaillamona ico comini jillollena cue llofuecabilla jira, bie lleo diga maigacue.

²¹ Uai otimaci:

—Judeamona jiaíno ona cuega cartana jaca feiñoñedicaí. Caimo o rafuena llollena, jaca buna biñede. Bene jaca bu ona jeare ñaiñede. ²² Ie jira omona naie rafuena cacaacadicaí. Naga illanomo comini o llofuiana uaitajana uiñoticaí. Creyentiaína jeare ñaitimaci. Iena fidídicaí. Ie jira caimo iena raise lloño.

²³ Naimie dine dane billiruina llotimaci. Ie mei ailluena comini naimie jofomo bitimaci. Naimie anamo naimaci illana Jusiñamui jitailla jira, Jusiñamui díbeimo naimaci comeciái iuaina meiduana llofujete. Moisés micorí llogacínuaímona, Jusiñamui facaina lloraini micoríai cuegafuíaímona, Jesúsna llofujete. ²⁴ Jiaíno naimie llofuiana ñnotimaci. Jiaíno ñinoñedimaci. ²⁵ Nana naimaci comeciaina daje isoi lloíñedimaci. Iemona oni jaidimaci. Nia jaiñenia, naimacimo Pablo llote:

—Jusiñamui Joreñodi Isaías micorína cai usumatiaímo raise llotatate. Omoi usumatiaí micoríai illa isoi nia itomoi. Isaías micorídi omoína jai cuega rafue jai suide. Naimie micorí cuete:

²⁶ Jusiñamui llote: “Bie comini dine mai jai.

Llono: ‘Cue rafuena cacaitomoi; iadedi iena cacaiñeitomoi.

Rafuena cioitomoi; iadedi iena uiñoñeitomoi.

²⁷ Omoi comeciai jai tainomo ite isoide.

Omoi jefona jai cacaiñedomoi isoidomoi. Cue rafuena jai cacaiñedomoi.

Jai uisínidomoi isoidomoi. Siño rafuena jai cioiacaiñedomoi. Iena jai uiñoiacaiñedomoi.

Cue dibeimo iacaiñedomoi, omoina cue jilloitai raillanona’ ”.

²⁸ Jusiñamui rafuena omoi ñnoñena muidona, judíuainedínodi Jusiñamui naimacina jilloitaicanana jai fididimaci. Naimaci iena cacareitimaci.

²⁹ Iese naimie llua mei, judíuaidi coniniri siadocana abido jaidimaci.

³⁰ Mena años Pablo ie jofomo ite. Ie illa dinori naie jofona ibauide. Nainomo nana naimie dine bite cominina feiñote. ³¹ Naimie anamo naimaci illana Jusiñamui jitailla jira, Jusiñamui dibeimo naimaci comeciai iuaina meiduana llofuate. Marefodo llofuate. Naimiedi cai Nama Jesucristo rafuena llofuate. Jaca budi naimie llofuiana rairuñede. Teofilo, jaca digacino omo jai lloticue.

Mai. Lucadicue.

**Jusiñamui uai: Jusiñamui jito rafue illa
rabenico**

**New Testament in Huitoto, Murui (PE:huu:Huitoto,
Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source files dated 29 Jan 2022

145a1f66-dca1-5de3-9c00-4e533605e488